

## © “Ёшлик” №9 (281) 2014 й.

Ўзбекистон Ёзувчилар уюшмаси,  
"Камолот" ёшлар ижтимоий ҳаракати муассислигидаги  
ёшларнинг адабий-ижтимоий журнали  
1982 йилдан чиқа бошлаган.

## МУНДАРИЖА

### КИМ ЭДИГУ КИМ БҮЛДИК!

Сирожиддин РАУФ. Қанот боғлаган орзулар.	2
Муродхон ЭРГАШЕВ. Сайёҳларнинг самимий эътирофлари.	56

### АДИБ ХОНАДОНИДА

Икром ОТАМУРОД. Кўнгил таржимони.	4
-----------------------------------	---

### МУЛОҚОТ

Абдимурод ОТАЖОНОВ. Қалб гавҳари.	9
-----------------------------------	---

### НАСР

Файзулла САЛАЕВ. Еттинчи бўрдоқи. Ҳикоя.	13
Фармон ТОШЕВ. Кечиккан байрам. Ҳикоя.	36
Жасур КЕНГБОЕВ. Фурбатхона. Ҳикоя.	52
Оллоёр БЕГАЛИЕВ. Ҳалоскор мушук. Ҳикоя.	61

### НАЗМ

Икром ОТАМУРОД. Кангул сукути – ўзингни таниш.	7
Дилбар СИДДИҚОВА. Мен сени баҳт томон кузатган эдим.	25
Мунаввара КУРБОНБОЕВА. Дилемга умидлар ташлаётir чўғ.	34
Шаҳодатбону ИМОМНАЗАРОВА. Ёдимни безайди шаффоғ хаёллар.	39
Ориф ҲОЖИ. Мени соғиндингми яйдок адирлар.	48

### ЖАҲОН ҲИКОЯЧИЛИГИ

Василий ШУКШИН. Ҳикоялар.	40
Кейт ЧОПИН. Ўқинч. Ҳикоя.	58

### АДАБИЁТШУНОСЛИК

Қозоқбой ЙЎЛДОШ. Модернизм: илдиз, моҳият ва белгилар.	26
Исломjon ҶУБОВ. Роман – мусоҳаба	50

### БИРИНЧИ УЧРАШУВ

Тоҳир РАВШАН.	55
САРВИНОЗ.	55

### ЕЛПУҒУЧ

Турсунбой БОЙМИРОВ. Биламан, яхши биламан. Ҳажвия.	64
----------------------------------------------------	----

Босишига 28. 09. 2014 йилда руҳсат берилди. Қоғоз формати 60x84 1/8. Нашриёт ҳисоб тобоги 8,7. Индекс 822.

ISSN 0207-9137. Журнал 2007 йил 4 майда Матбуот ва Ахборот агентлиги томонидан № 0253 рақами билан рўйхатга олинган.

Журналдан кўчириб босилганда "Ёшлик"дан олинди" деб изоҳланиши шарт.

"HIOL-MEDIA" МЧЖ матбаа бўлимида чоп этилди. Буюртма № 92. Адади 3400 дона.

Тошкент шахри, Учтепа тумани, Шараф ва Тўқимачи кўчалари кесиши маси.



Сирожиддин РАУФ,  
Ўзбекистон Ёзувчилар уюшмаси масъул котиби

Ким эдигу ким бўлдик!


Ким эдигу ким бўлдик!



# КАНОТ БОГЛАГАН ОРЗУЛАР

Барча замонларда ҳам ватан-парвар зиёлилар, хусусан, ижод ахли ўзи туғилиб ўсган юрт қадрияти ва маданияти, ютуқ ва муваффақиятларининг фидойи тарғиботчилари бўлган. Бунга оқсоч тарих бисотидан истаганча мисоллар топиш мумкин. Шу маънода мамлакатимиз мустақилликка эришгандан бўён ўтган вақт мобайнида ҳар йил ўкув мавсумининг илк кунида Ўзбекистон ёзувчилар уюшмаси аъзолари бўлмиш адид ва шоирларимиз ҳам шарафли бир вазифани аддо этишга камарбаста бўлаётганларини эътироф этишимиз жоиз. Яъни шу куни улар таълим даргоҳларига, ёш авлод ҳузурига бориб, ҳурматли устоз ва мураббийлар билан бир сафда елкама-елка туриб, биринчи дарсда иштирок этишмоқда. Биринчи дарс! У ҳамиша Ватан ҳақида, Истиқлол ҳақида, бу улуғвор тушунчаларнинг ҳалқимиз ҳаётида тутган ўрни, бемисл аҳамияти, мазмун ва моҳияти хусусида бўлади, албатта.

Бу йилги шундай серзавқ дамларни мен ажаб бир ҳаяжон оғушида қаршиладим. Чунки ёзги таътилдан қайтган чақноқ кўз, беғубор қалб ўкувчилар билан юзма-юз мулоқот менга ҳам насиб этди. Ўша дамда болажонларга Ватан ва Истиқлол ҳақида айтадиган гапларим шу қадар кўплигидан, сўзни қай биридан бошлиласам экан, деб ўйлайман. Муҳтарам Президентимизнинг «Ўзбекистон мустақилликка эришиш остонасида» асарининг мазмун-моҳияти тўғрисида сўйласам-чи? Ахир, Мустақиллик неъмати бизга осмондан чалпак бўлиб ёғилган эмас. Унинг учун ҳалқимиз қандай машаққатларни, ҳўрликларни бошидан кечирган? Не бир фидойи ўғлонлар ўз жонларини курбон қилишган? Шу мавзуда гапирсам, ўкувчиларнинг кўнглида Мустақилликка муҳаббат, унинг анъаналарини давом



Ким эдигу  
ким бўлдик

эттиришга бўлган шижоат шакшубҳасиз янада ошади. Балки, жорий йилнинг май ойида Самарқанд шаҳрида бўлиб ўтган «Ўрта асрлар Шарқ алломалари ва мутафаккирларининг тарихий мероси, унинг замонавий цивилизация ривожидаги ўрни ва аҳамияти» мавзусидаги ҳалқаро конференция борасида фикрлашсак маъқулмикин? Ахир, ушбу анжуманинг очилиш маросимида давлатимиз раҳбари сўзлаган ҳароратли, сермазмун нутқ ҳалиҳануз юракларда акс-садо бериди турибди-ку. Табиийки, шу мавзуда гапирсам, зукко болажонларимиз кўнглида буюк аждодларимиз мерос қолдирган, дунё илму фанига, маънавият ва маданиятига улкан ҳисса бўлиб қўшилган бебаҳо асарлар билан фаҳрланиш туйғуси яна бир карра жўш уради. Олдда турган янги ўкув йилида астойдил ўқишига, янада чукур билим олишга, ўша улуғ аждодларимизга муносиб ворис бўлишига ҳаракат қилишади.

Биламан, ўша пайтда мен каби ҳаяжонланиб, завқ-шавққа тўлиб турган педагоглар, олимлар, ижодкорлар жуда кўп бўлди. Ахир, бу йил ўкув муассасаларида «Мустақиллик дарслари» ўтиш учун 15 мингга яқин ижтимоий-гуманитар йўналишидаги профессор-ўқитувчилар, таниқли олимлар, соҳа мутахассислари жалб этилди. Уларда давлатимиз раҳбарининг юқорида таъкидланган «Ўрта асрлар Шарқ алломалари ва мутафаккирларининг тарихий мероси, унинг замонавий цивилизация ривожидаги роли ва аҳамияти» мавзусидаги ҳалқаро конференциянинг очилиш маросимида нутқига алоҳида ургу берилди. Мамлакатимиз Президентининг ушбу маърузаси ёшларнинг аждодларимизга муносиб ворис сифатида камол топиши, ватанпарварлик, фидойилик руҳида улғайишида

муҳим ўрин тутади. Шу нуқтаи назардан мазкур маърузани жорий йил сентябрь-октябрь ойларида умумтаълим мактабларининг 9-синфларида б соатлик факультатив машғулотлар сифатида ўқитиш йўлга кўйилади. Бундан ташқари, 3-8 синфларда «Одабнома», «Ватан туйғуси», «Тарих», «Адабиёт», «Математика», «Кимё», «Физика» ва «Иқтисодий билим асослари» фанларининг тегишли мавзулари мазмунига сингдириб ўқитиш бўйича ҳам тавсиялар ишлаб чиқилди. Шу билан бирга, мазкур дарсларда мамлакатимизда барча соҳаларда олиб борилаётган кенг кўламли испоҳотларнинг маъно-мазмунини, танлаган тараққиёт йўлнимиз, янги демократик давлат ва фуқаролик жамияти қуриш бора-сида эришаётган ютуқ ва мэрраларимизнинг моҳияти ва аҳамиятини ёш авлод шуурига таъсирчан услугуб ва шаклларда етказиш, уларнинг қадр-қўмматини чуқур англатишга алоҳида эътибор қаратилди.

Шу ўринда мамнуният билан таъкидлаш мумкинки, юртимизда баркамол авлод тарбияси йўлидаги эзгу ишлар изчил давом эттирилмоқда. Бу йил 9739 та умумтаълим мактабида жами 4 миллион 438 минг 162 нафар ўқувчи таълим олади. Жорий йилги янги ўқув йилига ҳам қизғин тайёргарлик кўрилди. Жумладан, инвестиция дастурига мувофиқ 381 та мактабда қурилиш-таъмирлаш ишлари олиб борилди, шундан 220 таси реконструкция қилинди, 161 таси капитал таъмирланди. Ушбу мақсадларга 282 миллиард сўм маблағ йўналтирилди. Шунингдек, бу йил жами 3024 та умумтаълим мактаби ҳамда 48 та болалар мусиқа ва санъат мактабини 106,2 миллиард сўмлик мебель, ўқув-лаборатория асбоб-ускуналари, компьютер техникаси, спорт анжомлари ҳамда мусиқа чолғу асбоб-ускуналари билан жиҳозлаш ишлари амалга оширилгани айни муддао бўлди.

Ўзбекистон Республикаси Халқ таълими вазирлиги маълумотларига кўра, янги ўқув йили учун 605 номдаги 34,5 миллион нусха дарслик ва ўқув-услубий кўлланмалар чоп этилиб, жойларга етказилди. Шунингдек, бошланғич синф ўқитувчилари учун илғор педагогик ва ахборот-коммуникация технологиялари асосида 7 номдаги услубий кўлланма, мультимедиали дастурлар тайёрланди. Бу умумтаълим мактабларининг 1-синфларида фанлар тўлиқ илғор педагогик ва ахборот-коммуникация технологиялари асосида ўқитилишини таъминлашга хизмат қилади, албатта. Мазкур жараён босқичма-босқич барча синфларда давом эттирилиши билан ҳам аҳамиятидир.


Маълумки, давлатимиз раҳбарининг 2012 йил 10 декабрдаги «Чет тилларни ўрганиш тизимини янада такомиллаштириш чора-тадбирлари тўғрисида»ги қарорига мувофиқ таълим муассасаларида хорижий тилларни ўргатишга катта эътибор қаратиб келинмоқда. Бу йил 1-синфлар учун 553 минг нусха инглиз («Kid's English»), 21 минг нусха немис («Deutsch Macht Spab»), 17 минг нусха француз («Hirondelle») тиллари дарсликлари қайта нашр этилгани, 2-синф ўқувчилари учун 591 минг нусха чет тили дарсликлари ва ўқитувчилар учун 22 минг нусха услубий кўл-

ланмалар нашр этилгани фикримизнинг ёрқин намунасиdir. Эътиборлиси, улар ўқувчи китоби, ўқитувчи учун кўлланма ва мультимедиали иловалар (DVD-диск)дан иборат. Буларнинг барчаси келажагимиз эгалари бўлмиш ўғил-қизларимиз ҳеч кимдан кам бўлмаган шарт-шароитларда ўқиб, таълим-тарбия олиши йўлида қилинган эзгу саъй-ҳаракатлардир.

Эътироф этиш ўринлики, «Соғлом бола йили» Давлат дастурига мувофиқ мактабгача таълим муассасаларининг моддий-техник базасини мустаҳкамлаш, болаларни мактабга тайёрлаш сифати ва ходимларнинг касб маҳоратини оширишга қаратилган 2015-2020 йилларга мўлжалланган Давлат дастури ишлаб чиқилди. Мактабгача таълимга қамраб олинмаган болаларнинг ота-оналари учун «Болажон» таянч дастури асосида «Нутқ ўстириш, ўқиши ва саводга тайёрлаш», «Математик тасаввурларни шакллантириш», «Соғлом танда – соғ ақл» каби беш номдаги кўлланмалар тайёрланди. Ушбу адабиётлар мактаб кутубхоналари орқали ота-оналарга тарқатилади.

Шу ўринда мамнуният билан қайд этиб ўтиш жоизки, Ўзбекистон Ёзувчилар уюшмаси ва «Ижод» жамоат фонди томонидан тайёрланган «Ким эдигу ким бўлдик» номли бадиий – публицистик тўплам ўқувчилар, журнадан, ёш китобхонлар кўлига бориб етди. Мұҳтарам Президентимизнинг «Ўзбекистон Республикаси давлат мустақиллигининг йигирма уч йиллик байрамига тайёргарлик кўриш ва уни ўтказиш тўғрисида»ги қарорида тарихан қисқа даврда биз қандай улкан ривожланиш йўлини босиб ўтганимизни баҳолашда «Ким эдигу ким бўлдик» деган ҳаётий ҳақиқатни асосий ва бош ғоя сифатида белгилаш лозимлиги алоҳида таъкидланган эди. Ушбу қарор эълон қилингач, Ёзувчилар уюшмасида айни шу ном остида китоб яратиш фикри пайдо бўлди. Ижодкорлардаги кутаринки руҳ ва катта иштиёқ туфайли мазкур тўплам дунёга келди. Дарҳақиқат, биз кеча ким эдиг-у, бугун ким бўлдик? Неча ўн йиллар мобайнида не-не тарихий шаҳарларимизнинг тор кўчалари-ю, одмигина биноларига кўзимиз кўнишиб қолганди. Яқин ўтмишдаги ҳаётимизга бир кур назар ташлаб, ҳозирги кун билан солиштирсан, юртимизда амалга оширилаётган улкан миқёсли испоҳотлар мазмун-моҳиятига эътибор қаратсан, бу саволларга жавоб топишими мумкин. Китобга киритилган бадиий-публицистик битикларда бугуннинг нафасини хис қиласиз. Замондошлар билан ҳамнафас, ҳамқадам бўласиз, уларнинг жасорат ва шуқроналикка лиммо-лим қиёфаларини кўрасиз. Айни пайтда бу китоб севимли фарзандларимизнинг "Мустақиллик дарслари" учун яна бир қўшимча манба бўлади, деган умиддамиз.

Бугун мамлакатимизда ёш авлоднинг қадди тик, ўй-мақсадлари улкан. Зоро, юксак эътибор ва ғамхўрлик уларни порлок келажак сари дадил интилишга қанотлантироқда. Қанот боғлаган орзулар эса кўзланган манзилни муносиб забт этиши шубҳасиз. Бу йил жаранглаган биринчи кўнгироқ мактаб бағридаги ҳар бир ўғил-қиз қалбидағи ана шундай интилишдан акс-садо берган бўлса ажабмас.



Икром ОТАМУРОД

# Ag Ақиб хонағонида

Ақиб хо Ақиб хонағонида  
Ақиб хонағонида



## КҮНГИЛ ТАРЖИМОНИ

Дашт ва кенглиқда ўсдим. Вояга етган қишлоғимнинг тўрт тарафи уфқларга тулашиб кетган дашт ва кенглик эди. Ана шу дашт, ана шу кенглик, ана шу уфқлар канглумга ўзим билмаган ҳавасларни, қандайдир ҳайратларни макон туттириди.

Болалик пайтимда, пешиндан кейин мактабдан қайтиб, даштда мол боқардим, кенгликка маҳлиё бўлиб узоқ-узоқ термулиб ўтирадим. Даштнинг бепоён осмонида қанот қоқиб, пириллаб учётган тўргайга, кўклам маҳали даштда бир муддатгина барг ёзиб, гуллайдиган қўзигулга интизор-интизор боқардим. Уларнинг ҳолати, уфқлар синоати канг-

лумда нималарнидир пайдо этарди. Қуёш нури даштни ва кенгликни gox порлатарди, gox қақратарди. Даштнинг ва кенгликнинг сукути, поёнсиз хаёлларимни доимо хаёлга уларди. Тасаввуримни синоатга бойларди.

Даштда бўй чўзган ботиний довуш кўтарарди, ўстирарди, кенгайтиради кенгликнинг зоҳирий бастин.

Дашт...

Кенглик...

Осмон билан замин бир-бираiga жудаям яқин.

Тулашиб кетган.

Айниқса,

эрта кўкламда,

Борлиқ мовий тусга ўранган маҳал.

Осмон мовий,

замин мовий.

Хаёл каби бепоён олам.

Мовий рангда болалик каби покизалик,  
бегуборлик мужассам.

Унга тўйиб-тўйиб термулардим.

Багрида қулочларимни ёйиб,  
тўрт тарафга юргургим келарди.

Узоқ!..

Уз-оқ!!

Уз-о-қ!!!

Мовий тус канглум тубига,  
унинг қат-қатига сингиб борардим,  
даштдан бошланиб,  
кенгликка уланиб,  
уфқларга тулашиб кетган тўқмоқлар каби.

Ана шу ҳайрат адабиётга муайян ихлосимни,  
қатъий эътиқодимни уйғотган...


...Мактабимизда катта кутубхона бўларди.

Халқ оғзаки ижоди: достонлар, эртаклар, афсоналар, ривоятлар, мақоллар, топишмоқлар жамланган китобларни, ижодкорларнинг насрый ҳамда назмий асарларини ўқувчилар бир-биримиздан қизғаниб басма-бас ўқирдик. Китоблар ситилиб-

Икром ОТАМУРОД



1951 йилда Касби туманида туғилган. ТошДУнинг журналистика факультетидага таҳсил олган. «Вақт ранглари», «Жануб қушлари», «Тўргайли манзиллар», «Уфқлар орти бепоён», «Рұхимнинг қайғуси», «Сен», «Канглум, ўзинг», «Таер» каби шеърий китоблари нашр этилган. «Ярадор умид отлари», «Узоқлашаётган оғриқ», «Сопол синиқлари», «Анинг умиди», «Харитага тушмаган жой», каби достонлар муаллифи. Ўзбек тилига М. Дарвиш, М. Бисуу, У. Утмен, П. Неруда, Ў. Сулаймон, Е. Евтушенко каби шоирларнинг асарларидан намуналар таржима қилган.



ситилиб, йиртилиб-йиртилиб кетарди. Китобларни боласидек қадрлаган, меҳри дайро кутубхоначи – Нортос хола малоллик қилмай, уринмай, зардоли дарахтининг танасидан сийрилган шилим билан қайта-қайта шилимлайверарди. Китобларни авайларди, эъзозларди.

Адабиёт муаллимим – Нурулло Ҳамроев шеър вазнлари борасида дарс ўтганида, дашт ва кенглиқда канглумда пайдо бўлган ҳайрат суратга йўналгандек бўлди:

Зангори-зангори даштлар қўйнида,  
хаёллари ширин-ширин,  
орзулари тиниқ-тиниқ  
бир бола,  
кўлларини боши остига қўйиб,  
термулади осмонга...

Инглиз шоири Уильям Блейкнинг шундай бир ибораси бор: “Мен дунёни қандай кўрсам, шундай чизаман”.

Бу, албатта, табиатнинг руҳиятдаги руҳий ҳолатини, руҳиятнинг табиатдаги табиий иқорорини пайдо қиласди. Табиат руҳиятнинг, руҳият табиатнинг ўюшиғи.

Мактабни битириб, Тошкент давлат университетининг журналистика факультетида ўқидим. Ўша пайтда, таржимашунос олим – Файбулла Саломов “Таржима кафедраси”нинг мудири эдилар. Канглумга далда бериб, мадад бўлгандар. Пойтахтда қолишимга имкон яратиб, ишга жойлаштиргандар. Сўзга бўлган ҳайратимга, сўзга бўлган ихлосимга меҳр билан қарагандар. Ўзлари сўзниңг эътиқодини қалбларига ҳам илмий маромда, ҳам тафаккур йўсинида муҳрлагандилар. Ҳақиқатданам: сўз – эътиқод, сўз – шакл, сўз – мантиқ, сўз – туйғу, сўз – тафаккур, сўз – моҳият. Ана шу асосда, сўзниңг имкони юксалиб, қадри кўтарилиб боради. Сабаби: сўз – бадииятнинг ҳам илдизи, ҳам жони, ҳам ўзаги. Шунинг учун имконим етгунча сўзни излайман, сўзга интиламан, сўзга эргашаман.

Аллома Фаридуддин Аттор сўзниңг синоати борасида шундай эътирофни қайд этганлар: “Икки оламнинг асоси сўздур, чунки сўз ҳақдин мужда


бўлиб келди. Ахир, арши аълода битилган “Лавҳи маҳфуз” (азалдан кўқда инсонларнинг яхши ва ёмон амаллари маҳфий сақланадиган Китоб) ҳам сўздир. Ҳамма нарса сўздан ижод этилган ва сўзга қайтади”.


Сўзга эътиқод кангулнинг Ҳақ боғичи. Тасаввур мўъжизалари кангулнинг ҳиссий миқёсини, тафаккурий жиҳатини ҳам ботиний, ҳам зоҳирий сирада рангин ҳолатларга йўғиради, тимсолий йўсингиларга йўналтиради, хаёлий идрокларга чоғиштиради. Шуни қандайдир ҳис қилган ҳолда, имконим етганча, қурбим келганча канглумга назар соламан, канглумга мурожаат қиласман:

Канглум, мендан бўлак киминг бор сенинг,  
Канглум, сендан бошқа менинг кимим бор?  
Не десам дегувчи ёлғизим менинг,  
Не айтсанг айтгувчи ўзинг хокисор...

Адабиёт – мўъжизавий силсила. Боғнинг дарахтлари, даштнинг гиёҳлари-ю қушлари, дайроннинг тўлқинлари, иқлиминг ҳавою манзаралари бир хил бўлмагани сингари адабиётнинг ҳам шаклдан тортиб, моҳиятигача турфа хил бўлиши табиий ҳол. Адабиётнинг бир парчаси бўлган шеърият борасида испан шоири Антонио Мачадо шундай мулоҳазани келтиради: “Шеърият – шоирнинг давр билан, даврнинг шоир билан сухбати”. Шоир ўз кузатувлари борасида хаёлининг мундарижасига мурожаат қиласди, қиёс топади. Мажозий мушоҳада топади. Ташбех, ранг, довуш муқоясаси асносида, сўзни кангулда макон топтиради.

Шундай бир таассурот, шундай бир қадр, шундай бир хотира борки, ҳар қандай элни, ҳар қандай





юртни ҳар доим фикр, мушоҳада, хусусан, сўз си-расида яратилган тафаккур билан туйғунинг уюшиқ ҳосиласи бўлмиш адабиёт кўтаради ҳамда кангулларда ва жугофий манзиллару маконларда доимий яшаттириб келади.

Фасллар алмашиб тургани каби, иқлим ўзгариб боргани сингари, тонгда қуёш чиқиб, пешинда тепага кўтарилиб, сўнг қиблага оққани мисол адабиёт ҳам гоҳ ривож топиб, гоҳ сукутга кетиб, гоҳ сусайгандек бўлиб бориши, табиий. Бундай тарз ҳеч қандай муаммони ҳосил қилмайди. Бу адабиётдаги ўзига хос танаффусга ўхшайди. Табиийки, бироз танаффусдан сўнг, яна жараён мезони бошланади. Ҳаракатга келади. Шунинг учун буни зинҳор муаммога йўналтирмай, табиий равишда қараш лозим.

Нима бўлишидан қатъий назар, ҳар бир жиҳатга, ҳар бир нарсага, ҳар бир маромга, ҳар бир ҳолга меҳр ҳамда мурувват, ихлос ҳамда эҳтиром билан эътибор берилса, яшайверади. Қаҳр ёки иддао, кибр ёки манфаат билан қаралса, бир лаҳзанинг ўзидаёқ, тафаккур ила туйғунинг қадри тамом бўлади. Айниқса, адабиётга ихлос кангулнинг маконидан жой олиб, унга беминнат қадр айласа, элнинг ўзлиги, юртнинг ғурури мустаҳкам равишда ўсиб, такомиллашиб бораверади.

Адабиёт – ҳар бир кангулнинг, ҳар бир элнинг, ҳар бир юртнинг ҳам сўзи, ҳам тарихи, ҳам жуғро-



фияси. Адабиётнинг яна бир хусусияти, Александр Блок айтганидек: “Адабиёт – руҳиятнинг таржимаи ҳоли”.

Адабиёт – учлик: қадим, бугун, эрта.

Қадим – тасаввур.

Бугун – кузатув.

Эрта – хаёл...

Хаёлимга яна дашт ва кенгликтинг соғинчи келади:

*Қашқадайро дашту кенглигига осмон бошин қўяди,  
Қошларини ё айлаб, юлдузлар келар яқин.*

*Лаблари тарс ёрилиб, офтоб жондан суюди,  
Қўзигуллар зулфига гулдор жигалар тақиб.*

*Кангулумга ҳарорат, тафт беради элас-элас,  
Гуруллаб ёниб, сўнган, олис гулханлар ҳили.  
Унда, менга қадрдан руҳга кўчган унум сас –  
Садоланиб сасланар, жовид тўрғайлар тили.*

*Тўрт томонга югурар, ҳансираб, аланг-жаланг,  
Тўриклар изи ботган ёлғизоёқ йўллар тим.  
Қад кериб полвонлардек, туради кўкси яланг,  
Бепоён бул маконлар, бепоёнлик ичра жим...*


*...Бир лаҳза қўй ўзимга, ўзлигим қувратини,  
Бир синоат сезгайман:*

*дашт, кенглик борин жойлаб.*

*Қашқадайро дашту кенглигин  
тўнғиган сувратини*

*Олиб юргайман кангулум меҳварида авайлаб...*





*Нази*  
*Нази*  
*Нази*  
*Нази*

Икром ОТАМУРОД

# Қангул сүкути ~ ўзингни таниши

\* \* \*

Ўзинг  
қанча яқин олганинг сайин,  
йироқлашиб борар,  
яқининг шунча.  
Канглунгда  
жовдираб тургайдир тайин,  
умид нигоҳларинг – қуриган гунча.

Барибир,  
сочасан аямай зинҳор,  
мехр жавҳарларин  
бор бўлса қанча.

Канглунгда яшаган мурувват зор-зор,  
канглунгни макон айлагай шунча...

\* \* \*

Мантиқ сусаймоқда,  
мантиқ қочмоқда,  
ўзин англаёлмай,  
ҳоли тандир қалб.  
Тобораким,  
алдов оғзин очмоқда,  
нафсга ружсу қўйган қулни этиб жалб.

Ботмон алдовларни қаърига жойлаб,  
кўзлар бир-бирига боқолмайди тик.  
Эътиқод руҳига дардини бойлаб,  
йўлларда юради қомати эгик.

Вақт ўтмоқда,  
эски ғалвирин титиб:  
тўқ донлар тўқилиб,  
сомон тиқатиқ.  
Ростнинг нолаларин ичига ютиб,  
алдовга чидолмай йиғлайди мантиқ...



\* \* \*

Пардани илгакка илдириб,  
деразани очаман.  
Қарагим  
келиб  
ташқарига.  
Ташқарида  
сарсон –  
изғиган гармсел  
ёпмоқчи бўлаверади деразани,  
ташқарига  
қарашибимга  
гаиланиб...

\* \* \*

Ҳайрон-ҳайрон қарайсан.  
Тавба.  
Канглунгда титрайди хўрсиниқ.  
Атрофингда гуж-гуж ёлгон ва  
панд беришлар санқийди лиқ-лиқ.

Үйдан чиқибоқ бошланади,  
бир-бирига таъна, иddaо.  
Чирпик домига ташланади  
илинжсга илинмайдиган муддао.

Манфаат нуқрасин тақади,  
ҳар томондан тақсимин йиғиб...  
...Жимжитгина сирқиб оқади,  
андишанинг кўзидан йиғи...

\* \* \*

Тўда-тўда булутлар  
чирмаб олган осмонни.  
Гўё,  
қаср қурублар,  
тунд айлаган тўрт ённи.



Түн – қоронегу,  
зимистон,  
чўқкалайди борлиқча.  
Юлдузларнинг бағри қон,  
илашмай ёругликка.

Ниқобин этиб парда  
булутлар  
тун юзини  
тўсса ҳам қилиб зарда...  
...Ой сузади кезиниб...


Баҳорми  
ёки  
қишида,  
ёзми,  
кузми,  
ҳойнаҳоӣ,  
булутлар тирқишидан  
нурин тўқаверар ой...

\* \* \*

...Булутлар тоғлари бирлашиб мудом  
Кўз ёшларин тўлдиради осмонда.  
Осмон –  
борлиқ узра тўнкарилган жом,  
сувлари тўқилиб борар ҳар ёнда.

Ихтиёрин олиб:  
эртами ё кеч,  
фарқи йўқдир:  
қай қунжлар,  
қай томонлар,  
булутлар тоғларин аямайин ҳеч,  
тирқиратиб улоқтирас шамоллар.

Шамоллар измида қурсоғу қурсоғ –  
булутлар тоғлари юлуқ аргамчи.  
Қай парчаси уммон мавжига мунчоғ,  
қай парчаси замин бағрига томчи...



\* \* \*

...Кангул сукуми –  
ӯзингни тании,  
ӯзингни йўқотии –  
кангул говури.

Қайсики,  
говурнинг ортидан чопии,  
сўндиригайдир тафтли сукум ҳовурин.

Кангул манзилига сур-сур оралаб,  
говурким,  
сукумга солади човии.  
Не бўлса-да,  
кангул излаб чоралар  
говурни тарқ этиб,  
сукумга қовии...

\* \* \*

Тонг ёриша бошлиши билан  
уйқудан уйғонар мавжудот.  
Жониворлар даштларга қўлам,  
кўкда қуилар қоқади қанот.

Шамъи тўқкан шуъласин йигиб,  
ої осмонга сингиб кетади.  
Юлдузлар пайдар-пай бор-йўғин  
тонгнинг йигимиға тутади.

Аямайди.  
Сочади.  
Гуллаб –  
жамбил,  
райҳон хушибўй ифорин.  
Тушларини умидга йўллаб,  
умидланар қалблар сифори...

...Фақат,  
тонгга солгай хавфу гард,  
тумицугини саншиб тақтақча,  
дуоибад бўлган жодугар –  
саси совуқ олашақшиақча...





# ҚАЛБ ГАВҲАРИ

Таниқли қорақалпоқ адаби Абдимурод Отажонов билан суҳбат

– Сиз узоқ йиллар мобайнида Қорақалпогистон матбуотида, газеталарида, адабиёт соҳасида раҳбарлик вазифаларда фаолият олиб бордиңиз. Шу билан бирга, республика ёзувчилар уюшмасининг топшириғига кўра, узоқ йиллар ёш адаб ва шоирлар, ҳаваскор қаламкашлар билан ишладингиз. Демоқчи эдимки, сўнгги эллик йиллар ичидаги қорақалпоқ адабиётидаги ҳар бир муҳим воқеа, «ярқ» этиб кўрингган номларнинг адабиётга кириб келиши сизнинг кўз ўнгингизда рўй берган. Айтинг-чи, Мустақиллик йилларида, янги замонда қорақалпоқ адабиётида қандай янгиликлар рўй берди, қандай асарлар (романлар, достонлар, драмалар) пайдо бўлди?

– Ёрқин сўзи билан инсонларни инсоф-диёнатга, меҳр-оқибатга, кенгфеълийкка чорлаб, ҳалқнинг идрок-тафаккурини ўзгаришишга, янгилашга, ёш авлоднинг тарбиясига улуш кўшиб келаётган қорақалпоқ адаблари ҳам ўтиш даврининг қийинчиликларга дуч келди. Улар мустақиллик берган улуғ эркинлик билан мўл-кўл имкониятлардан ўз ижодларида самарали фойдаланмоқдалар. Шеър ва достонлар, қисса ва романлар, драмалар ёзмоқда, ҳалқнинг қалбидаги орзу-

тилакларга жон бағишламоқда. Энг қувонарлиси, бундай эзгу ишни Ўзбекистон Қаҳрамони, Ўзбекистон ва Қорақалпогистон халқ шоири Ибройим Юсупов бошлаб берди. Катта оқсоқолимизнинг изидан келаётган кейинги авлод шоирлари Тўлибой Қобулов (мархум), Кенгесбой Каримов, Жиянбой Избосканов, Халилла Давлатназаров, Минайхон Жуманазарова, Набийра Тўрешова каби ижодкорларимиз янги замонанинг белга қувват, жонга роҳат, туйғуларга жасорат бағишлаган эркинликларини кўтариинки руҳ билан куйладилар.

Шеъриятда ибрат йўлини улуғ оқсоқол ижодкоримиз бошлаб бергани каби, насрда ҳам мустақиллик даври карвонини яна бир оқсоқол адабимиз – Ўзбекистон Қаҳрамони, Ўзбекистон ва Қорақалпогистон халқ ёзувчиси Тўлепберген Қаипбергенов бошлаб берди. Унинг “Қорақалпоқман. Таваккалчиман” асари (2003 йил) қорақалпоқ адабиётида жаңр хусусиятлари, кўлами, шакли, мазмуний жиҳатлари билан янгилик бўлди.

Адаб Қипшақбой Матмуродов тарихий фактларга асосланиб ёзган “Тебранмас” романида ўтган даврларда қорақалпоқ юритида эл бирлигини сақлашга интилган уламолар, оч ҳалққа ғамхўрлик, меҳр кўрсатган бадавлат одамлар (масалан, асар қаҳрамони Лепесбой), элни одил бошқарган бийларнинг образларини яратди. Асарда эски замонлардаги тарихий ҳақиқат ёритиб берилганлиги, ҳалқнинг миллий қадриятлари улуғланганлиги ўқувчи ёдида қолади. Муротбой Низановнинг “Охират уйқуси” қиссасини, Олланазар Абдиевнинг “Алвастилар уяси”, Кенгесбой Каримовнинг “Оғабий”, Шарап Уснатдиновнинг “Шоирнинг ёшлиги” романларини ҳам янги давр мағкураси асосида ёзилган кучли асарлар сирасига киритиш мумкин. Адабиётимизда янгилик сифатида тилга олиш мумкин бўлган воқелик – бу, мустақиллик даврида адабаларимизнинг ҳам катта насрда ўз кучларини синаб кўраётганингидир.


– Ёш истеъдодларининг камолга етишида устозларнинг беминнат хизмати муҳим ўрин тулади. Қорақалпоқ адабиётидаги катта устозлар ҳақида нима дея оласиз? Уларнинг ижодингизга кўшган ҳиссаси ҳақида?

– Қорақалпоқ адабиётида азиз ва ардоқли устоз Ибройим Юсуповнинг ёш истеъдодларни излаб топиш, ижод оламига бошлаб кириш, уни ўстириш, бақувват ва азим чинорга айлантиришда ёшуллилик ҳамда фуқаролик хизмати алоҳида бўлганлигини бизлар биламиз. Битта мисол: менинг бир қиссаларни 1972 йил қорақалпоқ қиссалари тўпламида чоп этилди (F.Фулом

Абдимурод  
ОТАЖОНОВ



Таниқли қорақалпоқ адаби. 1940 йилда таваллуд топған. Нукус давлат педагогика институтининг филология факультетини тамомлаған. Кўплаб ҳикоялар ва қиссалар муаллифи. Асарлари кўпгина тилларга таржима қилинганд. Ўзбекистонда хизмат кўрсатган маданият ходими.



номидаги бадиий адабиёт ва санъат нашриёти, Тошкент). Ваҳоланки, ўшанда асарнинг ўзи қорақалпоқ тилида чиқмаган эди. Устозимнинг “бир асарингни Тошкентга ташлаб келдим, ўзбек тилида китоб бўлиб чиқади”, – деган сўзларини умрим бўйи унутмайман. Мен кўпинча бу воқеани ёш ёзувчилар билан бўлган сұхбатларда мисол тариқасида келтираман. Ёзувчи Сапарбой оға Солиеv ҳам талай-талай ўшларнинг камолга етишида, уларнинг асарларини “пишириш”да, нашрга тайёрлашда, камчиликларини тузатиш, зиёд ўринларини қисқартиришда, қисқаси, асарни сифатида тайёрлаб, ўкувчи кўлига етказиша унтилмас хизматлар қилди. “Олтмишинчи йиллар авлоди” деб ном олган авлод вакилларининг кўпчилиги мана шу устозлар етовида адабиётга кириб келдилар, ижод қилдилар, халқа танилдилар.

Хозирги пайтда давлатимизнинг ўзи истеъодларни танлаш, вояга етказиш, уларнинг асарларини халқа танитишда алоҳида ғамхўрлик қилмоқда. Турли танловлар, ўшларга мўлжалланган семинарларнинг мунтазам ўтказилиши, ёзувчилар уюшмасининг бу борада олиб бораётган ишлари – истеъодларни излаб топиш, уларнинг ижод қилиши учун кенг имкониятлар яратиб беришда жуда муҳим тадбирлардан ҳисобланади. Шулар натижасида адаби шоирларимиз қатори янги-янги истеъодлар билан тўлиб бормоқда.

– **Мен яқинда «Талант тулпорини миниб» номли китобингизни ўқиб чиқдим. Унда 20 га яқин ижодкор (шоир, адаб, болалар шоирлари, журналист-ижодкорлар)нинг ҳаёти, асарлари, ижодга кириб келиши ҳақида ҳикоя қилгансиз. Мана шу китоб мутолааси таассуротларидан келиб чиққан ҳолда сўрамоқчиман: сиз тилга олиб ўтган ижодкорларнинг қорақалпоқ адабиётидаги ўрни ва улар ижодининг аҳамияти борасида гапириб берсангиз.**

– Бу китоб факат адиллар, шоирлар, адабиётшунослар, журналист-ижодкорлар биографияси ёки уларнинг ижоди ҳақидаги фикрлардан иборат эмас. Ундаги мақола, эссе, тақризларда умуман ёзувчилик тақдири, касби, ижод ва ижодкор ҳақидаги кузатишларимни жамладим ва уларни муайян бир ижодкорнинг биографияси, асарлари қаторига сингдириб юборган ҳолда баён қилдим. Шунинг учун ҳам мазкур китоб ўкувчиларда ижод ва маҳорат сирлари борасида янги бир йўналиш, янги бир гап каби қабул қилинди, яхши таассурот қолдириди. Сабаби – мен бу асаримда меҳнати ялтираб кўриниб қолган танқидчиларнинг ҳам “насибасига кўл солиб”, уларнинг вазифаларини ҳам ҳаминқадар бажаришга юраксиндим. Китобда асосан ҳаётдан ўтиб кетган адиллар, шоирлар ҳақида гап боради. Мен уларнинг адабиётимиз олдида хизматларини айтиб, тарих учун, келажак авлод учун эсда қолиши лозим бўлган ғамхўрлик, одамийлик хислатларини ёдга олиб қўйишини мақсад қилдим. Уларнинг асл инсоний қиёфаларини ўзим билган, кўрган, гувоҳи бўлган воқеалар мисолида қоғозга туширдим ва бу меҳнатларим қорақалпоқ адабиётida илгари кўрилмаган, жаңр жиҳатидан ўзгача бўлган тўпламни вужудга келтириди. Энг кувонарлиси шу бўлдики, ушбу китоб ҳақида ҳали адабиётшуносларимиз тиш ёриб, бирор оғиз гап қилмаганлари билан, адабиёт муҳлислари, ўқитувчилар, зиёли қавм китоб ҳақида ижобий фикрлар билдира бошладилар.

Қорақалпоғистон халқ ёзувчиси, муҳтарам адабиётимиз Хўжабек Сеитов Ёзувчилар уюшмасини бошқарган йилларида янги истеъодларни излаб топиш, уларни

адабиёт майдонига, ижод оламига олиб кириш масалаларига жуда катта эътибор берар эдилар. Биргина мисол келтириб ўтаман. Ички ишлар соҳасида ишлаб юрган Айтбой Бекимбоев исмли милиция ходими хизмат пайтида жароҳатланиб, тўшакка михланиб қолади. Айтбой оға – уруш қатнашчиси, бунинг устига у яхшигина қаламкаш ҳам эди. Қалами ўткир милиционернинг ўйда ётиб қолганидан хабар топган Хўжабек оға уни излаб бориб, кўнглини кўтаради, ижодга ундейди, хукуматга ва ижтимоий-тъъминот вазирлигига хат ёзиб, Айтбой оғанинг ижод қилиши, яшаши, тириклиги учун шароитлар яратилишига кўмаклашади. Натижада Айтбой Бекимбоев тўшакда ётган жойида ўнлаб ҳикоя ва қиссалар яратди, бобомиз Беруний ҳақида роман ёди, қорақалпоқ адабиётida детектив асарлар жанрига асос солди, “Сирли излар изидан” қиссаси учун эса Бердақ номидаги давлат мукофотининг лауреати бўлди. Менинг мазкур китобимда Хўжабек оға ҳақидаям, фидойи адаб Айтбой Бекимбетов ҳақидаям эсдаликлар ўрин олган.

Филология фанлари доктори, профессор, атоқли танқидчи Кўнисбой Камолов – қорақалпоқ адабиётida худди Озод Шарафиддинов, Матёкуб Кўшжоновлар каби танқидчилар қилган хизматларни бажара олган адабиётшунос эди. Шунингдек, Фалим оға Сейтназаров ҳам менга тенгдош бўлган бир гурух ёш ижодкорларнинг адабиёт оламига кириб келишида беминнат хизмат қилган. Китобимда шулар каби 20 га ёвуқ ижодкорнинг ҳаёти, ижоди, асарлари ҳақида ҳикоя қилишига ҳаракат қилганман.

– **Ўзингизнинг ижодга кириб келишингиз қандай кечган?**

– Кулгили бўлса ҳам айтай, мен болалигимда “ёзувчи” деган сўзни ҳам эшитмаган эдим. Бизнинг авлодга мансуб болалар – яъни уруш йилларидан кейинги – эллигинчи йиллар ўкувчилари мактабда дарсликдан бошқа китобни кўрмаганмиз. Ўқисак факат дарслик китоблардаги бадиий асарларни ўқирдик, холос. Бир куни (тўртинчи синфда ўқирдик) ўқитувчимиз Қалбой оға Алланиёзов дарс пайтида тўсатдан: “Отажонов, сен ёзувчи бўласан, сендан ёзувчи чиқади!” – деб юборди гап орасида. Ўзимча ўйладим, ўтган дарсдаги адабий асарнинг мазмунини яхши гапириб бердим, шундан кувониб кетгани учун муаллим менга “ёзувчи бўласан”, – деворди-ёв. Ёзувчилар нима иш қиласи экан? Буни билмасдим, албатта муаллимдан сўрашга қисиндим.

У пайтларда қорақалпоқ ёзувчиларининг китобларини чироқ ёкиб ҳам излаб тополмайсан. Яхшиям кутубхона деган жой бор экан, у ерда қозоқ, рус, ўзбек тилида чиққан китоблар бор экан, барини бир чеккадан олиб ўқийвердим.

Етти йиллик мактабни тамомладим. Техникумда ўқий бошладим. Шу кунларда ўқитувчимизнинг “ёзувчи бўласан” деган сўзи тинчимни бузиб, қани, мен ҳам ёзиб кўрай-чи, деган фикрга берилдим. Ўлаб-ўлаб, “Эркатой” деган пьеса ёздим ўзимча. Бу менинг атак-чечак қилиб ёзган биринчи асарим эди. 1961 йилда “Этик” деб номланган биринчи ҳикоям “Жеткиншек” газетасида эълон қилинди. Кейинчалик шу ҳикоям дарсликларга киритилди. Шундай қилиб, қадрдан муаллимим айтган, тахмин қилган гапнинг амалга ошиши бошланди. 1973 йил “Қорақалпоғистон” нашриётида болаларга атalgan “Мен ҳам гул экаман” деган ярим босма тобоқча юпқа китобим чиқди. 1976 йил “Дутор” деб номланган ҳикоялар тўпламим нашрдан чиқди. Ёш ёзувчи сифати-

да энди анча танилиб қолган эдим. 1978 йил ёзувчилар уюшмасига аъзоликка қабул қилиндим.

Менга мана шундай ғамхўрлик кўрсатиб, ижодими илк қадамимдан бошлаб то “мева бера бошлагунича” кузатиб-тузатиб келган қадрдон устозим Сапарбой Солиевдир. Унинг тўғрисўзлиги, шогирдларга меҳрибонлиги учун ҳам “устоз” деб салом берардим, ҳурмат-иззат қиласдим.

Олтмишинчи йилларда мен билан қорақалпок адабиётига бир гуруҳ истеъодлар тўлқиндай кириб кепди. Шовдирбой Сеитов, Узоқбой Пиржонов, Кўнисбой Камолов, Улмамбет Хўжаназаров, Тўлепберген Матмуродов, Камол Мамбетов, Кенгесбой Раҳмонов, Сидабулла Пиржоновлар – ўша олтмишинчи йиллар авлодига мансуб эди. Агар “бу авлод қорақалпок адабиёти учун қандай ўзига хос хизмат қилди?” деб сўралса, мен шундай деб жавоб берган бўлар эдим: “Қорақалпок адабиётида Сайфулғабит Мажидов, Аббос Дабилов, Жўлмирза Оймирзяев, Содик Нуримбетов, Дали Назбергенов, Избосар Фазилов, Аяберган Мусаевлар адабиётимиз тарихини бошлаб бердилар. Улардан кейин Ибройим Юсупов ва Тўлепберган Қаипбергенов ҳамда уларга тенгдош ижодкорлар турмушни бўрттирмай, бўямай тасвирлаш ҳадисини адабиётга олиб кирди, новаторларча, фидойиларча хизмат қилди. “Олтмишинчи йиллар авлоди” эса ҳаётни бор мураккаблиги билан тасвирловчи, психологизмга асосланган асарлар ёзиб, қорақалпок адабиётини янги босқичга кўтарди”.

**– Умуман истеъодод нима? Истеъододни камолга етказиш билангина чекланадиган бўлинса, истеъододли одамларнинг тирикчилиги нима бўлади?**

– Истеъодод – ҳаётий ёзувчилик тажрибам асосида хулосалаб айтадиган бўлсан, одамларнинг ҳаммасига эмас, алоҳида бир шахсларга Яратганинг ўзи ёрлақаб берадиган совғаси. Ҳалқ буни содда қилиб “тўғма истеъодод” деб атайди. Тўғма истеъодод кўпроқ шоирларга берилади. Тангри совғаси – истеъододи бўлган ёзувчилар эса сабр-тоқати, чидами, ўқиб-изланиб бориши, яъни меҳнати туфайлигина ҳақиқий истеъододини такомилга етказади. Шундагина унинг истеъододини ҳалқ тан олади. Демак, истеъодод – илоҳий совға, уни тарбиялаб такомилга етказсанг – баҳтингнинг чопгани, сўндириб кўйсанг – ўз уволинг ўзингга. Ёзувчи ўқишини, изланишини, ёзишини умрининг охирги нафасигача тўхтатмаслиги керак. Ижодда тўхтаб қолиш, танаффус бўлса – бундай аҳволда, худди иқтисодиётдаги таназзул каби, ижодий таназзул бошланади. Ёзувчи ана шу ижодий таназзулнинг етовига тушиб қолса, чиқиб олиши жуда мураккаб кечади. Адабиётда бундай ҳодиса кўп учраган.

**– Ижодкор, унинг маҳсулоти – китоб, китобхон. Мана шу учбурчак муаммоси ҳозирги пайтга келиб ижодкор шахс олдидо шу даражада кўндаланг туриб олганки, агар бу муаммо ҳал қилинmas экан, яқин йиллар ичida адабиёт фани, маънавият, тарбия масалалари жиддий талофот кўриши ҳеч гап эмас. Ваҳоланки, улуғ Абдулла Авлоний айтгани каби, тарбия – ҳаёт-мамом масаласидир.**

– Ижодкор, унинг маҳсулоти ва китобхон бир бутунликка бирикиб, битта куйни чала олсалар, яхши. Энди шу орада, уларнинг бирикмасига “китоб дўкони” деган тушунчани ҳам кўшиб, ёзувчининг манфаатини ҳам ўйлаш, таъминлаш зарурати аллақачонлар туғилган. Агарда мана шу аҳамиятли ва зарур масала ижобий

ҳал қилинмас экан, келажак эгасини – тафаккурли, билимли, ҳар томонлама етук авлодни тарбиялаймиз деган чиройли ниятларимиз қуруқ сўз, қуруқ шиор бўлиб қолаверади, мактабларда ўқитиладиган адабиёт фанида, маънавий тарбия масаласида қийин вазият пайдо бўлиши турган гап. Ёш авлод тарбиясидаги бўшлиқ, эътиборсизлик вақти келиб ўзининг заарли жиҳатларини ошкор этиб қўяди, жамиятнинг ривожланишига акс таъсирини ўтказа бошлайди. Ана шундагина Абдулла Авлонийнинг юқоридаги олтин сўзларининг гавҳар маъноларини тушуна бошласак керак. Афсуски, тушунган пайтимизда жуда кеч бўлади.

Хозир Қорақалпоғистоннинг Нукус шаҳридаги аввалги китоб дўконларининг бирортаси ишламайди. Китобхонлар китоб дўконларини изламайди. Марказий бозордаги ёйма бозордан китоб қидирадилар. Барибир ёйма дўконларда икки-уч муаллифнинггина асарларини топиш мумкин. Амали “тош кесадиган”, сўзи ўтадиган наҳангларнинг ёстиқдай китоблари маҳкамаларга оғзаки “разнарядка” билан топширилади. Шундай қилиб, кўлдан ясалган юзаки вазиятлар сабаб, китоб ҳақиқий ўкувчининг кўлига бориб етмайди. Мен мана шу вазиятларни тўла-тўқис баён қилиб “Китоб дўкони қайдадир?” деган мақола ёзган эдим. Мақолада китоб сотиши, китоб дўконларининг ишини ташкил этиш ҳақида жўяли фикр-мулоҳазалар, тавсиялар бор эди. Бу борада бир пайтлар тўғри қарор қабул қилинганилиги (Қорақалпоғистон Республикаси Вазирлар Маҳкамасининг “Қорақалпоғистон Республикаси Ёзувчилар уюшмаси ёнида “Ижод” фондини тузиш ҳақида”ги қарори), унинг II бандида шаҳар ва туман ҳокимларига: шаҳар ва туман марказларида ҳамда йирик аҳоли пунктларида замонавий китоб дўконларини ташкил этиш, уларни янги адабиётлар билан мунтазам таъминлаш мақсадида тегишли маблағлар ажратиш ҳақида гаплар бор эди. Афсуски, мақоладаги ўша ўринлар қисқартирилиб, улар ўрнида Ўзбекистон ҳалқ шоири Сирожиддин Сайиддининг “китоб сотиб олинг” мазмунидаги икки банд шеъри берилди. Китоб сотиб олиш ҳақидағи чақирикларга мен ҳам қўшиламан, жон биродарлар, лекин, гўзал ва навқирон Нукус шаҳримизда аввало китоб сотиб оладиган дўконнинг ўзи бўлмаса, китобхон китобни қаердан сотиб олади?

Менинг шу узук-юлуқ мақолам таъсир қилдими, ҳар ҳолда Амет Шомуродов кўчасидаги “Глобус” китоб дўкони ёпиб ташланди-ю, таъмирлаш ишлари бошланди. Қувониб юрдим. Бир куни китоб дўконига кириб, тўхтаб қолдим. Китоблар кўринмайди! Тўрда эса одамлар овқатланиб ўтириби. Ошхона ходимидан “китоб дўкони қани?” деб сўрасам, ўнг томондаги муюлиш ерни кўрсатди. Дўконни ўша ерга – бир бурчакка тикиб қўйишибди! Шуми китобга ҳурмат? Ёзувчига ҳурмат? Сўнг яна бир келсан – ошхона ҳам, китоб дўкони ҳам ёпилибди. Ана холос! Ҳозир “Глобус” деб ёзилган жойнинг бўёклари кўчиб, одамнинг раҳмини келтириб туриби. Китобларнинг аҳволи ундан-да баттардир, ким билади. Мана шундай аҳволлар баён қилинган мақолам аёвсиз қисқартирилиб, таъсир кучи йўқолди, қарорнинг бажарилишига фойдаси ҳам тегмади.

Энди китоб ўкувчиси ҳақидағи фикрга тўхталайлик. Болалар адабиётини ўқимай, баҳра олмай ўсган бола улғайганида катталарап адабиётини ҳам ўқимайди. Шунинг учун боланинг китоб ўқиш одатини кичкиналигидан шакллантириб бориш лозим. Болаларнинг бадиий ада-



биётга бўлган қизиқини орттириб бориш, талабини қаноатлантириш – катталарнинг вазифасидир.

Боланинг китоб ўқигиси келди, дейлик. Ота-она сидан “китоб олиб беринг” деб илтимос ҳам қилди. Китоб сотадиган дўкон эса йўқ. Шунда, ота-она китобни қаердан топади? Мана шу вазиятнинг ўзи, арзимайдиган бўлиб кўринса ҳам, китобнинг эгасини топиб боришига, болага эстетик завқ беришига, маънавий-рухий озука бўлишдай эзгу вазифани бажаришига монеълик қиласди.

Яна бир мулоҳаза. Болалар китоб билан етарли даражада таъмин этилмаса, бу ҳаётий масалага бозор муносабати талабларидан келиб чиқиб қарайверсак – китоб ўқимайдиганлар сонининг ошишига йўл қўйган бўламиз. Натижаси эса ўз-ўзидан маълум.

Уйларимиз хон саройидан қолишмайди, олтин-кумуш, биллур буюмларимиз ер-жаҳонга сифмайди. Баъзиларнинг ҳовлиларида беш-олтиталаб машина бор. Шундай тўлиб-тошиб яшаётган хонадонда, минг афсус-надоматларким, бир дона китоб топилмайди! Ҳа, аҳвол мана шундай. Ижодкор – китоб дўкони – ўқувчини биринтирадиган занжир узилган. Менинг фикримча, китобхон хонадонларнинг танловини, хонадонлардаги оилавий кутубхоналар танловларини ўтказибми, қандайдир бир йўлларини топиб, китобхонлар сонини кўпайтирмасак, Ўзбекистонимиз халқини китобхон халқа, Юртбошимиз айтганларидай, маънавияти юксак халқа айлантирмасак – аҳвол бундан-да ёмонлашиб бораверади.

**– Мустақиллик даврида бошқа халқлар ҳаётини, тилини, маданиятини ўрганиши масалалари ҳам чуқур аҳамият касб этиб келаётур. Қорақалпоқ таржимонлари фаолияти нималарни айти оласиз?**

– Мана шу саволингизга жавоб бериш учун қорақалпоқ адабиётидаги таржима тарихига ниҳоятда қисқа ракурс ясад, қуидагиларни айтиб ўтсан дегандим. Бизлар мактабда ўқиб юрган пайтларимизда ҳазрат Алишер Навоийнинг “Фарҳод ва Ширин” дostonидан парчани фақат дарслиқдагина ўқиган эдик. Пушкиннинг “Капитан қизи” қиссасидан парча ҳам бор эди дарслиқда. Ўтган асрнинг ўттизинчи-қирқинчи йилларида ёзувчиларимизнинг кўпчилиги таржима иши билан шуғулланганлар. Бери кепавергандা, М.Идирисов, Ж.Қўйжетеров, Ҳ.Жумашев, Д.Айтмуродовлар рус, ўзбек, қозоқ адилларининг асарларини маҳорат билан қорақалпоқчага ағдаргандар.

Тилакка қарши, шу кунларда қорақалпоқ адабиётида таржима масаласи қийин вазиятга тушиб қолди. Ҳар иили шоирлар султони Алишер Навоийнинг, шоҳ ва шоир Захириддин Муҳаммад Бобурнинг туғилган кунлари мактабларда, коллеж-лицейларда, олий ўқув юртларида катта тантаналар билан ўтказилади. Шундай тантаналарда шоир Абилқосим ўтепбергеновнига Навоий ҳазратнинг ғазалларидан янги таржималарини ўқиди, холос. Менинг кузатишмача, бугунги кунда қорақалпоқ адабиётида таржима билан махсус шуғулланиб юрган ёзувчи йўқ. Қанча моҳир таржимон бўлганлигига қарамасдан баъзи ижодкорлар таржимага кўл урмайди. Мехнати куйиб кетишини билади. Сўнгги пайтларда Чингиз Айтматовнинг “Кассандра

тамғаси” романини ёзувчи Алписбой Султонов билан пединститут ўқитувчиси Қозоқбой Сапаровлар қорақалпоқ тилига таржима қилишиди. Романдан парчалар “Амударё” журналининг 2009 йилги уч-тўрт сонида эълон қилинди.

**– Юртбошимиз қорақалпоқ халқининг маданиятини, санъатини, бу юртдан етишиб чиқкан истеъдод эгаларини ғоят қадрлашини, севишини кўп таъкидлайдилар. Ўзбек халқи қорақалпоқ санъати билан, адабиёт намуналари билан мунтазам равишида танишиб боришини кўпчилик қатори мен ҳам истар эдим. Тошкентда Қорақалпогистон санъати ва адабиёти кунлари ўтказилганига ҳам ўн ўйлардан ошиб қолди. Адабиётлар, маданиятлар ўртасидаги алоқаларнинг мустақкамланиши – келажак учун, халқларимиз учун хизмат қилади, шундай эмасми?**

– Баракалла. Гап халқлар дўстлиги борасида кетар экан, қуидаги фикрларни айтиб ўтиши хоҳлар эдим: ўзингиз биласиз, шу йил ёзда мен Тошкентдаги “Дўрмон” ижод уйида дам олдим. Дўрмон ботининг гўзаллигига, оромбахш-илҳомбахшлигига сўз йўқ! Текис-равон йўл бўйидаги солланган оқ болдирили тераклар бу муқаддас ҳудудга келаётганларни ўзларининг сулув қоматлари билан тўйдиради. Ижод ботининг дарвозаси олдида чорвоқда неча йилларнинг гувоҳлари, неча инсонларга сирдош бўлган чинорлар сени қадрдонинг каби кутиб олади. Шундай хуш-мулойим, гўзал маконда, илҳом парилари маскан тутган жойда қалам тебратиб, оқ қофоз юзига сўз айтмоқнинг ўзи бир роҳат. Мен дам олиш билан бирга, аввалдан ёзиб юрган катта асаримни яна давом эттиридим, бир неча газета-журналга бориб, ижодий сұхбатларда бўлдим.

Бизнинг қорақалпоқлик ёзувчилар ҳурматли оқсоқолимиз Носир Фозиловни ўзларининг ёзувчиси деб билади. Унинг “Қорҳат” деган қиссаси қаҳрамонлари қорақалпоқ болалари бўлгани учун, бу қисса ҳали сиёхи қуримасданоқ қорақалпоқ тилига таржима қилинган эди. Биз – қорақалпоқ адиллари, Носир оғанинг шу қиссасини ўзимиз учун дарслик китобдай билиб мутолаа қилганимиз. Устознинг Қорақалпогистонда ҳам мухлислари, дўстлари кўп. Мен ҳам бир қиссасини қорақалпоқ тилига ўғирганман. Бу сафар ўшулли билан яқиндан танишдим. Унинг ўз оғиздан “қорақалпоқлардан сира ёрдамимни аямайман” деган ёқимли сўзини эшитдим. Бу – ўзбек оғанинг қорақалпоқ инисига бўлган чин, асл сўзи – икрори эди. Дўрмон – мана шундай, ёзувчиларни топиширадиган, дўстлаширадиган, қадрдан қилиб кўядиган муқаддас маъво. Мана шу жаннатдай жойда мен яна бир оқсоқол билан танишдим. Бу оқсоқол Муҳаммаджон Хайруллаев. Юртимга қайтаётган пайтда мен уларга ўз тилимда “Хуш қолинглар, қадрдонларим”, деган бўлсам-да, ичимда: “Хайрлашмайман, азизларим, яқинда яна келаман. Худо хоҳласа, келиб инилик саломимни бераман”, деган тилак сайраб-тошқинланиб турди. Шундай қилиб, “Дўрмон” ижод уйидан олам-жаҳон қувонч, тоғ-тоғ таассуротлар билан қайтдим. Сиз айтгандай, маданият кунлари, дийдор кунлари амалга ошиб, шу азиз дўстлар, устозлар билан яна учрашсам – бундан ортиқ баҳт бўладими дунёда?



# ЕТТИНЧИ БЎРДОҚИ

## Ҳикоя

Янги даврнинг иссиқ-совуқ шабадалари бошланғич синф ўқитувчиси Салтанат ва туман майший хизмат кўрсатиш комбинатининг рассоми Мўминжон Қобиловлар хонадонининг у бурчагидан бунисига ўтиб, катта-кичик гирдобрлар ҳосил қилди, оила аъзоларининг режаю орзуларини ҳазон каби тўзитиб, дилларига гулғула солди. Режа, орзу деймиз-у, аслида ўтган замонларда бу хил одамнинг кўкайига дохил тушуниклар бўлмаган экан ҳисоби.

Нафсиламри, ҳар доимги бир хил машғулот: бир йўлақдан ишга бориб, яна шу йўлақдан уйга қайтиш, неча йиллардан бери ёд бўлиб кетган гапларни ўқувчилик хотирига жойлаш учун етти марта қайнабқорилиш; дам олиш кунлари яганаю ўтоқ, дағал хашак йиғиш, терим кампанияларида колхозга ҳашарга чиқиши... бари-барчаси тўрт нафар ака-ука ичидан тантекроқ ўсган Салтанатни роса чарчатган эди. Шу боис ўтиш даври қийинчилклари баҳонасида чорак асрлик ишини канда қилиб, бозорга чиқиб кетди. Узоқ



Файзулла САЛАЕВ



1950 йилда Хоразм вилоятининг Гурлан туманида туғилган. ТошДУ (ҳозирги ЎзМУ)нинг журналистика факультетини тамомлаган.

Филология фанлари номзоди. Бердақ номидаги Қорақалпоқ давлат университети ўзбек филологияси кафедраси доценти.

«Қайтинг, булбуллар» номли китоби нашр этилган.

кентдаги кўтара бозордан майдо-чуйда олиб, чакана налаб сотишни касб қилиб олди. Табиатан тили ширин, истараси иссиқина эмасми, қаршисидан ўтган харидорни бўш юбормасди. Ёқимли муомала билан мижознинг бағри-дилига кириб, ҳатто растасида йўқ молни ҳам пулларди – буюртма оларди.

Натижа ёмон бўлмади: икки йилда буюмлар бозорида доимий ўринга эга бўлди; яна икки йилдан сўнг ҳайҳотдай магазини молга тўлди; тағин бир йил ўтиб, уйдаги «Жигули» ўрнини замонавий русумли машина эгаллади. Бозорда, маҳалла-кўйда Салтанатнинг нуфузи ошди. Тўй-маъракада тўрроқдан ўрин тегадиган бўлди...

Марказдаги машҳур рассомлик ўқув юртини битирган Мўминжон хотини олдида бироз хижолат бўлиб қолди. Хотини бозорни танлаганида роса қаршилик кўрсатган Мўмин замона зайлар билан бутунлай ишсиз қолди.



У ўша йиллар ўзини омадли санаради. Рўзгор юмушларига кўлини ҳам урмас, барчаси хотини гарданида эди. Кунини устахонада ўтказарди. Кинофикация буюртмаси билан суратли афишалар чизар, колхоз-совхоз ва бошқа ташкилотлар учун турли хил шиор ва плакатлар тайёрларди. Бўш қолгудек бўлса, устахонани ичкаридан беркитиб, «ижод»га шўнғир – теварак-жавонибдаги машхурлар портретини мойбўёқда чизиб, эгасига пулларди. «Ижод»га ургу берадётганимиз – Мўминжон портретлар учун манша ўрнида қаҳрамоннинг фотосуратидан фойдаланаарди. Шунга қарамай, унинг суратлари анча жонли чиқар, уларда киши сажиясидаги муҳим хислатлар манаман деб бўртиб туради.

Замон билан бирга одамлар ҳам ўзгарапкан. Кинотомошибинлар кескин камайди. Клублар ҳувиллаб қолгач, афишага буюртма ҳам тўхтади. Кўлда чизилган портретлар ўрнини истаган ўлчамда тезкор тайёрланадиган рангли фотолар эгаллади. Аслида санъат асари – мойбўёқ қаёдаю ҳиссиз техника самари фото қайда? Аммо буни тушунадиган дид, фаросат қани?! Шундай қилиб, тумандаги биринчи рақамли рассом Мўминжон қўлида гулдай ҳунари билан бекор қолди. Юрагидаги ижод аҳлига хос ёниқлик сўниб улгурмаган Мўминжон учун ишсизликнинг илк кунлари тошойна вазифасини бажарди, унга қараб, ўзини таниб олишга интилди.

Донишларга менгзаб, ярим юмилган муштини иягига тираб, тафаккур отига миниб, умри сарҳадларини айланни бўксга, ҳунарли бўлиб, иш бошлаганидан бери ҳеч қандай иш қилолмабди (пул топиш, болача қортириш, ҳовли-жой ва машинани истиснолаганда)... Эҳ-хей, орзулари осмондай эди. Орзулашга ҳадди сиғарди. Гуруҳида, ҳатто ўқув юритида ўз ўрни бор эди. Ҳали эскиз даражасидаги машқлари ҳам ўқитувчи-устозлар дикқатини тортарди, мунозараларга сабаб бўларди. Тугалланган асарлари ўрни кўргазмалар тўрида эди (албатта, сўз талабалар кўргазмаси ҳақида боряпти). Мўминжон Қобилов ижодининг илк даврига мансуб «Софинч» деб номланган бир мойбўёқ портрет ҳали-ҳануз билим юртига кираверишдаги суратлар орасида осиглиқ турибди...

Афсус, энди булар бари ўтмиш, хотира...

Ўшанда устозлар ўғитига кўниб, ўқиши-изланишни давом эттирганда балки бу ахволга тушмаган бўлармиди... Мўминжон узок мушоҳададан сўнг жилла курса бирор буюртма оларман деган илинжда Рассомлар уюшмасининг вилоят бўлимига бош урди. Уюшмага аъзо эмаслигини юзига солишиб, тузукроқ қабул ҳам қилишмади...

Нима қилсин, икки невараага андармон бўлиб юраверсинми? Хотини қаватига кирайин деса, савдони умуман жини сўймайди. Сотиш у ёқда турсин, шу кунгача ўзи ёки болалари учун пайпоқ ҳам харид қилмаган. Қурилиш, дехқончиликка эса, бўйин ёр бермайди. Умрида бирор жисмоний иш қилганини эслолмайди...

Салтанатга бариб, бу мавзуда гап қўзғалса, «гулларга боғбон, уйга қоровул ҳам керак-ку», – деб маъноли кулади.

Ўғил, келин ва икки невара – олти жондан иборат бу оиласда ҳамма нарса етарли эди. Етарлигина эмас,

ортиқча. Уйда ҳафта десак лоф бўлар-у, ой сайин бирор янги жиҳоз пайдо бўларди. Одам бўйли совутгич, экранига кулоч етмайдиган телевизор, ёзда совутиб, қишида иситадиган алламбало техникалар олинди. Бу хил ашёлар «қишлоқча» уйга ярашмаслиги рўйач қилиниб, хоналар «евротаъмир»дан чиқарилди...

Бекорчилик, қолаверса, вақт сайин сотувдаги моллари ва ўйдаги жиҳозларга мутаносиб равища димоги ўсаётган хотинига боқиманда бўлиб қолаётгани алам қиларди Мўминжонга...

Кунларнинг бирида Салтанат янги гап топиб келди: кейинги пайтда одамлар бойиётганмиш; шу сабаб ҳеч ким гўштсиз овқат емасмиш; гўштнинг қимматлашаётгани шунданмиш...

– Бунинг менга қандай даҳли бор? – сабрсизланди Мўминжон.

– Даҳли бўлгани учун айтяпман, – деди Салтанат овозига жиддий оҳанг бериб. – Ҳўқиз, аникроғи, бўрдоқи боқасиз! Бекорчиликдан тўйдим деб, жонимдан тўйдирдингиз-ку...

– Шу-шу, шапалоқдек ҳовлида-я?..

– Бердисини эшитинг! Ҳовлининг оёғидан эшик очиб, молхона қурамиз. Кўкаламзорлаштиришга қолдирилган зонада. Раҳбарлар ишлайман деган одам бўлса, добро беряпти. Ҳокимликка бориб, ўзим олиб бераман рухсатни сизга...

Мўминжонни тер босди. Хонтахтадаги чойнакдан пиёлага совук чой қуиди, босиб-босиб ҳўплаганича жим қолди. Салтанат сўзида давом этди:

– Молнинг зоти яхши бўлса, ўт-еми етиб турса, кунига бир килодан семирамиши...

Хотини миёсида масалани роса пиширган шекилли, аввалги буромаду кейинги даромадни ипидан игнасиғача ҳисоблаб, эри олдига дастурхондай ёзди.

– Буғалтир бўп кет-еъ, – деди ниҳоят Мўмин. – Бунинг барини мен қиламанми?! – Мўминнинг товушда ҳадик ва зарда аралаш эди.

– Бошқа ким, менми? – деди Салтанат илкисдан, кейин юмшаб, кўшиб кўйди, – улгурмасангиз, мояна бериб, одам ёллаймиз... Қолаверса, молхонани модерн – замонавий қилиб қурамиз. У ерда одам ишлаб чарчамайди, завқ олади...

Кейин хотини бармоқларини ишга солиб ҳисобга кўчди. Мўминжон хотинининг бир гапига тушунса, иккинчисини англамай тинглади. Хотини:

– Гўнганиям сотамиз, бир машина гўнг юз минг сўм! Кунжара еган мол гўнги янада қимматроқ. Ўн бўрдоқи ойига бир арава ўғит беради.., – деганида чидай олмади:

– Нима қиласан шунча пулни, нима етишмаяпти сенга?! – деди овозини баландлатиб.

– Ё, алҳазар! Ё, тавба!.. Кунига миллион топаётган одамдай гапиришини қарант! Пулни нима қилишини билмайдиган одам ҳам бор экан бу замонда...

Мўмин хотинига бир ўқрайди-да, тортмадан сигарет олиб, ҳовлига йўналди...

– Тавба, шунақаям одам бўларкан, пулни нима қиласанни билмайдиган одам ҳам бор экан бу замонда...

Салтанат бу гапни ўзича айтган бўлди. Лекин қия очиқ эшик орқали гап эгасига етди. Мўминжон ёнди-

рилган сигаретни эзғилаб, ток тагига отди. Уни хотини биринчи марта сенсирамоқда эди...

Хуллас, икки ҳафта ўтиб-ўтмай ҳовли ташида Салтанат айтмоқчи «модерн» молхона пайдо бўлди. Узунаси ҳовли билан баробар молхона уч бўлак эди. Ем-хашак учун мўлжалланган қисм икки қават қилиб қурилди: пасти кунжара, омикта, кепак каби емишлар учун; иккинчи қават хашак учун. Иккинчи қаватнинг бир бурчидаги хашак майдалайдиган электр ускуна. У ҳар қандай дағал ўтни, ҳатто ғўзапоя, чучукмия каби қаттиқ хашакларни куунга айлантириб беради. Иккинчи бўлма ошхона вазифасини ўтарди. Бу ерга ғиштин ўчоқ қурилиб, катта дошқозон ўрнатилди. Қозонга емхонадан нов орқали хашак кууни оқиб тушади. Арапашма молларга пиширилиб берилса, юқимли бўлармиш. Учинчи бўлма – моллар учун хона, аломатхонанинг ўзи. Деворнинг одам бўйичалик қисми бетондан куйилган. Бўрдоқи новвосларга ғиштин девор дош беролмасмиш. Хона етти бўрдоқига мўлжалланган, ҳайвонлар ораси кўкрақдан келадиган бетон тўсиқ билан ажратилган. Тўсиқлар ораси бир мол базўр ётиб-турладиган даражада тор. Демак, ортиқча ҳаракат қилмайди – ёғ бойлайди. Моллар бир-бирини кўрмайди, безовталанмайди – семиради. Хона ичи ним қоронғи. Зулматда ҳайвон тезроқ эт тўплармиш. Олд томондаги охур ҳам, орқа тарафдаги најас оқадиган нов ҳам бетондан бежирим қилиб ишланган. Қалин тахтадан нишаброқ қилиб ясалган, полига линолеум тўшалган. Бу жой айни пайтда моллар учун душхона ҳам эди. Молхонадан чиққан ахлату ювинди ён тарафдан қазилган сиғими юз кублик маҳсус ҳовузга тўпланади...

Мўминжон хотинининг анойилардан эмаслигини моллар келтирилган куни билди. Моллар у ўйлагандек маҳаллий бозордан эмас, қўшни тумандаги бўрдоқичилик фермасидан келтирилганди. Туман ветеринария амбулаторияси бош дўхтири Зариф заргар ўринбосари билан, етти аждодининг касбини бегона қилмай, икки ўғлига ўргатаётган Матёқуб қассоб бир боласи билан, молхона қурилишида ишбошилик қилган собық прораб Ҳожи кал ва шогирдлари шу ерда ҳозиру нозир бўлишди. Ёшлар катталар назорати остида новвосларни машинадан туширишиб, ўринларига занжирбанд қилдилар. Буқачалар еттига эмас, олтита эди. Фермада бори шу экан... Улар қадди-басти бир-биридан кўркам, узун беллик, зотдор бўрдоқилар эди.

Бу кун яқин ўтмишда тамойил бўлган семинар-кўрикка ӯхшаб кетди. Ускуналар ишга туширилди, кун салқин бўлишига қарамай, бўрдоқилар чўмилтирилди. Молларга бериладиган озуқа рациони, озиқлантириладиган вақтлар аникланди. Дарвоқе, чўмилтириш асносида қизик ҳодиса рўй берди: Мўминжон охирги – еттинчи бўш ўриндаги сачратқич тагига бориб, жўмракни беркитишга уннаётганида Ҳожи кал электр моторни кўшиб юборди; бўрдоқилар қатори уй эгаси ҳам «чўмилди» – усти-боши шалаббо бўлди. Молхона эркаклар кулгисидан портлади.

– Мана, еттинчи бўрдоқи ҳам топилди, – деди Зариф заргар ўзини кулгидан базўр тўхтатиб.

Мўминжон дўхтирнинг ҳазил-мазахини эшитмадими ёки эшитмаганга олдими, барчага қўшилиб холади. Тўнганидан елкасини қисиб, уйи томон чопди. Кейин бу ўзига хос тадбир уйда – бир пиёла чой устида давом этди.

– Чорва етти хазинанинг бири, – томоқ қирди Зариф заргар, лиммо-лим тўлдирилган биллур қадаҳни қўлига оларкан, – Салтанат, Мўминжон, зап иш бошладингизлар. Сарф қилинган харажат ҳар олти ойда икки баробар бўй қайтмаса – мен кафил!.. Оғил классний қурилган. Ҳоживойга раҳмат! Бироқ кичкина... Майли старт учун етарли. Кейин кенгайтираве-расизлар. Менимча, бугун буюк бир ишга қўл урилди – «Мўмин Қобил» бўрдоқичилик фермасига асос солинди. Ҳа, айтгандай, фермани рўйхатдан ўтказиши маслаҳат бераман. Налоги арзимас, ҳатто аввалги уч йилда сариқ чақа ҳам тўламайсиз, менимча. За то емни ўз баҳосидан оласиз!.. Шу қадаҳни «Мўмин Қобил» фермасининг, тўғрироғи, бўрдоқичилик комплексининг келажаги учун кўтарамиз!.. – Заргар паймонасини бир ҳўплашда бўшатди. – Қани, олинглар, Ҳоживой, Салтанат, олинглар! Мўмин, тумовлаб қоласан, ол, қолдирмай о!..

Шу йўсун мехмонлар ўз билғанларича маслаҳат беришди. Ёрдамларини аямасликларини ургулашди...

Мўминни эрта саҳар Салтанат уйғотди:

– Ҳов, ҳўжайин, турсинлар! Қулғингизда кана инлаганими?! Бўкиришапти буқалар, қўшилардан уялинг, туринг, ул-бул беринг!.. Хотини устидан кўрпани сидириб ташлади. – Хурмачага қараб ичадилар, кечака учиб қолдингиз!.. Кечки овқатини Тиркаш берди, нимани тушунади шу эркатойингиз, қайси емдан қанча берди, ёлғиз Худога аён...

Мўминжон ўрнида ўтирганича керишиб, кийина бошлиди. Хотини жаврашини тўхтатмади:

– Бу боришида мени хонавайрон қиласиз. Тамом, бундан кейин бир томчи ҳам ичмайсиз!..

– Бўпти, биз учун ҳам ўzlари ичаверсинглар, – кесатди Мўмин.

– Вой-вой-эй! Шугина ичганим кўрина қолдими, уялинг-ей! Ичганда сўзим бузилмаса... Ҳозир-чи, ҳамма ичади.

– Тўғри, сўзинг бузилмади, бироқ кўзинг сузилди!..

– Нима, нима дедингиз?! Сиз ҳалиям мастсиз. Тузалинг, бу мавзуда сиз билан айрича гаплашаман!.. – ўшқирди хотини.


– Ўчир-эй! Намунча бақирасан, болалардан уялсанг бўларди!..

– Сиз уялинг! Фариштадай жуфти ҳалолини «кўз сузди»га чиқариб ўтирган...

– Ҳа, эркаклар билан бўкканича ичишадиган фаришта!.. – Мўмин яна нимадир демоқчи бўлди-ю, сўз тополмади, қўлларини ҳавога кўтариб, асабий силкитди, бошини чангллаганича хонани тарк этди...

Бу даҳанаки жанг Салтанатнинг эр хоҳиш-иродасига қарамай мактабдаги ишини қўйиб, бозорга чиққанидаёқ орага тушган деворнинг ошкор бўй кўрсатиши эди.

Эр-хотинни қўшчи ҳўқизларга ӯхшатишиди. Икакалови бир маромда ҳаракат қилмаса, позна издан



чиқади. Ҳўқизлар истаги ўз йўлига. Ер гоҳида қаттиқ, баъзан тошлоқ, баъзида ботқоқ. Омочни текис тортиш осонмас. Бундай пайтда ҳўқизлар айбни бирбиридан излайдилар.

Мўминжон боққа чиққач босиб-босиб сигарет тортаркан, бугунги сан-маннни бу хил можароларга ўхшатмади. «Нима бўляпти ўзи, Салтанатга не бўлди? Наҳотки, кўлга кирган арзимас даромад – бир сиким лаънати амиркон пул шунчалик кудратли бўлса, чорак асрлик (муҳаббатни кўятурайлик) оилавий ришталарни кунпаякун қилишга қодир бўлса?! У қандай жодуки, Салтанатдай тобланган, ахлоқ-одобдан сабоқ берган одамни ҳам ўз нағмасига ўйнатса?.. Ҳа, ўйнатяпти... Бу ёғи не бўлди?.. Наҳотки, барига алвидо?! Наҳотки, бу ёғи сарсон-саргардонлик?.. Йўқ, ҳеч бир куч мени неварапаримдан айирломмайди!.. Қолаверса, мен даҳо эмасман, элкезарлик уларнинг иши!..» Мўминнинг хаёлини хотинининг овози бузди:

– Намунча тортмасангиз ўша заҳри қотилни! Юринг, хабар олайлик новвосжонларингиздан!..

Тавба, хотини кулиб турарди. Орадан ҳеч гап ўтмагандай... Бу яхшилик аломатими ёки... Балки ўша жодунинг сехридир?..

Мўмин елка қисиб қўйиб, хотинига эргашди.

Тиркаш ёки келини бўлса керак, емни қайнатиб қўйишган экан. Хашак майдалаб, аралаштиришди, маҳсус металл супага ёйиб, совугач молларга тақсимлашди. Суғориши, тагларини тозалашди. Мўминжон кўзларига ишонмасди. Салтанатнинг ҳаракатлари бир умр оғилда ишлаб келаётган чорвадорни эслатарди. «Хабар олиш» бир яrim соатча давом этди.

– Кейинроқ электр бўлмай қолиши мумкин, тушлигига бир бункер ҳашак майдаланг!.. Ем билан аралаштириб, оловни пастроқ қилиб қўйсангиз ҳам бўлаверади. Мен кетдим. Нонушта тайёрлайман. Кўнгиллари нима тусайди? Қўймоқ қилайми ёки... Айтмоқчи, кечагилардан илитаман, – деди хотини пешонасидағи терни сидириб.

– Биласан-ку, мен эрталаб ҳеч нарса емайман. Бир пиёла чой!..

– Емасдингиз, энди ейсиз! Емаснгиз бу ишларга яраб бўпсиз!.. – деди Салтанат овозига нозли оҳанг бериб, – қайси емдан қанча қўшишни биласиз-а? Мен кетдим...

Нонушта устида ҳам хотини ўзини жуда меҳрибон кўрсатди. Ҳатто бош оғриқа элликта қуйиб берди. Мўминнинг қитмирилиги тутиди:

– Бирга ичамиз! – деди.

– Нималар деяпсиз, пиёнистага чиқаринг-а, индамаган сайин!..

– Ҳа энди, сиз ҳамма билан ичавермайсиз-да...

Кейинги гап хотинига ёмон ботди. Шахт келиб, Мўминнинг қадаҳига чант солди.

– Ичсам, сизни, шу ҳўжалик – оиламни деб ичдим. Билдингизми?! Сиз билан... шунчалар зарур бўлса! – Салтанат биллур жомни бир кўтаришда бўшатди.

Мўмин анграйиб қолди: у ўзининг кўзу қулокларига ишонмасди.

Наҳотки, шу аёл чорак асрлик ёсдиқдоши Салтанат бўлса? Одам бошқа бирорвга эврилиши учун

қанча вақт керак? Бир неча йилми ёки бирор соат етарлим? Йўқ, вақт бузмайди инсонни! Уни пул бузади, салтанатлар айтмиш «кўк»и бузади...

– Шу билан кўнглингиз жойига тушдими? Мана, энди олинг! – Хотини кўзларини айёrona сувганича кулиб, эрига қадаҳ сунди. Мўмин қадаҳни қўлига олди. Иккиланмай хотинининг юзи-кўзи аралаш баркут халат ёқасидан «M»га менгзаб кўриниб турган кўкрагита сепди. Бўш қадаҳ стол устидаги бошқа идишларга тегиб, жаранг берди, чил-чил синиб, тўрт тарафга сочилиди...

Воажаб, Салтанат яна қилиқ кўрсатди – лом-мим демади. Юзини сочиқ билан артиб, дастурхонни тартибга келтирди. Шиша синиқларини терди, ликопчага солиб, соллана чиқиб кетди... Ўн дақиқача ўтгач хона эшигини қия очиб:

– Дадаси, мен кетдим, – деди негадир жилмайиб, – истасангиз буфетда очиги бор!..

Салтанатдаги лоқайдликка ўхшаш кайф Мўминга ҳам ўта бошлаганди. Индамади. Гўё эшитмади...

– Буёғига Тиркашнинг ўзи ташийди болаларини боғчага. Сизнинг молдан бўлак ишингиз йўқ. Унутманг – озуқа вақтида берилсагина семиради... Молларни сизга, сизни Яратганга топширдим. Яхши қолинг!..

Эшик ёпилгач Мўмин оҳиста ух тортди. Буфет олдига бориб, кетма-кет икки қадаҳ кўтарди, газагига сигарет тутатиб, ўзини оромкурсига ташлади...

«Эҳ, дунёи кажрав, эй, бевафо фалак! Айт, не ёзигим бор эди менинг?! Тўғри, хотинимни вақтида бозордан қайтара олмадим. Юганини устига ташлаб кўйдим... Айбим – мўмин-қобиллигимми! Дарвоқе, мўмин-қобиллик айбми, ожизлики эркак киши учун?!..»

Мўмин роппа-роса тўқиз яримда уйғонди. Айни ем вақти. Қозондан олиб совутгунча ўн бўлади. Оғил томон шошилди. Унинг қўли ишдаю, хаёлини эрталабки можаро бир зум тарк этмасди. Ўйлана-ўйлана яна мўминлигига борди.

«Салтанатни ҳам тушуниши керакка ўхшайди. Ўзи айтмоқчи, барини шу хонадон деб қиляпти, бояқиш. Эрталаб оғилдаги ҳаракати-чи, бир эркақдай ишлади-я... Ароқни юзига сепсан ҳам миқ этмади. Сал оширвормадимми ишқилиб!..»

...Кун кетидан кун ўтиб, ёз ҳам бошланди. Мўминнинг наввослари янги шароитга мослашиб, иштаҳаси карнай бўлиб кетди. Бу орада Салтанат янги гап топиб келди. Табиий шароитда ўсган кўк ўтлар бўрдоқилар учун айни дармондорилар манбаи саналиб, озуқа бирлиги жуда кучли бўлармиш. Буни ҳафта-ўн кунда моллардан хабар олиб турган Зариф заргар ҳам таъкидлади.

Хуллас, янги русумдаги машина тепасига чертак ўрнатилди. Мўмин ҳар куни бир марта – соат ўнданги ем билан тушлик оралигига Сувлиққа қатнайдиган бўлди. Сувлиқ ўн беш чақиримча келадиган дарё яқинидаги шоли экиладиган массив. Чел-чебиру марза, ариқ-зовур ёқаларида ўт мўмай – қамиш, буғдоийқ, курмагу ғумайлар одам бўйи ўсисиб ётиди. Бироқ бу ерда ҳар қарич ернинг эгаси бор. Ўзбекнинг танишибилишга эгиладиган одати яхши-да. Мўминнинг йўлини ҳеч ким тўсмайди. Энг қиммат ва кўркам машинада ўтга қатнайдиган бу бойвачча молбоқарни

ҳамма танийди, сийлашади. Ҳатто мавридини топиб, ҳол-аҳвол сўрашади, молларини суриштиришади. У истаган жойидан хоҳлаганича ўт ўриши мумкин...

Хўқизлар иштаҳаси очилиб, ишнинг кўпайиб бораётгани Салтанатни зарра қизиқтирмас, у ҳар кечқурун бирров молларни кўздан кечирар, эри ишларини маъқуллаб, алқарди. Эрига эътибор уйда ҳам ўзгарганди. Хўқизлар каби Мўминнинг ҳам рациони яхшилтаниб борар, илгарилари фақат меҳмон келганда очиладиган сархил ичимликлар сақланадиган буфет сари йўлакда доимо яшил чироқ порларди.

Мўмин тақдиридан нолимай қўйди. У бўрдоқчилик билан боғлиқ ишларни атрофдагиларнинг ҳавасини келтирас даражада сидқидилдан, фавқулодда бир ғайрат билан бажарар, чарчоққа бўй бермасди. Қарийб ҳамма вақтини молхонада ўтказар, ҳар битта мол билан «тиллашар»ди. Ҳар куни бир марта еттинчи ўринда бўрдоқилар қатори чўмиларди. Мўмин молларга яқинлашган сари одамлардан йироқлашиб борарди. Буни ўтган якшанбада ўзи ҳам сезиб қолди. Новвосларга тушки емни бераётганди. Орқа томонидаги йўлакда кўлларида бир сиқимдан ўт билан юрган неваралари – Санжар ва Севарага кўзи тушди. Фазаб билан ўшқири:

– Хей, шайтонлар!.. Ким чақирди сизларни бу ерга? Йўқолларинг! – бақиргани етмагандек кўлидаги паншаха билан ўдағайлади. – Кетинг бу ердан!..

Бундай пўписани умрида эшитмаган Санжар кўзлари ола-кула бўлиб, туриб қолди. Кичкинтои эса бўш келмади:

– Бобо, шайтонмашмиз, бизлаймиз. Иннайкейин, ашта айтшангизам кетавиямиз... – деди киприклари ни пирприратиб.

Мўмин тошдай қотди. Ўзига келиб, болалар томон айланиб ўтди. «Салом!» дэя чўзган қўлига болалар кафтларини жимгина теккизиши. Мўмин Севарани кўтариб олди. Бўрдоқиларнинг олд томонига олиб ўтди.

– Ўтни молларнинг бош томонидан келиб бериш керак. У ёғидан келсанглар, тепвориши мумкин. Мен шундан кўркиб... бақирдим сизларга!.. – деди бобо узроҳхлик қилгандек...

Ўйга қайтаётганида опичидаги Севаранинг:

– Бобо, нега шиздан молдинг ийши келади? – дэя сўрагани баридан ошиб тушди. Мўмин жавоб беролмай қолди. Томогига алланарса тиқилиб, кўзи намланди... «Йигляяпман. Демак, одамман, ҳали ҳайвонга айланмабман. Инсонман!..»

– Бобо, нега йиғляяпшиз? Хўкижлай хафа қилдими шизди?..

– Кўзим оғрияпти, қизим! Мол ҳам хафа қиладими одамни...

Тушлика тортилган қалампирдўлмадан келини кўнгли учунгина totindи. Ишком тагидаги сўрига чўзилиб, хаёл дengизига ғарқ бўлди.

«Кеча ким эдим?

Бугун кимман?

Эртага кимга айланаман?»

Новвослар олингандан бўён неваралари билан мундок бир кўнгилочар сухбат қурмабди ёки шаҳарга тушмабди. Маҳалла-кўй ва қариндошлардаги тўй-

ҳашам, маърака-мажлисга ҳам чиқмабди, ўғли Тиркашни жўнатибди. Китоб у ёқда турсин, бирор газета ҳам ўқимабди...

Мол эгасига ўхшамаса ўлармиш. Эҳтимол бу гапда жон бордир. Аммо эгаси молига ўхшаши ҳам тайин шекилли... Илгари Мўминга илҳом бағишлаган яшил қири далалар, атлас билан ранг талашадиган қамишзорлар бугун унинг кўзига битмас-туғанмас озуқа манбаи бўлиб кўринади. Қараб ўтхўр ҳайвон сингари ютинади... «Зарур техниканг, куч-кудратинг бўлсаю барини ўриб, ғарам қилсанг... Юз, минглаб бўрдоқи боқсанг...» дэя орзулайди.

Бас, етар! Шу бугун Салтанатнинг олдида масалани кўндаланг қўяди: ё ишли ёлланади; ёинки бўрдоқилар гўштга топширилади; ёки мольберту мўйқалам, бўёқларини олганича «ҳойю-ҳуйт!» – (Алвидо, Салтанат! Салом, Илҳом париси!). Қисқаси, пайкон тифи этдан ўтди, суякка етди!..

Шундай хаёллар билан пинакка кетган Мўмин ем берар вақт бўлганда дастурлаштирилган роботдай сапчиб ўрнидан турди. Молкўра томон шошди. Оғилга кириб, дошқозонда «биқ-биқ» қайнаётган омиҳта ем ҳидидан сармаст бўлиб, боши айланди, ютинди. Ғайрат ва ишииёқ билан ишга шўнғиди. У бўрдоқилар оҳурига пиширилган емни чепаклаб қуишиб чиққандан кейин ҳам моллар атрофида парвона бўлди – баданларига ёпишган хас-чўпларни терди, махсус тароқ билан қашлади, ягринларини енгил шапатилаб, эркалади. Силаб-сийпалаш, эркалашлар молларга хуш ёқарди, ҳатто ейишни тўхтатиб, керилганича туриб берарди. Мўмин ҳар битта бўрдоқининг овқатланишини дикқат билан кузатар, бундан ўзида ширин бир лаззат ва ҳузур турди. Озиқлантириш тугагач молларни чўмилтириди, ўзи ҳам еттинчи ўринда ювинди... Ўйга қайтаётib яна сўрига чўзилди. Узоқ мушоҳададан сўнг қарорга келди: «Мен – одам эмасман!..»

Шу куни Салтанат ишдан вақтироқ қайтди. Ёлланма машинада қўйни-қўнжи лиқ тўла – бир неча елим халта майда-чўйда, қутичаларда сархил ширинлик, мева-чева, қовун-тарвуз билан келди. Аллақанча катта-кичик, ранго-ранг идишларда иссик-салқин дегандай ичимликлар ҳам бор эди.


– Болалар бир яирашсин, дедим, дадаси. Ёз – пишиқчилик ўтиб боряпти.

– Ҳа, еб-ичганлари яхши, аммо булар... – шиша-ларга ишора қилди Мўмин.

– Заргарнинг вилоятдан келган меҳмони бор экан. Бўрдоқчилик бўйича олиммиш. Кафе-мафеда чой ичириб юбораверсан ҳам бўларди-ю, новвосларни бир кўрсинг дедим... Ҳар қалай мутахассис, билгич бўлади...

Мўмин хотинининг орқаланиб келиши боисини англаандай бўлди, бироқ Зариф заргарнинг меҳмонига нима учун чой ичириши кераклигини тушунмади. Аммо тилига чиқармади. Елка қисиб, қўлларини ёзганича «Майли, қаршимасман» ишорасини қилди.

Меҳмонлар молларнинг кечки овқати пайтида келишиди. Улар уч киши эди – марказлик олим, заргар ва унинг муовини. Олим дегани ўтган йили номзод бўлган мол дўхтири экан. Электр ёруғида молларни



кўздан кечирган бўлишди. Рацион билан қизиқиши. Молхонада ҳам, дастурхон устида ҳам новвослар яхши боқилаётгани айтилди. Эгалари шаънига олқишилар ёғдирилди.

– Қобилият, талант дегани битта бўлади. Кимга ато қилинса, ўша одам қайси ишга қўл урса, уни гуллатади. Рассомчилик қиласими, артистчиликми, мол боқадими, қатый назар, шу соҳанинг пешравига айланади, – дея қадаҳ сўзи бошлади Зариф заргар. – Мўминжон шундай талантли инсон. Ўтган уч ой унинг учун ўрганиш даври бўлди. У туманимизда тенги ўйқ рассомгина эмас, бўрдоқичилик устаси эканлигини ҳам исботлади. Ўзларинг кўрдинглар, уч ой бадалида ҳар битта новвос камида йигирма-йигирма беш фоиз эт тўплаган. Бу бир йилда икки баробар фойда дегани эмасми. Менимча, ферма фаолиятини кенгайтириш даври келди. Етти мол боқдинг нима, етмиш мол боқдинг нима!.. Тўғри, бу хил зотли мол ҳозир вилоятда ўйқ. Лекин довоннинг нарёғи – кўшниларда бор. Фақат букачалар олиб келмай, сигирлар ҳам келтириб, уларни ўзларимиз кўпайтиришимиз керак. Мўминжон, биринчи охурдаги қора новвосингиз зўр экан, отини «Зулук» дедингизми, уни уруф учун асраш керак... – Зариф заргар сўзи охирида ўтган сафардагидек «Мўмин Қобил» бўрдоқичилик комплексининг келажаги учун қадаҳ кўтаришни таклиф этди...

Бир қўлида қадаҳ билан нотиқ оғзини пойлаган Мўмин афтини бужмайтирди, бўш қўли билан пешонасини икки бор оҳиста шапатилади. Буни ҳеч ким сезмади...

Мазкур тилак ва таклифлар уддабуро Салтанат юрагида бир ҳафталардан кейин акс садо берди. Бир оқшом уйқу олдидан гап бошлади:

– Дадаси, рўзгору бозордаги ишларимиз зўр!..  
Бундан ортиги бўлмайди.

– Хўш, энди ўтга вертолётда қатнаймизми?..

– Аввал тинглаб олинг! – деди Салтанат жилмайиб ва хитойи тун кийимдаги бўлиқ вужудини кўз-кўз қилгандек қилпанглаб келиб, эри елкасига қўлини ташлади. – Ўзингиз сезавермайсиз, новвосларингиз ҳам бўйига, ҳам энига ўсяпти... Ҳар бири ўртача бир ярим кўшди дейлик. Бу ойига уч «лимон» дегани эмасми? Гап олтига новвос ҳақида боряпти. Улар йигирма, ўттиз, заргар айтгандек, етмиш бўлса-чи, биз ким бўламиз?! Бир тасаввур қилинг, икки-уч йил ўтиб... балки миллиардер!..

Салтанат лоқайдгина ўтирган эрини бўйнидан кучиб, юзига юзини кўйди. Мўмин жилмайганича:

– «Миллиардер»нинг олдига «мульти»ни кўшгин, – дея хотинининг белига қўл солди...

...Оромкурсида ястанганича тафаккурининг ҳорғин оти жиловини яна кўйворди.

Асли бу хотин одам боласимас. Жодугарнинг ўзгинаси. Нима гапи бўлса кўндиради. Аммо ўзи бирон сўзга кўнмайди. Доимо шунаقا. Қизлигидан бери... Шу қилиғи сабаб тўйлари ҳам қишнинг қора совуғида, ота уйининг ёзлик айвонида пальто-пўстинларга ўранган-чирманган ҳолда ўтган. Аммо-лекин яхши ўтган. Жўралари анча вақтгача айтиб юриши: «Юракда мухаббат ўти гуркираб турганида ўттиз даражалик совуқ нима бўпти. Буни Мўмин амалда исботлади». Аслида Салтанат исботлаганди...

Шундай... Мўмин ҳар сафар минг битта раддия далил билан уни у ёки бу йўлдан қайтаришни дилига туғиб, гап бошлайди. Иккинчи гапга бормай тили тутилиб, инон-ихтиёрини йўқотади, масала Салтанат фойдасига ҳал бўлади. Шундай бўлгач баҳс-мунозарадан не манфаат... Жодугар, жодугар... Аммо ажойиб хотин!..

Мўминнинг хаёлини ёнгинасига келиб, соchlарига тартиб берадиган хотини овози бузди:

– Ўн саккиз яшар йигитдай намунча хаёл сурасиз? Туринг, ювиниб чиққунингизча асалли чой тайёрлайман!..

Гапнинг индаллоси асалли чой устида айтилди. Етти хосиятли сон эмиш. Оғилдаги еттинчи ўриннинг бўш туриши яхшилик аломати эмасмиш... Хуллас, Мўминжон еттинчи бўрдоқи учун индинга – шанба куни саҳарлаб довон ошиб кетадиган бўлди. Бу юриш ўзига хос разведкамиш. Қўшни вилоятдагилар бўрдоқиларини қандай боқишишти, ўрганиб қайтармиш. Туёқ сонини яна кўпайтиргудек бўлишса, қаердан ва кимдан олиш кераклигини билиб келармиш.

Салтанат ўрнидан туриб, чеккадаги стол ғаладонидан буклоғлик идора қофозини келтирди.

– Мана, ҳаммаси ёзилган. Довон ошилгач биринчи кент – Жўшбулоққа яқин экан. Катта трассадан эмас, тоғ ёқалаб ўнг томонга ўн беш чақирим юрилса бўлди экан. Қир устида шундай кўриниб турганмиш. Турдибой ота. Телефони мана, ёзилган. Фермасининг номи ҳам шунаقا – «Турдибой ота». Нархини айтмабди. Ўша пайтда келишармиш. Кўкартириб қўйдим, савдолашасиз...

Мўмин қофозга кўз югуртириди. Унда қаламда чизилган йўл тарҳи ва телефон рақамидан бўлак ҳеч нарса ўйқ эди.

– Телефонини соткангизга кўчиринг, бўлди. Суришириб ҳам топасиз. Бир тоғлик юз чақирим доирадаги тоғликни танирмиш. Қолаверса, Турдибой ота машхур одам...

Хайдовчи Мўминнинг тенгкури, жуда сўзамол йигит экан. Тумандаги йўл идорасида йигирма йил «ЗИЛ» ҳайдабди. Узоқ Шарқдаги икки йиллик ҳарбий хизматни ҳам «барабан товлаб» ўтказган экан. Йўл идорасида иш ўринлари қисқаргач мана шу бортли «УАЗик»ни сотиб олиб, тириклик қилаётган экан. Ўз касбини жонидан ортиқ севармиш. Қайси машинани ҳайдаса, «гуллатиб» кўярмиш, куш каби учирармиш... Ўзини Самад деб таништирган бу йигит довонгача бўлган уч соатлик йўл давомида бирон танаффусиз гапирди. Биринчи мұхаббатидан бошлаб, оиласио ака-ука, опа-сингиллари ҳақида берилмаган маълумот қолмади. Сўнгра гап мавзууси бўрдоқичилик баҳонасида Мўминнинг оиласи ва ҳаётига кўчаётганида яхшиямки довон бошланди. Миктидан келган бу «сайроқи» йигит негадир Мўминнинг дилига ўтирамади. Сўзу ҳаракатлари ясама, носамимий тююлаверди. Биринчи учрашуваёқ шунчалик тўкилиб-сочилиши сабабини тушунолмади.

Довон пойида машинани тўхтатган «ИПХ» ходими хужжатларни текшираркан:

– Янгими, ака? – сўради машинага ишора қилиб.

– Қайда буларнинг янгиси, йигирма бешда, йигит ёшида! – деди Самад мамнуният ва виқор билан.

Сўнг Мўмин томон «мана, кўрдингизми?» дегандек кўз қисиб кўйди.

Мўмин шундан сўнггина кабинага разм солиб қаради – қўғирчоқдай безатилган, ўриндиқларга чарм қопланган, қоплама устидан ҳаворанг сурпдан тикилган гилоф кийгизилган эди. Замонавий магнитола, ўнгу сўлда жажжи шамоллатгичлар... Оёқ остидаги линолеум тўшама ёғ тушса ялагудек, топ-тоза. Самаднинг мақтанганича бор экан...

– Оддинлари довондан ўтганмисиз ҳеч? – на-вватдаги савонни берди милиционер.

– Йўқ... Нимайди, командир?..

– Шунчаки сўрадим-кўйдим-да... Эҳтиёт бўлинг, машинанизига гап йўғ-у, барибир ҳазир бўлинг! Биринчи марта одам ҳаяжонланади... Кўрқади дегандай...

– Мени кўрқади деяпсизми?..

– Йўғ-ей, хана бўманг, шунчаки айтдим-кўйдим да, уста. – Милиционер кулиб, ҳужжатларни қайтараркан, честь берганича кўшиб кўйди, – майли, йўлингиз очик бўлсин!

– Радиониздан бирор нарса эшитсан ҳам бўладими, – таклиф киритди Мўмин машина ўридан кўз-ғалгач.

– Албатта, албатта. Замонавийларидан қўйиб берайми?..

Мўмин индамади. Буни ўзича тушунган Самад радиони кўйди. Мумтоз куй жўрлигидаги ашула очик дарчадан зув-зув оқаётган тоғ манзараси, наботот ифоридан тўйинган салқин ҳаво билан қўшилиб, дилни аллалар, кишига аллақандай масрурлик бағишларди.

Самад кутилмаганда машинани тўхтатиб, пастга инди. Бирор жойи ишқал топдими деган хаёлда Мўмин ҳам тушди.

– Мўмин ака, қаранг!.. – Юқорига имлади шоғёр. Самад бурала-бурала тепага тармашган илонизи йўлга тикилганича қалт-қалт титрарди. – Хув... Мошинларни қаранг, булутдан ҳам юкорида... Мен, мен... Ҳайдолмайман... Иўлнинг торлиги... Яна давлениям ҳам бор...

Самаднинг юзи қордай оқарган, пешонасидан реза-реза тер юмаларди.

«Қон босими бор одам қизаради шекилли».

Милиция ходими билан сухбатни эслаб, Мўминнинг кулгиси қистади. Аммо ўзини тииди.

– Узок Шарқда тоғ, довонлар йўқмиди? – деди.

– Ҳа-ҳа, бор. Бироқ бунақамас – паст, кичкина...

«Ёлғонниям роса ясантиаркансиз-да. Йигирма йилдан ортиқ чамбарак нонини еганингизга ҳам шубҳам бор-ов, валдирвой Самад!»

Мўмин сигарет тутатди. Довон йўлини тусмоллади, тасаввур қилишга интилди. Шу кунгача бу йўллардан юрганини, воҳа томон ўтмагани учун ўзини койиди, уятга ўхшаган ноқулай туйғу юрагини мижғилади. Довонни яхшироқ кўриш ниятида сайҳонликка чиқди. Кафтини соябон қилиб қаради. Самаднинг кўрқанича бор экан. Эшилиб-буралиб ётган қоп-қора асфальт афсонавий аждарга ўхшаб ялтирас, турли хил машиналар илон ягринидан тепалаётган чумоли ва кўнгизларга менгзарди. Кунгайи кўкариб, орқа томонини оппоқ қор босган чўққилар

орасига кириб кетса керак, йўл давоми кўринмасди. Беихтиёр пастга назар солди. Йўл ёқалаб қуюқ ўсган дараҳтлар тўпи орасида «ЙПХ» манзили томи тўртбурчак тугмадай ярқираб турарди.

Тавба, ваҳимами, кўркувга ўхшаган безовта туйғу Мўминнинг ҳам юрагини «шиф-шиф» тилимлади. Кейин чумолилар тўпи сингари бутун вужудига тарқалди. Тинка-мадорини куритди...

Мўмин ели қочган тўп каби юмшаб, машина ёнига қайтди. Самад ясси тошга ёзилган кўрпачада ўтирганича маъданли сув ҳўпларди.

– Энди нима қилдик, дўст? – Мўминнинг товуши ўзига ҳам жуда ҳорғин ва ҳазин эштилди.

Самад қатъий қарорга келиб қўйган шекилли:

– Шопир ёллаймиз, ҳақини менинг ҳисобимдан тўлайсиз.

– Ахвол шу экан, Самадвой, нима қилардингиз ишни гарданга олиб? («Аҳволингиз» демоқчи эди, Самадни аяди.)

– Қайдан билибман, ака, довоннинг бунақалигини... Ботир бўлсангиз, марҳамат, ана мошин, ана рул, ўтирингу ҳайданг!..

– Оббо-о!

Мўмин кескин ҳаракат билан кабинани очиб, рулга ўтириди.

– Одам ёллагандан кўра ҳар нарса бўлган яхши. Кимсан фалончи бахши, полвоннинг урвоқларимиз-а! Рұхлари роса чирқираётган бўлса керак! Раим полвонни биласиз, Эран бахши билан бирга мана шу тоғни қоқ белидан пою пиёда кечишиб, воҳа тўйларида қатнашишган. Юрт шаънини кўриқлашган...

Самад «Қачонгача фалсафа сўқасан?» дегандек норози қараш қилди.

– Воҳ, бобожонларим!.. Бу қўрқоқ ва субутсиз болаларингни кечир!..

Машина ўт олиб, ўридан жилди. Мотор овози ҳам ингрокқа ўхшарди...

Мўмин тепага ҳам, пастга ҳам, ҳатто шеригига ҳам қарамас, чамбаракка маҳкам ёпишганича газ пошиагини босарди. Юқорига машина эмас, ўзи ўрмалаётгандай бутун вужуди зўриқар, ҳаво салқинлигига қарамай, қора терга ботиб борарди. Пайт топиб Самадга назар ташлади. У тирсакларини тиззалариға тираганича қўл боғлаб ўтирас, кўзларини юмиб олганди...

Қувиб ўтаётган «Жигули» сигнали Мўминнинг дикқатини тортди. Олд ўринда ўтирган йўловчи қўлини дарчадан чиқариб, «тўхтатинг» ишорасини қилди.

Ўттизинг ўёқ-буёғидаги бу йигитлар тоғлик – Жўшбулоқдан эканлар. «УАЗик»нинг «қадам олиши»дан вазиятни англаған йигитлар чайналиб ўтирамай, мақсадга кучиши, ёрдам таклиф этишиди:

– Мехмон акалар, бу боришиңгизда мошинни ҳам ҳоритасиз, ўзингиз ҳам... Бу йўлларда мошинни эснатиб-эснатиб ҳайдаш керак, – деди бўйчанроғи.

– Аввали ҳамма ҳам шундай... Кейин ўрганиб кетасиз. Йўғасам, мен ҳайдай қолай монументгача... – деди иккинчиси.

– Довоннинг энг баландидаги монументгача... – тўлдирди бўйдори.



— Яхши бўларди, — хижолатомуз жилмайди Мўмин.

— Ҳа-ҳа, қуруқ қўймаймиз, неча пул билан обора-  
сиз? Монументмас, ху ўша Жўшбулоқнинг ўзигача...

— Одамни хафа қилманг-да бунақа, ака!.. Мех-  
монсиз-а... Мен сизга борсам, мендан акча сўрайсиз-  
ми!? Буниси кетмайди, ака!..

Жўшбулоқчача етиб боролмадилар. Йўлнинг  
қишлоқ кафтдагидек кўринадиган даражада пастла-  
ган жойида, тогу тош тугаб, қир бошланган ерда бир  
булоқ бор экан. Шундан сувлашаётганда йўл чекка-  
сидаги тошдан терилган мўъжазгина емакхонадан да-  
вандирдай бир одам чиқиб, Самадга тикилиб қолди.  
Ҳамма ҳайрон, Самад гунгу гаранг, «муз»га айланди...

— Эҳ-ҳа, ярамас! Кўлга тушдингми?.. Тепки ей-  
санми, муштми? Айт-чи, қани! — Барзанги гурзидаи  
муштини Самаднинг боши устида кўтариб дўлайди.

Зўравоннинг эсу ҳуши жойида кўринар, мастига  
ҳам ўхшамасди.

— Ака, қўйинг-ей, ҳазилни! Бу акамлар меҳмон  
бўлса, — юрак ютиб тилга кирди «Жигули» эгаси – Ко-  
милжон.

— Меҳмонлиги учун уришим керак буни. Урсам  
ўлиб қолар, бир тепақолай, а, меҳмон!..

Муштумзўр кутилмаганда Самаднинг кетига оёқ  
сермади. Самад тепки зарбидан мункиб кетди, аммо  
иყилемади. Ихтилоф шу билан тугади.

— О, Ўроз! Ўзингмисан?!.. Ўлай агар, сени ҳеч ким  
танимайди. Ўсиб кетибсан-ей!.. Йигирмадан кейин  
ҳам ўсаркан-да одам, а? – дея Самад қучогини ёзга-  
нича рақиби томон бурилди.

— Бўлди. Барибир сен ютилдинг. Тепкидан кейин  
танидинг!

Маълум бўлишича, барзанги Самаднинг қурол-  
дош дўсти экан. Хизмат битиб, уйларга тарқаш ол-  
дидиа келишилган экан – Ватанда учрашиб қолганда,  
кимдир кимни танимаса, таниган одам унугтан одам-  
ни кучининг борича бир мушт тушириши ёки тепиши  
лозим экан. Мушт еган қуролдош хотираси пастлиги  
учун жаримага тортилиши – гувоҳларни қўшган ҳолда  
бир зиёфат бериши шарт экан.

— Шартномага бир ўзгартириш киритамиз, – деди  
Ўроз йўғон овозини янада дўриллатиб. – Зиёфатни  
сен эмас, мен бераман. Ана, менинг маконим, – у ўнг  
томонда сарғиш тортган ўт-чўп орасидан зўрга кўзга  
ташланиб турган ўтовга ишора қилди. – Тандиркабоб  
қилиб бераман. Маза олгач, тузим тортиб, йилда бир  
келадиган бўласан. Мана кўрасан!..

Ўрозни ҳеч ким ниятидан қайтара олмади.  
Жўшбулоқийлар ишлари қистовлиги туфайли узр  
сўрашди, кечқурун келиб, албатта ҳамнасиба бўлиш-  
ларига ваъда бериб, жўнаб кетишиди.

Асли паландаралик бўлган Ўроз ўрмон хўжа-  
лигига ишларкан. Хўжалик қир бағридан юз гектарча  
ер ажратиб, терак экиби. Ўша сунъий ўрмон тарбияси  
Ўрознинг зиммасида экан. Таътил даври эмасми,  
бала-чақаю қўй-қўзиси шу ерда экан...

Аввал тоғликлар урфи бажо келтирилди – меҳ-  
монлар ташрифи улуғланди, пойи қадамига қўй сў-  
йилди...

Ўтовнинг соя томонига гилам, кўрпачалар ёзилди.  
Қуролдошлар бугунги ҳаётлари, шароиту аҳволлари,

моддиятию руҳиятларининг асосий қўрсаткичлари  
ҳақида маълумот алманиш бўлишгач Мўмин қатъий  
оҳангда:

— Энди мезбон, биздан «Йўл бўлсин?» деб сў-  
ран!.. – деди.

— Хўп-хўп, курдош, йўл бўлсин? Қайси шамоллар  
учирди? Аммо-лекин мени йўқлаб келмаганларингни  
кўриб турибман!

Мўмин сафарлари сабабидан сўзлади. Бугун  
қайтишлари лозимлигини ургулади.

— Бунақа фикрингизнинг пешонасига чўлиқнинг  
чўқмори! Салкам уч юз чақиридан келиб, қуруқ оғиз,  
қуруқ сўз билан кетган одамни топиб беринг ўзбекнинг  
тариҳидан... Турдибой отанинг говмиш фермаси-  
га келдим деяверинг, анов пастда бир қадам. Мен  
ҳозир, бир минут... – дея Ўроз телефонини ишга сол-  
ди. Утова панасига ўтиб, ким биландир гаплашиб кел-  
ди. – Ҳозир «Матиз» келади. Бориб савдолашасиз-  
лар. Саҳарлаб йўлга чиқасиз... Ботарга қарай йўлга  
чиқма, отарга қарай чиқ, дейишган. Гапнинг токўтари  
шу!..

Шу орада дастурхонга қовурдоқ тортилди.

— Буни бизда фурсатона дейишади. Тандиркабоб  
пишгунча ичакларни алдаб туриш керак, шу учун...  
Қани олинглар!.. Яхши бир одатимиз ҳам бор – би-  
ринчи овқат билан ичилемади.

— Зўр экан!.. Овқат битта бўлса-чи?.. – сўради Самад.

— Арақ берган занғар иккинчини ҳам аямайди...

— Зўр экан! Биратўла ичилемаса яна яхши  
бўларди!

— Шундай деяпсан-у, кўзларинг арақ сўраб жов-  
дираяпти... – Ўроз ваҳ-ҳаҳлаб кулди.

Самад жилмайганича бежавоб қолди...

Чақирилган «Матиз» кўп кутдирамади. Боя  
Ўроз буюртма қилган шекилли, катта-кичик қути ва  
елимхалталар билан келди.

— Парашютдан сакраган одам ерга тушгунча яrim  
килогача озаркан. Сизларга ўхшаб кўрққанидан... Самад,  
ҳойнаҳой сен икки кило ташлагандирсан, – кул-  
ди Ўроз. – Бизнинг довон ҳам самолётдан паст эмас  
– бир минг етти юз саксон саккиз метр. Устига-устак  
боя мен ҳам қўрқитдим. Кейин Мўминга юзланди:

— Самад дам ола турсин. Норбўта билан бориб  
келақолинг. Бирваракай савдони битириб келинг. Эр-  
талаб тўғри олиб кетаверадиган бўлинглар!

Заргарми, хотинининг бошқа маслақдошими қўн-  
ғироқ қилиб қўйган бўлса керак. Уларни бир невара-  
си билан Турдибой отанинг ўзи қарши олди. Салом  
алиқдан кейин Норбўтадан сўради:

— Оқбўтанинг ўғлимисан? Мошини қани меҳмон-  
нинг, бузилиб-нетиб қолмадими мабодо?

— Мошин бор. Шопири Ўроз паландаранинг  
фронтини экан. Опқолди. Ўзлариям довондан чарчаб  
тушганаканми...

— Чарчамаган бўлса, паландаранинг ўзи чарча-  
тади энди, – кулди Турдибой ота. – Ҳай, майли, бў-  
масам, қани, йўлда турмайлик, уйга марҳамат! Бир-  
пасгина дам оламиз. Шунгача куннинг ҳам тифи  
қайтади.

Дарвозахонадан кирган жойда, ишком тагидаги  
сўри тўшоғлик, дастурхон ясоғлик экан. Райҳонми,

кийикўтими билан ифорланган кўк чой чарчоқни дарҳол ҳайдади. Етмишдан ўтган бу ота ғоят дилкаш, суратидан сийрати қўриниб турган, иссиққон бир одам экан. Унинг ёзлик чакмонини туртиб чиққан елкала-ри, кенг пешонали, чўзинчок юзи, йўғон, сертомир бўйни, йирик панжалари бир пайтлар норғул йигит бўлганидан дарак берарди. Хатти-ҳаракатида ёшига муносиб бўлмаган суръат ва бардамлик илиа кексаларга хос тийраклик ва синчковлик тажассум топган эди.

Невара билан Норбўта қурдош жўралар бўлса керак, боғ айланиб келиш баҳонасида мезбону меҳмон икковларини холи қолдиришди.

Гурунг қизигандан қизиди. Ярим соатча вақт ичидан Турдибой ота Мўмин ва унинг аждод-авлоди ҳақида тўлиқ тасаввур ҳосил қилди десак муболаға бўлмас. Мезбон истаган нарсаси ҳақида тортинимай сўрар, овозидаги меҳрибонлик ва юзу кўзида нуронийлик бу ўзига хос «тергов»га самимий сухбат мақомини берарди. Мўмин бу фариштасифат кишининг залворли саволларидан заррача инжилмас, аксинча, жавоб бераркан, руҳиятида ажаб бир енгиллик сезарди.

– Ҳай, аттанг, жиловни бериб қўйган экансиз, ўғлим! Ҳа, энди бу ёғида келинга инсоф берсинг. Ҳали ҳам кеч эмас, ўзингизни кўлга олинг. Эрлик қилинг, шижоат кўрсатинг!..

Чойдан сўнг Турдибой ота Мўминни молхонага бошлади. Оғил каттакон ҳовлини эслатарди. У асосан икки бўлақдан иборат. Биттаси моллар учун ётоқ. Иккимисида ем-ҳашак тайёрланаркан. Икки қисмни усти шифер билан ёпилган узун нова ажратиб турарди. Нованинг бир қисмида сув. Қолган қисмида омиҳта ем. Бўрдоқиларни озиқлантириш вақти белгиланмаган, улар очиққан пайт нова олдига келиб, қорин тўйдириб, сувлашиб, ётоққа қайтишаркан. Ётоқ уч қисм экан – ёпиқ кузлик-қишлиқ оғил, шоли қипиғи тўшалган кенг шийпон ва кум тўшалган очиқ майдон. Арқон-занжир нималигини кўрмаган моллар эмин-эркин, истаган жойида чўзилиб, кавш қайтариб ётишаркан... .

– Ўлчовсиз ем-ҳашак шароитида улар бўкиб қолишмайдими? – сўради Мўмин.

– Йўқ. Бу шароитда улар кўзи тўқ бўлиб ўсади. Ортиқча еб-ичмайди. Менимча, молларимнинг фавқулодда ювошлиги ҳам шундан...

– Бузоклар кўринмайдими?

– Эмизиклilarи шу ерда, хув бурчакда, кўрада. Сутдан чиққанлари бироз пастда, дала бошида...

Улар шийпон тагида қўйруқ булғаганича чибин ҳайдаб ётган, қизилдан кўра кўнғирга мойилроқ буқача ёнида тўхташди. Буқа эгаси томон беозор бир қараш қилди-да, енгил бир пишқириб, ўрнидан турди. Қадди-бўйини кўз-кўз қилгандек керишди.

– Сизга мана шуни бераман. Гўштга топширмаслик шарти билан... Урӯғ оласиз бундан. Ҳали-бери ўсади бу... Оти ўзи билан – Оқкуйруқ. Аслида биринкита қочар ҳам опкетишингиз керак эди-да... Ҳай, майли, янаги сафарларда... Маъқулми мол, яхшилаб қаранг!.. Энди учга киради. Ҳали-бери ўсади... Бундан қойимини билмадим...

– Бўпти, ота! Зўр экан, раҳмат!..

Турдибой ота алланима излаб ён чўнтакларини ковлади:

– Ўтирган жойда қолдирибман шекилли террўомалимни. Бўйнига боғлаб қўйсак, саҳарда излаб юрмасдик...

Мўмин кўйлаги ичидан боғланган «кўк» ўралган чорсини ечди. Ақчадан бўшатиб, отага узатди.

– Ўзингиз боғлайверинг, у жуда ҳам ювош!..

Оқкуйруқ рости билан жуда беозор экан. Мўмин чорсини бўйнига боғларкан, меҳри жўшиб, яғринини секин шапатилади, томогини қашлади. Буқа бунга жавобан тумшугини кўтартганича, йирик қора кўзлари илиа йигитга ёқимли қараб, бошини сараклатди.

– Қаранг, жонивор саломлашяпти!..

– Ҳа! У ҳамма нарсани тушуниб тургандек.

Улар супага қайтганларида дастурхон янада кенгайтирилган, ёзингиз сархил мевалари, қовун-тарвуз билан бойитилганди.

– Эҳ-ҳа, ота! Сизни наслчи чорва десам, боғбон ҳам экансиз-да!.. – деди Мўмин ҳаяжонини яшира олмай.

– Ҳа энди, шундай шароитда яшаб туриб... Янатагин боғбонлик бизга отамерос... Ҳув-в, тўрдаги, бурчакдаги нок салкам бир асрға гувоҳ. Бобомиз – Мурод полвонни мардикорга кузатиб қолган...

Турдибой ота бу галги сухбатда асли Сурхон бўйларидан бўлган аждодлари – икки етим ака-уканинг бу ерларга қандай келиб қолгани, улардан тарқаган авлод ҳақида муҳтасар гапирди. Улар икки юз йилча аввал кўним топган экан бу маконда. Ҳозир ўша сағирлар авлоди бир жойга тўпланса бир тўйлик одам бўлармиш...

– Мана бу тўнгичимнинг супракоқдиси... – дея невараасига ишора қилди чол.

Норбўта:

– Ота, бошқа бир заказим ҳам бор эди, энди бизларга руҳсат берсангиз... – деб узроҳолик билан қистамаганда меҳмону мезбоннинг бир-биридан ажралгиси йўқ эди...

Эртага тонг-саҳар учрашадиган бўлиб хайрлашишиди.

Норбўта дегани бало чиқди. Унинг ҳеч қанақа ошиғич «заказ»и йўқ экан. Қайтишда «Матиз»ини Жўшбулоқ томон ҳайдади.

– Бизнинг юрттиям бир кўриб кетинг-да, меҳмон ака! Шунча жойдан келиб... У ёқда дўстлар «нима кўрдинг?» дейишса, «ўтовдан қайтдим» дейсизми?.. Ҳали кун эрта. Тандиркабобга бемалол улгурдамиш...


Норбўтанинг юзу кўзи, овозида зуҳурланган са-мимиятми, сухбатдошга ҳурматми ёки меҳр, шунга ўхшаган дилхуш туйғулар Мўминнинг тилига боғич бўлди, эътиroz билдира олмади. У:

– Ҳали, боятда «заказим бор» девдингиз. Тағин мени деб ишдан қолиб ўтиранг! – деди жилмайиб.

Норбўта бўш келмади:

– Заказ мана шу-да... Ўзимнинг шахсий заказим! Доимо бирорлар буйруғига чопмай, ўзимизга ҳам ишлайлик-да, онда-сонда бўлсаям, йилда бир марта дегандай...

Машина Жўшбулоқда, дарахтларга кўмилган шинам бир емакхона олдида тўхтади. Норбўта «мен



ҳозир» деганича кетиб, кўтарилиб чиқди. Кейин катта трактга чиқиб, қиблалашда давом этиши.

– Дарёликқа тушиб, бир яиратаман сизни. У ерда-чи, ўпкангизмас, танангиз нафас олади... Ҳозир ўн минутда етамиз!..

Норбўта баланддид йигит экан. Кўприқдан ўтиб, ўнг қирғоқ бўйлаб ҳайдади. Бу томондан дарё, тоғ этаги жуда чиройли кўринармиш...

Қирғоқда Мўмин юрагини тушуниксиз бир кайфият эгаллади. Бир маромда шарқираб оқаётган дарё шовқини, сув сатҳини ялаб эсаётган салқин эпкин йигит дилини қитиқлади. У тошдан тошга сакраб, пастга инди, юз-қўлини муздай сувга чайди, теварак-жавонибга сукланиб қаради... Рассомлиги тутди. Унинг наздида қаршисидаги осмонўпар чўққилар, кунгайда пишган каби қизариб кўринадиган қоя, харсанглар, пастроқдаги кўм-кўк арчазорлар, ундан ҳам қуйироқдаги сарғиш торта бошлаган қирлар, томирдай тарқаган катта-кичик йўл ва сўқмоқлар ва ниҳоят пойида тўлғаниб ётган дарё табиатнинг бир парчаси эмас, яхлит бир мойбўёқ картина – санъат асари эди...

Мўмин бу хил асарларни кўплаб учратган, синчиклаб ўрганган. Улардан мантиқий тафаккур ва хаёлот, фано ва абадият, замону макон чексизлиги, маҳобат ва гўзалликка оид ҳиссий-шуурий тўхтамлар топган. Аммо негадир Мўминжон ҳеч бир яратик ва ундаги рангин тимсолларнинг инсон руҳият-сажияси билан алоқадорлиги ҳақида ўйлаб кўрмаган экан. Синчиклаб боқса, бугунги картина – тирик манзара бутунлай ўзгача. Унда иштирок этган ҳар битта жисм, фрагментда, уларнинг шаклу шамойили, рангida тоғ одамларига хос соддалигу самимият, мардлигу тантилик, очиқўнгиллиги жўмардлик, камтарлик замиридаги виқор сингари хислатлар манаман деб турарди...

Мўмин қўлида мўйқалами билан мольберт ёнида турган маэстродай бўлажак картиинанинг тарҳини чамалади, сарҳадларини белгилади. Гўё ҳар битта деталини суратга олди. Тамом, вассалом. Насиб қилиб нимадир чизса, ушбу манзарани чизади. Унда сервиқор тоғлар билан баробар оққўкрак тоғликлар сажияси ҳам акс топади...

Мўмин хаёлини чўнтак телефонидан янграган «Карвон кўрдим»нинг лўнда-лўнда маромли мусиқаси бузди. Салтанат.

– Дадаси, бормисиз?! Қалай, ишлар битяптими? Телефонингизга ҳеч тушолмаямман...

– Ҳа, энди... тоғли жойлар...

– Кўрдингизми, олдингизларми?..

– Ҳа. Зўр!..

– Йўлга чиқдингизларми, қаерларга келдингизлар?..

Мўмин бугун чиқолмаслигини айтиб, вазиятни изоҳлашга интилди.

Салтанат жавраб берди:

– Ҳай, шўрпешона эркаклар. Уйдан бир қадам чиқсангиз аҳволларинг шу, шишанинг ичиди тунайсизлар!..

Қисқа гудоклар. Ё хотини алоқани тўхтатди ёки тоғ шароити...

Атиги бир дақиқачалик сухбат Мўминни аршдан заминга олиб тушди. У Норбўта ёнига қайтди. Пикник тайёр экан. Мезбонни кўпам ялинтирмади. Тунука идишли пиводан босиб-босиб ичди. Муздай ичимлик юрагидаги аллангани бироз пасайтиргандай бўлди...

Норбўта меҳмонининг аҳволи руҳиясидаги ўзгаришни ҳозиргина бўлиб ўтган симсиз сўзлашувдан деб билди, уни чалғитишига уринди:

– Олинг, меҳмон! Яхнадан олинг, бу ерларда ейилган овқат тўғри бориб қонга қўшилади. Ўроз аканинг кабобига ўрин қолдираман, деб ўтируманг. Ҳозир тепароққа чиқиб бир чўмиламиз... Бари йўқ бўл кетади. Патир билан олинг, бунақаси фақат Жўшда ёпилади... Дарвоқе, паландарангиз зўр одам... Тинчлик эканми, ахир, ака?!

– Ҳа-ҳа, чечангиз... Шунақа... изляяпти...

– Ий-й, учирив қўймайсизми ўша матани... Тоғли жой, шундай-шундай дейсиз!..

– Одам алдаб кўрмаганман ҳеч.

– Ҳатто чечамизниям-а? Йўғ-ей, бўлиши мумкин эмас... – Норбўта ҳоҳолаб кулди. – Роса соддакансиз-е, ака?...

Барибир шу куни Салтанатни алдашга тўғри келди. Ўрозникига келгач ҳам қўнғироқ қилавериб ҳамманинг тинчини олди. Тузукроқ сўзлаша олишса ҳам майли эди. Икки калимага етиб-етмай «хизмат доирасидан ташқари...» Салтанатнинг билгани бир гап – «Бугун қайтинглар! Бугун қайтинглар!» Тўтидай такрорлайди... Вазиятни тушунтириб бўлмади. Охири телефон учирилди, аникроғи, Норбўта жавоб чақиригини «хизмат доирасидан ташқари»га айлантириб берди...

Жўшликлар сўзларидан чиқишиди. Шафақ сўниб, тоғу тош қора пардага ўрала бошлаганида кўлларида меҳмонпай – бир блок пиво билан қажавали мотоциклда келишиди. Ўтириш роса қизиди. Икки йиллик ҳарбий хизмат қарийб ойма-ой хотирланди. Хотира-лар қадаҳ сўзлари билан бўлинниб турди, албатта. Кўп ўтмай Самад «пишиб» қолди. У ким нима айтса, «ҳа-ҳа, шундай» дея маъқуллар, кўзлари сузилиб ўтиради. Гоҳ қаердалигини аниқламоқчидай теварак-атрофга аланглар, гоҳида юзларида фонуснинг қизғиши шуъласи ўйнаган даврадошларга «булар ким бўлди?» дегандек тикилиб қоларди.

Мўмин томогининг чангчиқаётганига қарамай, ўзида ичмасликка куч топа олган, мезбонлар кўзи учун араққадаҳга қуйилган «юмшоги»дан ҳар замонда бир ҳўплаб ўтиради. Буни ҳозиргина қадаҳ сўзи айтган жўшлик Комил сезиб қолди.

– Бу жойларда икки соат уйқуласангиз, ҳеч нарса қолмайди. Нима еб, нима ичганингизни ҳам унутасиз. Олинг меҳмон, Жўшчасига бир тўлдириб олинг!.. – дея қадаҳ суниб, хархаша қилди. – Менинг тилакларим учун бир олинг!..

Мўмин Самадга ишора қилди:

– Кўряпсиз-ку!.. Эртага ўзим ўтирусан керак рулга.

– Ака, бу проблемани хаёлингиздан чиқариб ташланг! Сизларни довон ошириб, текис йўлга солиб юборишни мана мен зиммалайман... Ўзим шопир то-паман!..

«Буларда сўздан қайтиш йўқ. Оталарига раҳмат!..» Мўмин бирдан енгил тортди. Лиммо-лим тўлган, юзида фонус нури жимиirlаётган қадаҳга қўл чўзганини билмай қолди...

Катта мезбон – ўтов эгаси Ўроз ҳам Мўминни кузатиб ўтирган экан. У ҳаммага эшиттириб:

– Мана бу бошқача бўлди!.. – деди. – Аслида, Мўминжон, барига сиз, чироғи, сизнинг бўрдоқи сабабчи. Сиз бўмасангиз, сизнинг бўрдоқи бўмаса, мен Самадни тополмасдим ва теполмасдим. Ҳов, тамада, мулгима, ҳаммага бирдай, Жўшчасига тўлдириб қуй! Шу қадаҳни бош меҳмон Мўминжон ва унинг буқаси учун ичамиз!..

Ўтириш ярим тунда тарқади. Уйқулаш учун пашшахона шу ернинг ўзига қурилди.

Тонг оқлиги пашшахонага кириб улгурмай уларни трактор овози уйғотди. Барака топгур Турдибой ота Оқкуйруқни болалари орқали жўнатибди. Тиркама ва машина баландлиги қарийб баробар бўлганидан молни унисидан бунисига ўтказиш осонгина кўчди. Тракторчи ўғил маслаҳати билан Оқкуйруқ тўрт томонидан, нишаб йўлда ўён-буён бориб-келмайдиган қилиб бортга тангилди...

Маҳаллийларнинг айтганларича бор экан – беш соатчалик уйку чарчоғи мастиликни қиличдай кесганди. Улар бутунлай ҳушёр эдилар. Енгилгина наҳори қилинди. Тамаддидан сўнг кўй сутидан увтилган қатиқ ичилди (Вужудда умуман, спиртнинг ҳидини ҳам қолдирмасмиш).

Ўрознинг телефони жиринглаб қолди.

– Тушундим. Бўпти, бўпти. Ай, раҳмат-ай, сенга Комилжон! Сендақалар бор экан, тоғликларнинг бовури бут... Тўйингда қайтсин-ей! Ҳозир, ҳозир етамиз!.. – Кейин меҳмонларга юзланди, – кечаги жойда кутишяптикан, Комилжон, шопир билан...

\*\*\*

Салтанат тунни бедор ўтказди. «Кечлатиб йўлга чиқишиган бўлса, келиб қолишар» деган хаёlda ботбот ташқарилади, йўл пойлади. Уфқда кўзга ташланган катта йўлда машина чироқлари дарёдай оқар, аммо ҳеч бири бу томонга бурилай демасди. Саҳарга яқин чарчоқ зўр келди. Қабоқлари ун тиқилгандек ачишиб, мижжалари оғирлашди. Келиб қолишса бехабар қолмайин деган ўй билан боғдаги сўрига чўзилди...

Оғил томон аввал ёришиб, кейин бирдан қоронғи тортди. Кетма-кет чинқирган машина сигнали хотин кишининг уввосига ўхшаган сас билан алмашди, кейин итми, чиябўри увиллашига эврилди. Молхона дарвозаси олдида турган «УАЗик» Салтанат чиқиши билан дарҳол жимиди. Энди унинг чироқлари тревога кўтарган ҳарбий кема сиренасига менгзаб ёниб, ўча бошлади. Кабина ичкарисидаги чироқчалар ҳам бир маромда ёниб, ўчар, у ерда ҳеч ким кўринмасди. Салтанатнинг юраги қафасдаги күшдек потирлар, босида гўё кантар уялаган, бетиним гув-гувларди. Бор кучини тўплаб, кабинага мўралади.

– Дадаси!.. Самад!.. Ким бор бу ерда?..

Тавба, унинг саволини симёочга кўнганича опоқ ёғду таратаётган ой ҳам тақрорлади. Ой шуъласи овозга мутаносиб тарзда пасайиб-кучаярди. Сал

ўтмай тепадан ёғилаётган товушга буқанинг «мўй»лаган саси эш бўлди. Салтанат беихтиёр юқорига қаради. Бортда чиройли бир буқа узун киприкли кўзларини сувганича бошини сарак-сарак чайкарди. Салтанат анграйганича қотди. Буқанинг беозор қарашими, киприкларининг бироз қайрилмалигими эри Мўминжонни эслатарди. Ногоҳ у тилга кирди:

– Танимадингми?!

Салтанат тош қотди. Савол қайталанди:

– Танимадингми?.. Бу мен – эрингман! Овоз эриники эди...

Салтанат овози борича додлади. Атрофда акс садо берган фарёд аёлнинг тушми, хаёллигини билб бўлмайдиган даҳшат чангалидан кутқарди...

Ўрнидан туриб, чироқларни ёқди. Оғил томон қарашга юраги бетламади. Кўркинч зўридан ўзини ичкари урди. Даҳлиз чироғи ёнди. Чўчиб тушди. Қаршишида ўғли Тиркаш турарди.

– Ҳа, опа?.. Кимдир қичқиргандек бўлдими?..

Салтанат сир бой бермади:

– Йўғ-ей, мен эшитмадим! Даданглар келиб қолишадими деб сўрида ётвудим... Совқотдим... Ҳа, айтмоқчи, ит ўлгар увлади... Ўшанга бақирдим, – деди.

Ўғлини тинчлантиргач хонасига кириб, кўрпага бурканди. Ухлашга уринишлари бесамар кетди. Ўша берган машъум манзара хаёlini бир зум тарқ этмас, кўзларини юмса, яна жонланадигандек эди... Ваҳима аралаш вужудига кирган титроқ борган сари кучаярди...

Эрталабки олтиларда хона эшиги охиста очилиб, келини қўлида патнис билан пайдо бўлди.

– Ассалому алайкум, эна!.. Шамоллаганга ўхшайсиз. Асалчой опкелдим. Иссиғида ичиб олинг. Мана бу дорилар... Иситмани бир зумда туширади...

Салтанат дилида «кошки эди иситмам бўлса» деди-ю, тилида:

– Раҳмат қизим, хонтахтада қолдирақол, – деди.

Келинидан ризолиги важҳиданми, ахволи руҳияси сабабми, кўзларини ёш пардаси қоплади.

Келини кетмади. Чойни ўзи шопириб, ним таъзим билан узатди, ҳапдориларни бирма-бир кафтига солди.

– Мана бу иситма учун, буниси тинчлантиради, манависи эса, ўзингизнинг ҳамишаги дорингиз...

Салтанат бироз иккиланиб турди-да, кейин дорилар тўпини оғзиға солиб, чойдан ҳўплади.


– Иssiқ-иссиқ ичинг, эна. Нон билан қаймоқдан олинг, дорининг заҳрини кесади...

Келини тушмагур ўзидан ҳам хушгап, ширинсўз. Қўярда-қўймай қаймоқ сурилган бир бўлак нон, бир дона қайнатилган тухум едириди. Ҳапдорилару илик муомаладан таркиб топган ушбу ўзига хос муолажа ҳадемай самара берди – Салтанатнинг юзига қизил югуриб, пешонаси терлади. Келин энасини ўрнига ёт-қизиб, дераза дарчасини очишига уннади.

– Умрингдан барака топ, қизим! Очмай қўяқол, чироқни ҳам ўчирма, – деди қайнона.

Салтанат соат ўнларда телефон кўнғироғидан уйғонди. Телефон рақами эриники, овоз эгаси аёл!.. Сапчиб ўрнидан турди.

– Салтанат опа, ўзингизмисиз?



– Ҳа-ҳа, тинчликми? Дадаси қани?!  
– Мен навбатчи ҳамшираман!.. Эрингиз бизда – марказий шифохонанинг жаррохлик бўлимида...  
– Нима гап? Гапириңг, синглим, тинчликми ўзи?...  
– Тинчликмас, кичкина авария юз берган...  
Алоқа узилди. Салтанат узвос тортди...

Уни ичкарига қўйишмади. Операция ҳали тугабди. Салтанат на йиглади, на бировга бирор савол берди. Даҳлиз ўртасида қаққайиб туриб қолди. Аслида у нима содир бўлганини билишни хоҳлар, аммо бош чаноги марказида чўғдек қизиган бир нуқта онгшуури ва бутун вужудини ҳаракатдан тўхтатгандай эди. Салтанат ўзини бирдан енгил сезди. Гўё парку булут устида осмону фалак тоқида учарди...

Салтанат ўзига келиб, кўзу қовоқлари йигидан шишган тўнғичи Мехрини таниди. Анча тиниқ тортган тафаккури вазиятни дарҳол англади. Ўзини тетик кўрсатишига уриниб:

– Даданг қалай? – дея сўради.  
– Яхши. Ўзингиз тузукмисиз, ой? – Мехри ўзини тутишга ҳарчанд уринмасин, эплай олмади, дастрўмолини юзига босиб, пиқиллади.  
– Мен савилни бало ҳам урмайди. Дадангдан гапир!  
– Айтдим-ку, яхши деб. Чап қўллари тирсагидан чиқкан, бошлари озгина лат еган, бори шу!.. – Мехри бу сафар жилмайишни бироз уддалади.

– Шопир-чи?  
– Чибин ҳам чақмаган. Бўрдоқи ҳам соппа-соғиш!..

Салтанат азбаройи хурсандлигидан ётган ўрнидан туриб кетай деди. Чап билагига бандланган нина ва ингичка елиминчакни кўриб тинчланди.

– Бўрдоқиси ўлсин... Унда мен нега аза тутиб ётибман, – дея кулди. Кейин жиддий тортиб, чуқур хўрсинди.

...Мўмин манглайи бир энлик бинт билан танғилган, гипсланган қўли бўйнига осилган, кўш ёстиққа суянган кўйи, хаёл оғушидаги одамдай ўтиради. Хотинини кўриб, қони қочиб, оқиш тортган юзида болаларча самимий қувонч жилоланди. Салтанат жадал келиб, қўлини эри бўйнига солди, юзидан ўпди, сассиз йиглади. Эҳтиросларига жавоб излагандек эрига тикилиб қолди. Мўминнинг табассумдан бироз қисилган, одатдагидан тезроқ пирпираётган кўзларида аллақандай лоқайдлик мавжуд эди. Салтанат юрагида баш кўтарган гумон булатини тарқатиш ниятида эрини саволга тутди:

– Дадаси, яхшимисиз?! Ҳеч жойингиз оғримаятими?

– ... (Лоқайд табассум)  
– Машина рулида сизмидингиз ё... шопирми?

Яна ўша жавоб.

Салтанатнинг хаёлида ўтган кечаги машъум манзара жонланди. Бўрдоқи, унинг қайрилма киприкли ийрик кўзлари Мўминнига ўхшашига яна бир бор амин бўлди. Аъзойи баданига ўргимчак ўрмалагандай жунжикди.

Ногоҳ Мўмин тилга кирди:

– Аммо бўрдоқи зўр!.. Оққуйруқ зўр! Уни кўпайтириш керак. Уни сўйма!..

– Бўрдоқиси ўлсин, илоё!.. Ўзингиз қалайсиз, дадаси!..

– Аммо тоғликлар... Моллари ҳам зўр экан. Мольбертим... Бўёқлар!.. Ҳали бунақасини ҳеч ким чизмаган!.. Оққуйруқни сўйма, кўпайтириш уни...

Салтанатнинг елкасидан кимдир охиста туртди. Салтанат бўлим бошлиғи Каромат Собировнани илгаридан танирди. У:

– Қўйинг, уни қийнаманг, эгачи, – деди эшик томон ишора қилиб.

– Энди нима бўлади?.. – сўради Салтанат даҳлизга чиққач.

– Бу ўткинчи жараён бўлса ажаб эмас! Вилоятдан мутахассис чақирганимиз. Сиз ташвиш тортманг, барча имкониятни ишга соламиз!..

– Дори-порига зарурият бўлса, тортинманг! Эримдан аядиганим йўқ!..

– Раҳмат, ҳозирча етарли ҳаммаси. Ўғлингиз жуда фаросатли йигит экан...

Кечкурун Тиркашдан бошқа ҳаммалари уйга қайтишиди. Мехри ҳам ота маконда қолди. Куни бўйи толиккан асаб ва вужудларни шом шафаги сўнмаёқ уйку элитди...

Салтанат эрталаб қизининг аччиқ фарёдидан чўчиб тушди. Мехри шум хабар келтирган телефонни деворга уриб чил-чил қилган, даҳлизда ҳар томон ағанаганича бошини тўшамага уриб, «вой, дадам»ларди...

\* \* \*

Бу воқеалар беш йилча аввал бўлиб ўтган. Хозирда «Мўмин Қобил» хусусий фермаси тумандагина эмас, бутун вилоятда, минтақада машҳур. Айтгандай, асосийси – корхона ўз йўналишини ўзгартириди. Бўрдоқичилик фермаси наслчилликка айлантирилди. У ердаги барча чорва Оққуйруқнинг авлоди. Табиатан ювош, шу туфайли эт тўплашга мойил бу хил молларнинг бозори чаққон. Фермани асл касби муҳандис бўлган Тиркаш Мўмин ўғли бошқармокда.

Маслаҳатчилар ўша-ўша – Зариф заргар, Ҳожи кал, онаси.

Салтанат тез-тез моллардан хабар олиб туради. Бироқ Оққуйруқ боғланган ўринга яқин йўламайди...





## Мен сени баҳт томон кузатган эдим

\* \* \*

Қалбимга солмагин энди гулгула,  
Севганинг эслатма, барчаси бекор.  
Мен эса бир умр орзуларимнинг  
Дорига осилиб йиғлаган дилдор.

Тушларимга кирма, олиб кет ёдинг,  
Ташлама ҳижроннинг оловларига.  
Ахир менинг елкам ўрганиб бўлди,  
Қисматнинг энг оғир синовларига.

Чорлама, кетавер, қайтмагин энди,  
Майли, қайдা бўлсанг сен бўлгил омон.  
Мен сени баҳт томон кузатган эдим,  
Сен эса ўйладинг баҳтсизлик томон.

### ОНА

Йўллар хўп хатарли, манзилим йироқ,  
Юракнинг тубида қалқиёди фироқ.



Дилбар  
СИДДИҚОВА



Олтинсой туманида туғилган. Зулфия номидаги Давлат мукофоти соҳибаси. Шеърлари республикамизнинг турли нашрларида эълон қилинган.

Унга қандоқ етиб боргум, ҳайронман,  
Ахир ярим йўлда тизда қалтироқ.  
Кел, бағринг ичидა сақланай, она,  
Бўлай томирингда томчи қон, она.

Ҳаёт гўзал девдинг, шодликларга бой  
Сени қуёши сақлар, тунда сақлар ой.  
Мен эса барига ишондим, она,  
Мени алдовмидинг шунда ҳойнаҳой.  
Қисмат қамчисидан бездим мен, она,  
Бағрингни осоийи сездим мен, она.

Йиқилсан қўлимдан тутдинг, тур дединг,  
Ўн беши қоронгу, ярми нур дединг.  
Ахир ўттизи ҳам ўтди-ку, десам,  
"Баҳтга эришади фақат ҳур" дединг.  
Мен ҳур бўлиб қўкка учмайман, она,  
Қайноқ қучогингдан кечмайман, она.

Бирор ҳасад қиласа, кўзтумор бўлдинг,  
Ҳар не ёмонликка доим дор бўлдинг.  
Гарчи мен пойингга гард бўлолмадим,  
Сен менинг бошимда мудом бор бўлдинг.  
Саботда сендайин бўлмадим, она,  
Мен яшаши сирини билмадим, она.

\* \* \*

Тўхта...  
ахир кириб келмоқда,  
Юрагимни босгувчи сукут.  
Сени тунлар ёдга солувчи,  
Согинч ва унум.  
Эвоҳ, мана, кўнглимга кирди,  
Ичкарида бошлианди сурон.  
Юрагимни отиб юбордим,  
Уни ойдек илиб ол, осмон!



## МОДЕРНИЗМ: ИЛДИЗ, МОҲИЯТ ВА БЕЛГИЛАР

Кунботиш ўлкаларидағи назарий типологияга кўра бадиий адабиёт тараққиётининг тарихи шартли равишда а) классик адабиётгача бўлган босқич; б) классик адабиёт босқичи; в) ноклассик адабиёт босқичи; г) постклассик адабиёт босқичи сингари босқичлардан иборат экани қайд этилади. Агар эстетика тарихи ва назариясида аристотелча-гегелча-кантча ёндашув классик йўналиш дейиладиган бўлса, унгача, яъни антик давргача бўлган босқичнинг классик адабиётгача дейилишида мантиқ борлиги кўринади. Модернизм эса айнан ана шу классик қарашлардан юз ўгириш, уни инкор этиш натижаси ўлароқ юзага келган илмий-эстетик қарашлар тизими бўлган эди. Дастрлаб модернизм ўзини энг сўнгги бадиий-эстетик йўналиш тарзида тақдим этди, аммо вақт бу даъво тўғри эмаслигини, адабиёт ва санъат ҳодисаларига ёндашиш ҳамда изоҳлашнинг шу вақтгача бўлган барча йўналишларидан тамомила фарқ қилувчи постклассик босқичи ҳам борлигини кўрсатди.

Жуда узок йиллар мобайнида амалда бўлиб келган классик йўналишнинг ўрнини эгаллаган ноклассик фалсафий ва бадиий тафаккур тарзининг ифодаси бўлмиш модернизм йўналишига хос етакчи белгилар нималардан иборат эканини аниқлаш ғоят муҳим илмий-назарий ва амалий аҳамият касб этади. Модер-

низмнинг назарий қарашлар тизими ва бадиий амалиётида аристотелча-гегелча-кантча классик қарашларга зид равишда фақат борлиқ ҳодисалари ҳамда одамнинг муайян мақсадга йўналтирилган фаолиятигина эмас, балки инсондаги зерикиш, сиқилиш, тушкунлик, кўркув сингари анъанавий классик санъат эътиборидан четда бўлган руҳий тушунча ва ҳолатлар ҳам бадиий тасвир обьекти мақомига кўтарилиди; синкретизм кучайгани сабаб фалсафа бадиийлашди, мусиқада оҳанг уйғуллигидан юз ўгирилди, тасвирий санъатда ташки үхашашлик ва шаклий гармониядан воз кечилди, адабиёт, театр ва кинода ҳаётий ҳаққонийлик ўрнига абсурд, ношайн, эротик ҳамда жирканч ҳолатлар тасвирига устувор мақом берилди. Айни вақтда, модернистик санъатнинг юксак намуналари яратилиб, улар XX аср эстетик тафаккурининг ўзига хос классикиси бўлиб қолди. Негаки, ҳар бир модерн асар олдиндан пухта ўйлаб олинган қонун-қоидалар, талабу тартиблар асосида яратилди. Ҳатто, ҳар қандай азалий қолипу тартибларнинг инкори ўлароқ дунёга келган асарларда ҳам муайян ички бадиий-эстетик интизом мавжуд эди.

Модернизм – фалсафа, санъат ва адабиёт соҳасидаги ноклассик қарашлар тизимини умумлаштирувчи атама. Кунботиш мамлакатларида 19 асрнинг сўнгги чорагида юзага келган ва французча “энг янги”, “замонавий” маъноларини англатувчи модернизм ўзини ўша замон ҳамда келажакдаги ягона ҳақиқий эстетик ва фалсафий йўналиш ҳисоблаб, оламни фалсафий ҳамда бадиий идрок этиш, изоҳлаш ва тасвиrlаш борасида мавжуд бўлган анъанавий ёндашувларни инкор қилиши билан ажralиб туради. Модернизм олам ҳодисалари ва одамга муносабат, улардаги турли-туман ҳолатларни изоҳлаш ҳамда тасвиrlашда ўзига хосликка интилиб, классик ёндашув йўсинини инкор этиш йўлидан борган ғоят кўп тармоқли фалсафий-эстетик ҳодисадир.

Модернизм классик фалсафадаги санъатга реал воқеликнинг инъикоси тарзида қарашдан воз кечиб, борлиққа қатъий боғланиб қолиш санъаткорни чеклаб кўяди, у ўз ўю хаёллари билан воқелиқдан ташқарида турганида кўпроқ ижодий имкониятга эга бўлади деб қарайди. Реалистик назария санъатнинг ягона обьекти борлиқ деб билгани сабабли ҳам ундан юз ўгириш керак деб ҳисоблейди. Санъат борлиқнинг нусхаси эмас, балки унинг ўзи алоҳида мустақил борлиқ деб билади. Модернистик адабиёт ва санъатнинг бар-

### Қозоқбой Йўлдош



Атоқли адабиётшунос олим, мунаққид. Педагогика фанлари доктори, профессор. “Ёник сўз”, “Йўл одами”, “Зоминнинг тил қомуси” каби кўплаб асарлар муаллифи.

ча йўналишларда яратилган асарларда унга қадар кўлланиб келинган анъанавий бадиий восита ва усуллар ё бутунлай инкор қилинади, ёхуд улардан таниб бўлмайдиган даражада ўзгартирилган ҳолда фойдаланилади.

Маълумки, санъат ва адабиётдаги классик қарашлар тизими шароитида бадиий яратиқнинг ақлга мувофиқлиги (рационаллик), ижодий тажриба давомида шаклланган бадиий қолилларга риоя қилиши (нормативлик), тасвир восита ва унсурлари орасида уйғунликнинг мавжудлиги (гармония), бадиий ифоданинг аниқ, осон ва бир хил тушуниладиган бўлиши, композициянинг формал инсоний мантиқа мувофиқ қурилиши, ҳар қандай бадиий асарнинг реал ҳаётга мувофиқ келадиган йўсингдаги муайян тахминий схематик моделга эгалиги, идеални тасвирлаш кераклиги, тилнинг оддий сўзлашув нутқидан фарқ қиласидиган тарзда силлиқланган бўлиши лозимлиги сингари талаблар кўйилар эди. Бадиий ижодни муайян талабларга бўйсундирадиган бундай классик ёндашувларга исён ўлароқ юзага келган модернизм турли-туман кўринишларга эга серқатлам фалсафий-эстетик қарашлар тизимидан иборат бўлиб, бўйналишдаги изланишлар жамият ҳаётида кескин тўнтиришлар ҳамда қалтис катаклизмлар юз берган шароитда, айниқса, кучаяди. Негаки, инсон ижтимоий турмушидаги кескин чайқалишлар унинг туйғуларини мувозанатдан чиқариб, таъсирланиш ва бу таъсирни ифодалаш йўсингларига таҳрир киритади, қарашлар тизимини ўзгартириб юборади. Бу ўзгаришлар эса одамнинг бадиий дидини янгилайди.

Модернизмнинг акмеизм, символизм, дадаизм, футуризм, имажинизм, спорреализм, экспрессионизм, фовизм, шоизм, супрематизм, абсурд каби оқимлари турли ижтимоий-маънавий қалқышлар даврида юзага келиб, бадиий адабиётда ёрқин намоён бўлган йўналишлардир. Таъкидлаш керакки, агар олдинлари

бу хилдаги ижтимоий-ахлоқий силкинишлар башариёт учун ҳар замонда юз берадиган тасодифий ҳолат ҳисобланган бўлса, эндиликда тобора доимийлик касб этиб бормоқда.

Модернистик ҳиссий-интеллектуал ёндашувга кўра ҳаёт ҳамиша тартибсиз ва бебошвок; инсон тириклигининг тийиқсиз ва тайинсизлиги одамнинг ҳаётдан ўз ўрнини тополмай ёлғизланиб қолишига олиб келади; инсоннинг ҳаёти ечими ҳеч қачон топилмайдиган зиддиятлардан иборатдир. Бундай кайфият модернистик ижодкорларда санъат ҳаётуга ижобий таъсир кўрсатиб, унга тартиб ва маъно баҳш эта олмайди деган умидсиз тўхтам шакланишига сабаб бўлади. “Санъат санъат учун” чақириғи модернистик йўналишдаги барча адабий оқимларнинг асосий шиори эканининг боиси шунда. Ҳамонки, санъат асари ижтимоий борлики ўзгартириш ва унга муайян тартиб беришга қодир эмас экан, ҳаёт ва унинг муаммоларини акс эттиришдан маъно йўқ деб қаралди. Шунинг учун модернизмда кўпроқ бадиий яратиқнинг ифодавий жиҳатларига эътибор қаратилиб, объектив олам ҳодисалари ва унда қатнашадиган тимсолларни тасвирлашдан кўра объектив дунё тўғрисидаги субъектив таассуротларни, онгости импулсларнинг ўйинларини акс эттириш муҳимроқ саналади. Бу хил ёндашув санъат ва адабиётга ҳеч ким ва ҳеч нарса олдида бурчли бўлмаган идтимоий-эстетик феномен тарзида қараш имконини беради.

Модернизм ўзининг илмий-назарий асоси сифатида Ф. Ницшенинг менчилик (индивидуалистик) фалсафасига таянган бўлса, бадиий ижод моҳиятини тушуниш ва изоҳлашда З. Фрейднинг психоаналитик қарашларига суннади.

Ф. Ницшенинг менчилик фалсафасига кўра жамият ҳамиша шахсга қарши туради, индивид ва унинг манфаатлари жамият томонидан доим камситилади, ахлоқ ва қонун кўпчилик томонидан алоҳида шахснинг эркини занжирбанд қилиш учун ўйлаб топилган ижти-

## МОДЕРНИЗМНИ БИЛИШ ГАРБПАРАСТЛИК ДЕГАНИ ЭМАС

Агар одамлар қўлидаги биттагина бармоғини, масалан, жимжилогини яшириб юришанида эди, уни кўришга бўлган қизиқиши ортгандан ортарди, деган гапни кўпчилигимиз эшиштганмиз. Худди шундай, модернизм, постмодернизм каби санъат ва адабиёт йўналишларини ўрганишдан ўзимизни қанча иҳома қилсан, уни билишга бўлган ичимиздаги эҳтиёж шунча кучайиб бориши турган гап. Бу ўринда таъкидлаб айтадиган фикримиз шуки, модернизмни билишга уринишимииз унга маҳлиёлигимиздан ёки гарбпарастлигимиздан келиб чиқмайди. Асло! Кўп ва хўп билиш олим учун, шу соҳанинг катта-кичик мутахассиси учун, фикрловчи ижодкор учун қайсиdir маънода фарздек гап. Зоро, санъату адабиётдаги ҳар бир ҳодисанинг туб илдизларини соғлом назар билан ўқиб-ўрганишимииз илмий қарашларимиз бутунлигини таъмин этибгина қолмай, маънавий иммунитетимизни ҳам чиниқтиради. Шу маънода, “Ёшлик” журнали таҳририяти ташаббус кўрсатиб, адабий-маънавий ҳаётимизда муайян ўрин тутган модернизм мундарижасига эътибор қаратгани таҳсинга сазовор.

“Модернизм нима?” деган саволга профессор Қозоқбой Йўлдошев ўз мақоласида манбаларга таянган ҳолда атрофлича ва асосли жавоб берган. Мақолага ва, умуман, модернизмга багишиланган бошқа ўнлаб тадқиқотлар моҳиятига холис назар солсан, ҳақиқатан ҳам бу оқим, устоз Озод Шарафиддинов таъкидлаб айтганидек, “жўн ҳодиса” эмаслигини англаймиз. Мақоладаги фикрларни кувватлаб шуни айтмоқчиманки, модернизм 19 аср сўнгги чорагида дастлаб кайфияту дунёқарашда, сўнг тасвирий санъатда, кейинчалик адабиётда Европада пайдо бўлган санъат йўналиши ҳисобланади. Модернизмнинг яна бир номи “декаденс” бўлиб, бўхрон, инқироз маъноларини англатади. Бу нарса буржуа тузумининг ич-ичидан бўхронга юз тутиши билан боғлиқ. Модернизмнинг аниқ пайдо бўлиш вақтини ҳар хил кўрсатишади. Айниқса, унинг ижодкор бадиий тафаккурига таъсирни жаҳон урушларидан кейин кескин кучайиб борган. Яратилишига муносаб келажак қуриш орзуси билан яшаётган инсоният жаҳон урушлари вақтида миллион-миллион беғуноҳ турдошининг ёстиғи қуриганини ўз кўзлари билан



моий-этик бўғовлардир. Демак, жамият мавжудлигининг ўзи билан алоҳида шахснинг эркига дахл қилади, унинг ўйлари, туйғулари ва амалларини чеклашга уринади. Ҳолбуки, одам ҳеч қандай сабабга кўра ўз истакларини жиловламаслиги керак. Инсонни сўйиш, яъни гуманизм шуни тақозо этади. Инсонпарварлик даражаси шахсга берилган эрк миқёси билан ўлчанади.

Одам руҳиятидаги турли-туман оғишлар жараёнини синчилкаб ўрганган Фрейд инсонда содир бўладиган жуда кўпчилик интеллектуал-руҳий муносабат (реакция)лар унинг онгига боғлиқ эмас, одамнинг “мен”и табиий равишда ҳамиша кўнгилсизликлардан нарироқ бўлиб, имкон борича кўпроқ лаззат олиб қолишга мойил деган хуносага келади. У инсон хатти-ҳаракатларининг кўпчилиги онгости майллари туфайли юзага келади ва уларнинг моҳиятида асосан кўркув, очлик ҳамда ҳирсий ҳоҳишларни қондириш истаги ётади деб ҳисоблайди. Шу тариқа Фрейд ижтимоий ҳаёт ҳодисалари юзага келишини ҳам онгости майллари билан тушунтириб, инсон хулқи ва руҳияти шаклланишида ижтимоий омилларнинг ўрни катталигини инкор этади.

Минглаб йиллар мобайнида маърифат ва илму фан тараққиётига кўз тикиб, илмий-техник ривожланиш инсоният ҳәтини фаровонлаштириб, одамларро муносабатларнинг эзгулашувига хизмат қилишидан умидланиб юрган ижодкорлар XIX аср охири ва XX юз йиллик бошларида фаннинг шиддат билан ўсиши улар кутганидан бутунлай тескари натижалар берганини кўриб, тамомила ҳафсалалари пир бўлди. Биринчи жаҳон уруши келтирган вайронгарчиликлар фалсафа ва санъатда модернистик кайфиятлар авжланиб, мустақил йўналиш даражасига кўтарилишига сабаб бўлди. Очун миқёсидаги уруш туфайли одатий ҳаёт нормаларининг бузилиши янгича қараш ва муносави

батлар тизимининг юзага келиши тафаккур ва ижод одамларининг кўпчилигида фалсафа ва санъатни ҳам янгилаш майлини юзага келтирди. Зоро, фалсафа ва санъат борасида шаклланган ақидалар башариятнинг айни замондаги фикрий ва руҳий ҳолатларига мос келмай қолганди.

Модернистик санъат жаҳон уруши сабабли ижодкорларнинг одатий ўзанидан чиқариб юборилган кайфияти ҳамда умумий ижтимоий негизларнинг тушунарсизлиги аралашувидан юзага келди. Чунки кечагина ижодкорлар учун ғоят тушунарли ва тўлиқ изоҳлаш мумкин бўлган дунё бу даврга келиб бутунлай чигал ва тушунарсиз бўлиб қолган эди. Қандайдир номаълум куч ижодкорни қонга ботган одамлар тўдаси ва маънили йўсинда изоҳлаб бўлмайдиган тизгинизз ҳодисалар ўпқонига улоқтириб юборгандай эди.

Модерничилар ўзгарган даврда яшаёттан кишиларнинг янгиланган эстетик таъбиға мувофиқ келадиган тамомила янги санъат, адабиёт яратиш ниятида рационализм, нормативлик ва гармонияга таянган ва борлиққа боғланиб қолган мумтоз бадиий-эстетик анъаналардан воз кечдилар. Анъанавий санъат ва адабиётда қарор топган қарашлардан кескин фарқ қилароқ, бадиий тасвирида ҳаётга мувофиқлик эмас, балки ҳар бир санъаткорнинг оламни бошқаларга ўхшамаган тарзда индивидуал кўра билиши бош эстетик қадрият саналадиган бўлди. Чунки модерничиларнинг кўпчилиги шахсадан ташқарида ва ҳаммага тегишли ҳақиқат бўлиши мумкин эмас деб ҳисоблардилар. Бошқача айтганда, улар ҳақиқатнинг объективлигини инкор этишарди. Модерничилар ҳар бир шахснинг ҳақиқати алоҳида бўлади деб ҳисоблардилар. Шунинг учун ҳам онг билан онгиззлик ҳамда уларнинг ўзаро муносабатлари тасвири модерничилар учун энг севимили ва доимий мавзуга айланди. Модерничилар адабиёт

*кўради. Натижада у бу дунёни тадбирлар билан тузатиб бўлмайди деб, бутун эътиборни ботинга қаратади. Инсон реал ҳаётда эмас, балки ҳаёлидагина баҳтли бўла олади, деган қараш модернизмнинг пайдо бўлиши ва ривожланишига катта турткি бўлди, дейилади айрим фундаментал манбаларда. Реализм борлиқни акс эттираса, модернизм янги реаллик яратаман, дейди. Чунки маёжуð реалликни тузатиб бўлмайди, деб ҳисоблайди. Модернизм оламни хаос деб билди ва ундан қочди. Ташқи дунёда гўзаллик ўйқ, уни ботиндан қидириши керак, деб билди. Шу билан бирга, антропоцентрик гуманизмни, яъни инсонга муҳаббатни ёқлаб чиқди. Демак, модернизм деганимиз тўкликка шўхликдан атайн ўйлаб топилган метод бўлмай, башариятнинг узун тараққиёт ўйлида тарихий-сиёсий эврилишлар натижасида инсон кўнглида пайдо бўлган руҳий-маънавий инқироз билан боғлиқ ҳол – кайфиятдир. Бас, ҳол ўзгарувчандир. Бинобарин, модернизмни сигинарчасига кўкларга кўтаришнинг, унга мубтало бўлишининг ҳам ҳеч бир маъноси ўйқ. Зоро, бугунги кун инсони кўнглида эртага тамомила ўзгача ҳоллар пайдо бўлиши – нақд гап. Гарчанд мақола муаллифи “Бироз шошқалоқлик билан” айтилган фикр деса-да, модернизмдан сўнг постмодернизмнинг дунёга келиб кетгани ҳақида ривожланган мамлакатларнинг айрим олимлари жиддий бир тарзда мuloҳаза юритишмоқда. Ҳамто санъату адабиёт аллақачон неореализм даврига қадам босди, деган фикрлар ўртага ташланмоқда. Энди бу вақт масаласидир. Ким олдинргу ким кейинроқ дегандек. Чунки тарихий-ижтимоий формациялар ҳамма жойда ҳар хил кечади. Вақти ҳам, сифат даражаси ҳам фарқланади. Лекин, ўйлайманки, жаҳонда ҳеч қайси олим модернизмни “бани башарнинг доимий кайфиятдир”, деган иддао билан чиқмаса керак. Кўринадики, “изм”лар жамиятларнинг ўзгариб-алмасиб турувчи кайфиятларини санъату адабиётга кўчирад экан. Бир неча йил бурун камина “Инсон ва постмодерн дунё” деган мансура қоралагандим. Маэзуга жудаям алоқадор бўлгани боис шу ўринда кичик бир парча келтиришини лозим топдим: “Дунёниг ҳар турланиши менинг битта кайфиятим бўлгани янглиғ сен ҳам менинг биргина ҳолатимсан! Бугун борсану эртага йўқ. Аммо гап шундаки, мен сени яшаб ўтмагунимча эртанинг ҳузурига боролмайман. Сен мени эртаниги кунга йўлловчи зинанинг битта поясисан. Қадринг шу ерда. Бас, мен сени қадрлайман, аммо сигинмайман! Зинага оёғимни қўяркан, бутун борлигумни-оғирлигумни унга ташлаганим билан кўзларим олдинда, навбатдаги зинада бўлади. Ки, йиқилсан ҳам жисмим фақатгина сенинг елкалариннга тушмайди, бутун зина бўйлаб узанади у, кўрқма ва унумтма! Мен қадрингни билганим каби сен ҳам ўз ўрнингни бил! Сен менга –*

тараққиётининг олдинги даврларида ижодкорлар назаридан бутунлай четда қолган, бошқалардан ажраби турмайдиган ғоят оддий, элқатори (среднестатистик) одамларнинг ҳаёти ва ички дунёсини кўрсатишга айрича эътибор қаратдилар: модерн асарларда бундай шахсларнинг руҳиятидаги ғоят ичкин туйғулар, ўта нозик сезимлар майда икир-чикирларига қадар ба-тафсил қаламга олина бошлади. Персонажлар ҳаёти ва руҳиятининг олдинлари тасвирлаш айб саналадиган хунук ва уятли жиҳатларига қадар авра-астари ағдариб кўрсатиладиган бўлди.

Модерни ёзувчилар бадиий тасвирга янгича кўриниш бериш, бир-бирига ўхшамайдиган одамлар руҳиятининг қайтарилмас манзарасини чизиш учун шакл, восита, усул, услуга устида адоқсиз ижодий тажрибалар ўтказишдан эринмадилар. Аммо улар бош қаҳрамонни жамият қаршисида ганиб қолган ёхуд унга қарши ботиний ёхуд зоҳирий норозилиги бор шахс сифатида тасвирлаш борасида бир-бирига яқин позицияларда эдилар. Шафқатсиз борлиқ қаршисида ёлғиз ва ҳимоясиз қолган бу кимсанинг туйғулар олами уни ўраб турган воқелик қарқини (суръати) босимига дош беролмаслиги оқибатида жамиятдан бегоналашиб абор бўлишини тасвирлаш ғоят кенг ёйилди.

Ўзигача бўлган барча адабий йўналишлардан фарқли равища айнан модернизм ўз эътиборини оддий одамнинг ички оламини тасвирлашга қаратди. Модерни ижодкорлар инсонни ўраб турган воқелик ва ижтимоий муҳитни ё тасвирламасдилар, ёхуд уни ўзларининг бадиий ниятларига мос келадиган тарзда истаганча ўзгартириб кўрсатиш ўйлидан боришаради. Бунда ҳаётий аниқликка амал қиласлик, анахронизм оддий ҳол саналарди.


Кўпчилик адабиёттанувчилар модерн адабиётни кишида қайғу, чорасизлик ва зулмат туйғуларини

инсонга хизмат қилибгина қадриятга айланасан!.. Тушуняпсанми, эй, ўзгарган, минг тусда турланган ва яна жилеаланиб, ўзига бино қўйган постмодерн, аммо моҳияти ўша-ўша, мен билган дунё!..”

Модернизм ана шу тарзда пайдо бўлган экан, хўш, у ҳозир ҳам илк давридағидек мазмун-моҳиятдами? Йўқ, албатта. Модернизмни пайдо қилган дунёқарашу бадиий-эстетик тафаккур дастлабки турткини воқеликдан олишга олдию кейин вақт ўтган сари санъаткорнинг индивидуал оламида худди қор устида думалаган қор тўпи сингари каттариб, семириб, ўзгариб бораверди. Кўп ҳолларда эса ҳозир уни (ҳамто мутахассислар орасида ҳам) таниган танийди, танимаган йўқ. Чунки “изм”лар дунё кайфиятига кўра “келиб кетаверадилар-у”, уларнинг олам ва одамни акс эттириш ўйлари, ифода ва тасвир воситалари, бадиий приёмлари ўзидан кейинги “изм”ларга ўтиб, уларга таъсир этиб, бағрига сингиб бораверади. Ҳар доим шундай бўлиб келган. Йўқса, бугунги адабиёту санъатнинг мазмун-мундарижасию шаклу шамойили ху-ув ўша тош асридаги ибтидоий кўринишидан кўп-да фарқ қиласлик бўларди. Лекин, барибир, ҳамма “изм”ларнинг замирида, баъзан жуда-жуда ичкарида реализм улкан пойдевор янглиғ яшриниб ётади, деб ўйлайман мен. Шу маънода, 12-15 йил муқаддам айтган гапимни яна тақрорлашга эҳтиёж сезяпман: реализм замин бўлса, қолган барча “изм”лар шу замин бағрида униб-ўсиб мееа туккувчи турли-туман дараҳтлардир. Бу фикрининг изоҳ-исботи, назаримда, бутун бошли тадқиқот – китобни тақозо қиласли боис сўзимни мухтасар қиласман.

Хуллас, модернизм гарчи “дунё маданияти марказида европа маданияти (европоцентризм) туради”, деса-да, у билан боғлиқ бутун бошли қарашлар тизими, бу тизим вужудга келтирган санъату адабиёт ўрганилиши зарур, ўрганилмоқда ҳам. Проф. Қ. Йўлдошев жуда катта меҳнат қилиб, модернизм ҳақидаги турли адабиётлар мағзини лўнда ва қисқа ўлароқ ўкувчи эътиборига ҳавола қилишдан ташқари ўзбек адабиётидаги модерн интилишлар борасида ҳам ўзининг қизиқарли (қаердадир баҳсталаб) мулоҳазаларини илгари суради. Мақолада олим модернизм мундарижасини холис кузатади, унинг асосий критерияларини бирма бир санаб, тушунтириб ўтади. Ўйлайманки, бир тадқиқот-мақола учун шунинг ўзи етаридан ортиқ катта иш. Мақола, айниқса, ёшларимиз учун аскотади. Ҳодисанинг моҳияти билан танишиб чиққач, ёшлар модернизмга кўр-кўrona эргашмай, аксинча, уни адабиёту санъатдаги ўнлаб ўйналишлардан бири сифатида яқиндан таниб, кучли ва кучсиз қирраларидан воқиғ бўладилар.

Улуғбек ҲАМДАМ



қилиш мумкин эди. Чиндан ҳам ҳар қандай одам учун хаос (тартибсизлик) бўлиб кўринадиган борлиқ класик бадиий асарларда муайян бошланиш ва тугалланишга эга космос (тартиб) ҳолатида тасвиrlenарди. Модернизм эса очун ва унда умр кечираётган одам ҳаёти англаб етилиши ҳеч қачон мумкин бўлмайдиган тартибсизликдан иборатдир ва ижодкорнинг вазифаси реал хаосдан сунъий равишда эстетик космос яратиш эмас, балки хаос ҳолатининг ўзини мавжудликнинг универсал ва доимий шакли сифатида бадиий тасвirlab бера олишдан иборат деб ҳисоблади.

Менчи (индивидуалист) якка шахс онги ҳамда руҳиятининг чексиз олам ва тартибсиз (хаотик) ҳаётдаги ўрни, қиммати нимадан иборат эканини тушуниш ҳамда тасвиrlашга модерн адабиёт ва санъатнинг бош масаласи деб қаралди. Модернчи санъаткорлар олам ва одамнинг мавжудлик табиити ушбу масаланинг мантикий рационал ечими бўлиши мумкин эмаслигини тақозо этгани сабаб уни ҳал қилишнинг иррационал йўли самаралироқ бўлади деб қарайдилар. Бошқача айтганда, модернчилар олам ва одамга доир ҳолатларни тушуниш ҳамда тасвиrlашда рационал тафаккурнинг ижтимоий қолипга солинган совуқ, ҳиссиз ва зерикарли фикрлаш йўсунинг индивидуал шахснинг онгости ва хаёлий бўлгани боис ғайрихтиёрий, иррационал йўлаш тарзини қарши қўядилар.

Айни шу сабаб модернчи ижодкорлар ўз бадиий яратиqlарида турли мўъжиза, ривоят, сирли мифологик ҳодисалар тасвиридан мўл-кўл фойдаланишади. Таъқидлаш керакки, шу каби модернча ёндашувларнинг исломий Кунчиқиш адабий тажрибаларига яқинлашуви кўзга ташланади. Негаки, исломий-туркий адабиётда азал-азалдан инсоний ақл билан изохлаш ва англаш мумкин бўлавермайдиган илоҳий ҳолатлар тасвири ўта муҳим ўрин тутиб келган. Фақат биргина ва асосий фарқ шундаки, туркий-исломий мумтоз адабиёт намуналарида ақл билан изохлаш мушкул бўлган ғайба доир тасвиrlар мушкулотларнинг ечилиши ва қаҳрамонлар ишининг ўнгланишига хизмат қилса, модерн асарларда персонажлар қисматини янада оғирлаштириш, улар уриниб-суриниб топаётган йўлни йўқ қилишга қаратилган бўлади. Масалан, “Малика айёр” достонида Шозаргар маҳбубасини олмага айлантириб ёнида, маҳбубаси эса ўйнашини игнага айлантириб, ёқасида олиб юрса, Назар Эшонқулнинг “Баҳовуддиннинг ити” ҳикоясида маънавиятсиз одамлар билан яшашдан қийналган овоз режиссёри итга айланниб, улар орасида умр кечира бошлайди. “Алпомиш” достонида тошга чандиб боғлаб ташланган Қоражон Алпомишнинг пири Ражабхўжанинг руҳунати ёрдамида тутқунилардан халос бўлса, “Жараён” романидаги Йозеф К. ғайрихтиёрий тарзда ишга кетаётib, суддан, судга кетаётib, ибодатхонадан чиқиб қолаверади. Яъниким, фольклор ёхуд мумтоз адабиёт намуналарида мистик тасвиrlар қаҳрамоннинг ҳолатини енгиллатишга хизмат қилса, модерн асарларда уларнинг қисматини оғирлаштиради. Айни шу мистик ҳолатлар тасвири акс этган ўринларда ҳамиша Яратганга ишониб, унга тавакkal қилган ва бутун ихтиёрини берган мўмин билан Кунботишнинг ҳар бир қадамини ўз тафаккурига таяниб босадиган ва шунга яраша натижага эришишни кутадиган одами руҳияти ва қисмати ўртасидаги кескин айрма намоён бўлади.

Ботиш адабиётида, айниқса, маърифатчилик давридан эътиборан, олам ва одамга доир барча ҳолату ҳодисаларни инсон ақли билан изохлаш мумкин ва лозим, одамнинг тафаккури ҳар қандай мушкулотни ечишга қодир деган қараш қарор топган эди. Д. Де-фонинг “Робинзон Крузо”, Ж. Свифтнинг “Гулливернинг саёҳатлари”, Ж. Руссонинг “Эмил ёки тарбия”, “Янги Элоиза” сингари кўп асарларда фикр одами ўз йўлида дуч келадиган барча мушкулотларни бартараф қила олиши акс эттириларди. Адабиёт ривожининг романтизм, танқидий реализм ва реализм сингари босқичларида ҳам инсоният тақдирида тафаккур бекіёс катта ўрин тутиши тасвирига алоҳида эътибор берилди. Жуда кўпчилик ижодкорлар ҳар қандай жамиятни разолату ёвузликлардан айнан ақл кутқаришига ишонар эдилар ва бу инончларини бадиий яратиqlарида акс эттирадилар. Шунингдек, адабиёт аҳлида ҳаётнинг бадиий тасвирга тортилган қисми шартли бўлса-да, бутунлик хусусиятига эга ҳолда акс эттирилиши керак деган қараш ҳоким эди. Модернистик адабиёт бадиий тасвиrlenарнинг маконий ва замоний доирасини чеклайдиган ана шу қарашларни инкор этиш орқали бадиий адабиётнинг имкониятини янада кенгайтироқчи бўлди. Яъни, модерн адабиёт инсоният тафаккурининг юксалиши унга баҳту саодат эмас, балки азобу укубат олиб келиши ҳам мумкинлигини конкрет инсоний тақдирилар мисолида кўрсатиб берди. Шунингдек, модернизм борлиқ ва ҳаётга ҳеч қандай тугалликка эга бўлмаган, сон-саноқсиз умр ва тақдириларни ўз гумига тортиб кетаверадиган узлуксиз оқим тарзида ёндашиш тажрибасини бошлаб берди.

Модернчилар классик санъат асарларидаги барча таркибий тузилмаларни ислоҳ қилдилар. Бу ҳол ҳар қандай бадиий асарда муҳим ўрин тутадиган образларга характеристика беришнинг ўрни ва усулларидай масалада, айниқса, яққол намоён бўлади. Модернистик адабиётга персонажлар руҳиятининг универсал тасвирини бериб ўтираслик ёки антипсихологизм хосдир. Яъни, классик адабиётда одамга унинг руҳиятидаги муайян белгиларга таяниб, кейинги хатти-ҳаракатларини башорат қилиш мумкин бўлган яратик сифатида ёндашиш хос эди. Модерн адабиётда эса, одамни ҳар бир конкрет ҳолатда ўзгача руҳий жараёнлар оғушида бўладиган яратик сифатида тасвиrlаш қарор топди. Негаки, модернизмда одам программалаштириб қўйилган механизм эмас, балки онгости ёхуд онгдан ташқаридаги импулслар таъсирида ҳам иш кўриши мумкин бўлган яратик экани кўзда тутиларди. Модернчилар одамнинг ҳолатига доир барча ўринларда сабаб-оқибат муносабатларига риоя этувчи детерминистик ёндашувга қарама-қарши ўлароқ, адабий тимсолларга ижтимоий тавсиф бериш ёки уларнинг руҳий ҳолатлари сабабларини уларнинг ўзидан ташқаридаги омиллар билан изохлаш адабиётнинг рационал фанлар билан келишуви оқибатидир ва айни шу боис ғайриинсонийдир деб ҳисоблайдилар.

Модернчилар томонидан севиб тасвиrlenадиган тимсоллар: Кафканинг “Эврилиш”идаги хизматчи Грегор Замза, Жойснинг “Улисс”идаги Маклер Блум, Камюнинг “Бегона”сидаги Клерк Мерсо сингари фавқулодда ёрқин хислатларга эга бўлмаган “кичик одам”лардир. Улар – интеллект ё эътиқод кучи, ёки характер хусусияти билан ташқаридан бўладиган зуғумларга етарлича қаршилик кўрсата олмайдиган кимсалар. Бу образлар

адабиёттандувчилар айтадиган “қаҳрамонлар” эмас, балки айнан қаҳрамон бўлмаган ва бўлолмайдиган кўпқатори оддий одамлардан чиқсан адабий персонажлардир, холос. Оила, давлат, жамият, ишхона улар учун ҳеч қачон англаб бўлмайдиган бегона, ҳатто, душманлик қиласидиган ижтимоий институтлардир.

Адабий персонажга модернистик ёндашув баён йўсунининг макон ва замон жиҳатдан изчилиги ва воқеаларнинг хроникал кетма-кетликда тасвирланиши шартлиги талабига ҳам барҳам берди. Модерн ижодкорлар баённинг ички ва ташки ритмини бирбиридан ажратиб, бадиий ҳамда бирламчи реал замон ўртасидаги фарқни ўзаро яқинлаштириб бўлмайдиган даражада чукурлаштириб юбордилар. Бирламчи реал вақт бу тарихий замондир. Тарих англамсиз ва одамларга ўз мавжудлик сирини очмагани учун модернчиларнинг қаҳрамонлари тарихий замонда яшмайдилар ёки яшай олмайдилар. Улар кўпроқ ўтмиш ва ҳозир ёнма-ён бўлган ҳамда келажақдан ажратиш мумкин бўлмаган ўзига хос шартли хаёлий замонда ҳаёт кечирадилар. Модернистик асарларда нимаики тасвирланган бўлса, у ҳамиша содир бўлган ва ҳеч қачон содир бўлмаган; ҳамма ерда юз берган ва ҳеч қаерда юз бермаган ҳодисалардир дейиш мумкин.

Модернизм бадиий адабиёт ихтиёридаги тасвирий воситалар тизимини ҳам тубдан янгилашга уринди. Адабиётнинг ифодавий уфқини кенгайтирган, одамни идрок этиш ва тасвирлаш маромини тамомиля янгилаган “онг оқими” унинг асосий кашфиётидир. Модернизм бадиий асарнинг маконий ва замоний чегараларини хаёл етмас даражада кенгайтириди. Агар олдинлари бадиий асарларда бир-икки, ошиб борса, уч-тўрт сюжет чизиги тасвирланган бўлса, модерн яратиқларда кўплаб сюжет чизиқларининг ўзаро бирлашуви, кесишуви, қоришиб-чатишуви, айрилуви тасвирланаверадиган бўлди.

Модернистик асарларда қаҳрамоннинг ички монологи, унинг ўйлари, изтироблари тасвирининг мавқеи мисли кўрилмаган даражада ўстанлиги бадиий яратиқларда муаллиф нуқтаи назари ва унинг нутки аҳамиятининг пасайишига олиб келди. Модернистик адабиёт учун ҳаёт ҳақиқати ва анъаналарга мувофиқ амалга оширилган тасвирга нисбатан олам ҳамда одамни ўз ҳоҳишига мувофиқ тарзда тасвирлай оладиган санъаткорнинг эркин назари устувор ҳисобланади. Муаллифнинг нимани назарда тутгани эмас, битганида нималар тасвирлангани мухим саналади.

Санъатнинг ижтимоий, сиёсий, диний, мағкуравий каби турли нобадиий бўғовлардан устун турадиган эркин ва озод ҳодиса эканига устуворлик берадиган эстетик стратегия модернистик йўналишнинг асосий белгиси саналади. Модернизмда классик санъатдаги миметик (тақлид) принципидан бутунлай воз кечилиб, бадиий мазмундан кўра шаклга бирламчи аҳамият қаратилди, шаклнинг ўзига мазмундан асло кам бўлмаган моҳият тарзида ёндашиладиган бўлди. Натижада, бадиий яратиқнинг кўриладиган (визуал) ҳамда эшитиладиган (аудиал) жиҳатлари мутлақлаштирилиб, у бошқа эстетик ҳодисалар томонидан кўллаб-куватланишга эҳтиёж сезмайдиган, ўзи ўз борлигини оқлайдиган тамомила ўзига хос бадиий эстетик борлиқ тарзида тақдим этиладиган бўлди.

Модернизмда юзага келтирилган бадиий яратиқларнинг адабий тур ва жанрлар борасидаги ода-

тий қолипларига мувофиқ келишига кўпда эътибор қилинмайди. Бунда санъат билан борлиқ ўртасидаги чегара бузилиб, ўқирманнинг эстетик истеъмолчидан ижодий кечимнинг иштирокчисига айлантиришига уринилади. Модернизмда адабиёт ва санъат зиммасига ортиқча ноэстетик юк ортиш кўзда тутилмайди. Бу қарашга кўра ёзувчи ва бадиий асар ҳеч кимнинг олдида бурчли ҳам, ҳеч кимга хизмат қилишга мажбур ҳам эмас. Бу хил ёндашув модерн ва постмодерн йўналишларидаги асарлари билан ном қозонган ҳамда модернизмнинг назарий асосини яратган италиялик адид Умберто Эко 1980 йилда билдирган фикрда яққол кўзга ташланади: “...факат замонни ҳисобга олиб ва дунёни ўзгариши мўлжални билангина ёзиш мумкин деган қараш мавжуд эди. Ўн йилдирки, ёзувчи шахсининг эрки борлиги ҳамда азбаройи яратиш кечимига муҳаббат туфайли ҳам асар ёзса бўлишига кўпчилик кўнишиб қолди”. Шу вақтга қадар бадиий адабиёт жамиятни ўзгариши, даврни яхшилаш, одамларнинг ҳаётини тўғри йўлга солиш сингари буюк ниyatларга хизмат қилиши позим бўлган ҳодиса тарзида қараб келинарди. Айниқса, бизда адабиёт “адаб”дан олинган ва у, албатта, ўқирманга одоб ўргатиши керак деган ёндашув ҳукмон эди (бу қараш ҳозирда ҳам ўз мавқеини йўқотгани йўқ). Модернистлар ёзувчи ҳам кўп қатори ҳом сут эмган банда ва у ўз битикларини юқоридагидай оламшумул мақсадларни кўзда тутиб ўтирай, шунчаки ўзининг ёзишга бўлган ички эҳтиёжини қондириш учун ҳам яратиши мумкин деган қарашга таянадилар.

Модернизмда бадиий ижод турли даражадаги ижтимоий муаммоларни кўтариш ва ҳал этиш учун эмас, балки, аввало, санъаткорнинг ёзиш кечимишининг ўзидан баҳра олиб, ички безовталиқдан халос бўлиши, иккинчидан, дунёга келган асарнинг рецептиент (ўқирман, истемолчи)га завқ берадиган гедонистик функцияни бажара олиши ижодкорнинг асосий вазифаси ҳисобланади. “Санъат санъат учун” деган қараш ҳам айнан шу ёндашувдан сувланади. Модернизмда санъат асари яратилишининг ўзи мухимдир, ундан муайян маъно келтириб чиқариш ёки чиқармаслик ўқирманнинг таъби ва интеллектуал даражасига боғлиқдир деб қаралади.

Модернизмнинг, биринчи навбатда, илмий нуқтаи назар, фалсафа ва психология экани, санъатдаги турли кўринишлар модернистик қарашлар тизимининг амалда намоён бўлиши эканини кўзда тутиш уни тушуниш сари йўл очади. Кўпчилик ўзбек олимлари ва ижодкорларида шаклий-мундарижавий жабҳадаги ҳар қандай янгиликни модернизм ҳисоблашга мояил ёндашув қарор топганки, буни асло тўғри деб бўлмайди. Модернизм узоқ вақт давомида маърифат юксалиши, илм-фан ва техника тараққиёти инсоннинг ҳаётини фаровонлаштириб, одамнинг табиатига эзгулик бағишлишига ишонган Кунботиши ойдинларининг фан-техника ривожининг инсоният бошига соглан даҳшатли фожиаларидан воқиф бўлгандан кейин пир бўлган ҳафсаласи, синган кўнгли ва умидсиз тафаккури маҳсулидир.

Эзгулик, олижанобликнинг ёмонлик ва ёвузлик томонидан жаҳоний миқёсда маҳв этилиши ижодкор кишиларда қадриятларга муносабатни ўзгариши зарур деган фикрни келтириб чиқарди. Бунда инсоннинг ўзи бош қадрият экани, у ҳеч ким ва ҳеч нарса



олдида бурчли бўлмаслиги, ўз кўнгил майли ва хоҳиш-истакларигагина бўйсуниб яшashi мақсадга мувофиқ деган тўхтам устувор бўлади. Модернизмда ҳар бир одамга алоҳида яратиқ сифатида қарапади, ҳар қандай одам ҳам одамдир ва унинг атрофидаги табиий ҳамда ижтимоий борлиқ унинг истагу манфаатларига мувофиқ бўлиши керак деган қарашга асосланган менчилик фалсафасига таянилади. Олами сагир бўлмиш инсон аклининг олами кабир саналмиш ўн саккиз минг оламдаги хаотик ҳодисаларни тўлиқ идрок қилиш, бехато изоҳлаш ва башорат қила олмаслиги модернизмда тартибсиз дунёни тушуниш мумкин эмас, бинобарин, олам ва одамга тегишли ҳодисаю ҳолатларни бошу охири бор мавжудлик сифатида кўрсатиш сунъи伊利қидир деган тўхтамни юзага келтириди.

Фрейд томонидан илгари сурилган онг оқими тушунчалик инсоннинг нафақат ижтимоий турмуши, балки ақлий фаолияти ҳам хаосдан ибораттир деган қарашнинг қарор топишига хизмат қилди. Бу таълимот таъсирида инсонни ҳаракатлантирадиган ёлғизигина омил либидо, яъни ҳирсий майлар, одам умри давомида нималарни ўйлар, сўйлар ёки қилар экан, аслида, эҳтимол, ўзи ҳам билмаган ҳолда ҳирсий майлар етовида юрган, ўша майлар истагини бажараётган бўлади деган тўхтам шаклланди. Ўз навбатида бу қараш инсонга ижтимоий-биологик жиҳатдан маъқул бўлган барча нарса тўғридир ва одам ўзига мақбул бўлган бирор нарсадан уялмаслиги, хижолат чекмаслиги керак тарзидаги ёндашувни юзага келтириди. Модернизмда ялангоч тасвирлар кўпайиши, эротик саҳналар бадиий тасвир обьектига айланишининг сабаби шунда. Бу майл, айримлар айтиётганидек, инсониятнинг ахлоқини бузиб юбориш ниятида ўйлаб топилмади, балки инсон эркини ҳар қандай чеклаш зулмидир, инсонга маъқул ҳар қандай тутум эса ахлоқийдир деган максималистик қараш туфайли дунёга келди. Бундай ёндашувнинг юзага келишига сабаб менчилик фалсафасига кўра индивиднинг истакларига ўтказилган ҳар қандай зуғум зулмидир, ҳар бир одам бетакрор бўлгани учун ҳам шахснинг хоҳишларини ҳар қандай қолипга солиш унга қилинган зўрлик бўлади. Бу фалсафа назарида, ҳатто, ахлоқ ҳам, жамиятда ўрнатилган маънавий нормалар ҳам инсон шахсига қилинган зўрлиқдан бошқа нарса эмас.

Шу хилдаги қарашлар тизими модернизм фалсафасини юзага келтириди. Кўриниб турибдики, у адабиёт ва санъатдаги шаклий тажрибалардангина иборат эмас, балки асосан олам моҳиятини англаш йўлидаги фалсафий-руҳоний изланишлар натижасидир. Шу изланишларга мувофиқ олам ва одамга ўзгача кўз билан қараш, ўзгача кўрилганларни ўзгача йўсинда изоҳлаш ва тасвирлаш тамойил ҳамда тизимлари юзага келди. Умумлаштириб айтганда, модернизмни инсоннинг Аллоҳ ва У яратган олами тушуниш ҳамда изоҳлашдаги қонуний оқизлигидан табиий равища келиб чиқкан исён натижасидир дейиши мумкин. Илоҳий тартиботга қилинган ҳар қандай исён куфрdir. Одам тафаккури кучига ортиқча баҳо бериш инсонда кибр пайдо қилиб, уни куфрга етаклайдиган асосий омил ўлароқ ёзғиришга лойиқидир. Айни вақтда қандайлигидан қатъи назар модернизм фалсафа, санъат ва адабиётда анча чуқур томир отган ҳодиса, бинобарин, илмнинг вазифаси ана шу ҳодиса моҳиятини тўғри изоҳлашдан иборат.

Миллат тараққиётининг муайян давридан эътиборан ўзбек санъат ва адабиётида ҳам модернистик ёндашувлар бўй кўрсата бошлади. Шуни айтиш керакки, ўзбек модернизми бир қатор ўзига хосликларга эгадир. Эътибор қилинган бўлса, ушбу мақоланинг бошида “Модернизм ўзининг илмий-назарий асоси сифатида Ф. Ницшенинг менчилик (индивидуалистик) фалсафасига таянган бўлса, бадиий ижод моҳиятини тушуниш ва изоҳлашда З. Фрейднинг психоаналитик қарашларига суюнади”, - дейилган эди. Ўзбек модернизмининг ўзига хослиги айни шу ҳал қилувчи икки жиҳатга муносабатнинг бошқача эканлигига намоён бўлади. Яъни ҳар қандай ўзбек санъаткори шахс билан жамиятни бир-бирига мутлақ ва ўзгармас қарама-қарши бўлган ҳодисалар тарзида қарамайди. Шунингдек, ўзбек борлиқка шахсни маҳв этишгагина хизмат қиладиган яратиқ сифатида ёндашмайди. Ўзбек ижодкори минглаб йиллик этно-генетик хусусиятларига кўра ва эътиқод жиҳатидан мўмин бўлгани сабаб у одам деб аталмиш яратиқ ақлан қанчалик етишмасин, маънан нечоғлик камолотга эришмасин, олам ҳодисалари моҳиятини ҳеч қачон тўлиқ англаб етолмаслигини билади. Шунингдек, ўзбек одам қанчалик уринмасин, у тўла мукаммал бўлолмаслиги ва инсонликнинг энг муҳим белгиси унинг мавжудлиги ўзга одамнинг мавжудлигига халал бермаслиқда эканини табиий ҳисоблайди.

Кўпчилик ўзбеклар Яратган амридан ташқаритикан ҳам кирмаслигига ишонади ва умри давомида шунга кўнишиб боради. Унинг қарашлар тизими шунга мутаносиб тарзида шаклланади. Худди шу жиҳатлар миллат фалсафий қарашлар тизимида модернистик ёндашув етакчи бўлолмаслигини келтириб чиқаради. Кунботишлеклар эса оламда тасодиф борлигига ишонишади. Муайян ҳозирликлар билан ўша тасодифларнинг олдини олиш ёки унинг таъсир кучини камайтириш мумкин деб ҳисоблашади. Уларнинг, ҳатто, қиёмат қоимдан четда қолиш мумкин деб ўйлашлари 2012 йил 21 декабрда юз бериши кутилган “апокалипсис”га муносабатда яқол намоён бўлди. Айримларнинг ғорга, баъзиларнинг ертўлаларга, кимларнингдир еrosti йўлакларига кириб жон сақламоқчи бўлганларидан уларнинг бу борадаги тушунчалари аёнлашди. Мусулмон дунёсида эса, аввало, бундай “аниқ”ликка ишонилмади. Иккинчидан, кимнингдир қиёматдан четда қолиши мумкинлигини хаёлга ҳам келтирилмади. Тўғри, ўзбеклар орасида ҳам тамомила кунботишча ўйлайдиган ижодкор шахслар бўлиши мумкин. Аммо улар ҳеч қачон бутун бир фалсафий-эстетик йўналиш мавқеига эриша олмайдилар.

Айтилган сабабларга кўра ўзбек адабиёти ҳамда санъатида модернизм олам ва одамга тегишли ҳодисаю ҳолатларни изоҳлашда олдин мавжуд бўлган қарашларни инкор этиш тарзида эмас, балки уларни кўриш ва бадиий акс эттиришнинг бир қадар ўзгачалигига намоён бўлади. Шу туфайли ўзбек модернизмини Кунботиш модернизмидан фарқли ўлароқ, олам тартиботи ва унинг Яратувчисига ижодий исён натижаси эмас, балки айни шу ижодкор шахсда кечётган инжа руҳий-интеллектуал ҳолатнинг ифодаси тарзида юзага келган ҳолаттир дейиш тўғрироқ бўлади. Модернча ёзаётган ўзбек санъаткорлари мумтоз тажрибаларга таянган ҳолда модернизмнинг фалсафий постулатларига эмас, балки кўпроқ ифо-

да йўсинидаги инжалик ва кутилмаганликка эътибор қаратишяпти.

Ўзбек ойдинлари орасида модернизмга истеъдодсизликни яшириш воситаси деб қараш анча кенг ёйилган. Ҳолбуки, айнан модернизм бадиий адабиётни истеъдодсизлик ва қолидан халос этиш мақсадида юзага келган ҳодисадир. Айнан модернизм бадиий яратиқ мавзу долзарблиги, фикр янгилиги, ифоданинг тушунарлилиги сингари ташки белгилар сабабли эмас, балки чиндан ҳам бетакрор ва оригинал битилгани учун ўқилишини исташ оқибатида пайдо бўлган. Шунингдек, ижодкор ва синчи-адабиёттандувчилар орасида модернизмга оммавий маданиятнинг ёйилиши ва миллӣ диднинг пасайишига сабаб бўладиган фалсафий-эстетик ҳодиса тарзида қараш ҳам бир қадар тарқалган. Аслида айнан модернизм чинакам бадиий ижод ҳеч қачон оммавий бўлмаган ва бўлмаслиги ҳам керак деган қараш натижаси ўлароқ юзага келган. Модернистик санъатнинг ўнлаб оқимларидан бирор таси бадиий ижод жараёни ва бу кечим маҳсулининг оммавий бўлишини талаб қилмайди. Модернизм узоқ йиллар давомида айнан оммавий бўлмагани, кўпчилик томонидан тушунилмагани учун танқид қилиб келинди. Ҳатто, бугунги кунда ҳам модерн йўналишидаги битикларнинг кенг омма орасида ёйилмаётганлиги, у ҳамиша ўзининг хос ўқирманларини кўзда тутиши маълум-ку?

Модернизм ўзининг барча турли-туман кўринишларида реал борлиқдан юксак мавжудлик ёки онгости макони сингари ҳодисаларни билиб олиш ва татбиқ этишга интилади. У асл ҳақиқат, ҳаётнинг моҳияти айнан ўша реал борлиқдан юксак мавжудлиқда яши-ринган деб ҳисоблайди. Шуни ҳам алоҳида таъкидлаш керакки, гарчи, модернизм бадиий тилга кўп ўзгачаликлар киритган, тасвирий ифода борасида жиддий ислоҳотлар қилган бўлса-да, мавжуд бадиий тилни мутлақо инкор этмайди. Лекин у бадиий асар тили шахснинг онгли, онг ости ва онг оқими таъсиридаги руҳий ҳолатини ифодалайдиган бўлиши керак деб ҳисоблайди.


Ўзбек адабиёттандувчилигида модернизм ҳодисаси ва шу йўналишда битилган асарларга муносаб ҳам ўзига хос тараққиёт йўлини босиб ўтди дейиш мумкин. Кейинги ярим аср мобайнида модернизм “Бу адабий оқим ҳалққа ёт бўлган мазмунсиз санъатни тарғиб этиш, мистикани, фаҳшни куйлаш, адабий формаларнинг ташки безакларига берилиб кетиш каби буржуа адабиётига хос хусусиятлар билан характерланади” йўсинидаги сиёсий айбловдан “... объектив воқеликнинг тасвири ўрнига унинг ижодкор тасаввуридаги бадиий моделини яратишни мақсад қиласди. Яъни ...воқеликни акс эттириш эмас, ижодкорнинг ўз-ўзини ифодалаши устувор аҳамият касб этади. Ижодда субъективликнинг опдинги ўрнига чиқарилиши мантикий билишдан интуитив билишнинг юқори кўйилиши, инсон ички оламида кечувчи тизгиниз сиз эврилишларга айрича эътибор берилиши, ижод-

кор шахс тахайюли ва у акс эттирган воқеликнинг бетакрор ҳодиса сифатида тушунилиши, ўз ўй-хисларини ҳеч қандай (маънавий, ахлоқий, сиёсий ва ҳ.) чекловларсиз ифодаланиши ҳуқуқининг эътироф этилиши модернизмга хос хусусиятлардандир” тарзидаги илмий эътироф даражасига ўсиб етилди. Гарчи, бугунги кунда ҳам “Модернизм – ашаддий нигилист, ҳеч қандай қонун-қоидани, ақидани, жамоани ва жамиятни тан олмайди. Ҳеч нарсага ишонмайди, бунинг устига беҳаё, сурбет. Диққатини ғоявий мазмунга эмас, асосан шаклга, мавхум шаклбозликка қаратади. Символизм, импрессионизм, сюрреализм, модерн, экспрессионизм деганлари ҳам модернизмнинг турли тармоқларидир. Барчasi реализмга қарши, барчасига тушкунлик хос ”тарзидаги ҳамда модернистик йўналиш ўзбек адабиёти учун мутлақо бегона, миллий адабиётимизда бу йўлда яратилган бирорта ҳам асар йўқ, у айрим ижодкорларнинг ўз истеъдодсизликларини яшириш воситасидан бошқа нарса эмас қабилидаги ёндашувлар мавжуд бўлса-да, адабиёт жабхасида юз бераётган ўзгаришларга соғлом ва холис назар билан қарайдиган кўпчилик мутахассислар томонидан “Модернизм ҳаётни юзаки, натуралистик ...қолипда тасвиrlашдан кўра воқеа-ҳодисаларнинг фалсафий моҳиятини очиш, ички жараёнини ёритишни афзал билган адабий оқим” экани қайд этилмоқда. Айни вақтда, модерн йўналишнинг моҳиятини “...модернизм танқидий реализм, хусусан, социалистик реализм ақидаларига қарши турган адабий оқим бўлиб, асрнинг олтмишинчи йилларида ўз умрини яшаб бўлди ва ўрнини постмодернизм деб аталувчи янги оқимга бўшатиб берди” тарзида бироз шошқалоқлик билан изоҳлашга уринишлар ҳам барҳам топгани йўқ.

Миллий адабиёттандув илмида модернизмни фагат турли шаклий изланишларни амалга оширишдан-гина иборат кечим тарзида тушуниш ҳам кенг ёйилган. Бунга кўра, бадиий ифодада мавжуд анъаналардан ҳар қандай чекинишига модернизмнинг юзага келиши тарзида қаралади. Умуман олганда, жуда теран ёзилган бир мақоладаги: “Салим Ашур ижодида шаклий, мантикий тажрибалар, яъни модерн шеърлар салмоқли ўрин тутади. Айни пайтда шаклбозликка, экспериментларга маҳлиё бўлиб, шеърнинг асосий шарти – тирик қалбнинг тирик туйгуларини четлаб ўтмайди”, – шаклидаги қарашлар битилгани фикримизнинг асосидир. Модернизмдай серқирра эстетик ҳодисани бу қадар жўн ва енгил изоҳлашга доир мисолларни кўплаб келтириш мумкин.

Ёндашувлар тизимидағи бундай хилма-хилликни тушуниш мумкин. Чунки жараён тўхтагани йўғу ҳамон кечмоқда. Тўхтамаган кечим борасидаги тўхтамлар ҳам хилма-хил бўлиши табиий. Шунга таянган ҳолда бадиий ижодда пайдо бўлган бирор йўналиш, жумладан, модернизм ҳам изсиз ўйқолиб кетмайди. Инсониятнинг бадиий диди такомиллашиб боргани сари ижод кечими ҳам борган сари турфалашиб бораверади деб ўйлаймиз.





Мунаввара ҚУРБОНБОЕВА

*Нази Нази  
Нази Нази Нази*



## *Дилимга умидлар ташлаётир чўг*

### **ЙИЛЛАР ТЎФОНИДА...**

Йўлларнинг измида югурдимми мен,  
Ё йўллар югурди менинг измимда.  
Йиллар тўфонида йикўлдимми мен,  
Ё йиллар йигилди менинг жиссимда.

Устма-уст қалашар чехрамда йиллар,  
Умрим саҳнасида қатма-қат парда.  
Шу қалин пардалар аро не диллар,  
Қолган қаҳрамонлар қиларлар зарда.

Баъзилари келган зарур вақтида,  
Баъзилари эса бевақт, бесўроқ.  
Собитлар бўлолди маҳкам аҳдида  
Йилларни чангидаги қолдирган Буроқ.



Йиллар йўлларида адашмадимми,  
Кай ҳислар ёнимда вафо малаги?  
Шу кунгача адл тутган қаддимни  
Умид гиёҳидир, боқий палаги.

Умр бепоёнмас, ўиллар бесарҳад,  
Вақт келар, жиссимиш ошолмас довон.  
Эзгу иши ва ўлмас сўзимиз албат  
Биздан сўнг яшашида қиларлар давом.

\* \* \*

Насиб бўлса ҳали яшайман узоқ,  
Дилимга умидлар ташлаётир чўг.  
Атрофимда бедор қанча дўстларим,  
Улар қайғусига сабаб бўлгим йўқ.

Мен ҳали яшайман жуда ҳам узоқ,  
Ташвиши камонидан ёғилса-да ўқ.  
Атрофимда сергак қанча нодўстлар,  
Улар қувончига сабаб бўлгим йўқ.

### **ЎЗИНГ**

Сен дилимни қилдинг парварии  
Изтироблар оғуши билан.  
Юрагимни силадинг согинч,  
Хижронларнинг қиличи билан.

Мұхаббатим улгайтдинг кун-кун,  
Фироқ, ҳажср, сабр едириб,  
Кўнглим гулин ўстирдим қуюн,  
Бўронларинг тигида юриб.

Кам-кам берган дард – заҳринг ютиб,  
Дориворлик касб этди қоним.  
Энди юрак-жомимни тутиб,  
Шу малҳамни ўзинг ич, жоним...

Мунаввара  
ҚУРБОНБОЕВА



Қорақалпогистон Республикасининг Беруний туманида туғилган. ТошДУ (ҳозирги ЎзМУ) нинг рус филологияси факультетини тамомланган. "Келдинги, баҳор", "Жайхун чечаги", "Зангори шамоллар" каби китоблар муаллифи.

## ИШК

Ишк, берган кулоҳинг бошимда тожим,  
Жанданг кийиб бегард, пок бўлди лошим.  
Дунёлар кўзимга гардча кўринмас,  
Етгайму божиннга умрим – хирожим?

Саҳронгда оҳу-ла улоқиб юрсам,  
Даштларингда жсаннат гаштни сурсам.  
Нафис жароҳатлар болини тотиб,  
Тиконга тилиниб саёҳат қурсам...

Ялаб даволармиши ярасин кийик,  
Заҳм урсанг зардоби дилимга дори.  
Йўлингда қурбонлик – мукофот буюк,  
Юрак шундай босар ишқнинг хуморин.

Ишк! Бу не чоғ сафо, бу не хонзодлик,  
Сендан гариблик ҳам нақадар ҳашам!  
Руҳингдан етади қулга озодлик,  
Хурлигиндан кийгай озодлар кишин!

\* \* \*

Мен бодга гул бўлиб очилиб турдим,  
Базринг не қаро қон демади бир кас.  
Сариқ чечак ола билмади дардим,  
Кишининг оқ гулига тугилди ҳавас.

Мағурман, яшнайман, изгирап аёз,  
Ёнаман, ҳар битта япрогимда чўё.  
Мени совуқ урса ийгламагин, ёз,  
Кишида мендек кула олган бир гул ийқ!

\* \* \*

Етгим келар ёнингга жуда,  
Дўстим, қара, кўзларимда нам.  
Бегонаман дунё авжига,  
Уиласам ҳам қўлидан маҳкам.

Бўлиб кетолмадим қон-қондош,  
Ноаёндир олам насаби.  
Гарчи унга турибман ёндош,  
Менга қараб келар газаби.



Унинг билан бўлолмадим эл,  
Мендан шунча етганми алам?  
Дунёни қўй, сен ёнимга кел,  
Яратамиз бетакрор олам.  
Сенсиз менинг киприкларим нам...

## БИЛМАДИНГ

Мен сенингсиз яшарман қандай,  
Топинарман қайси томонга?  
Ишончим ҳам қўйди ишонмай,  
Бутун баҳту синиқ армонга.

Юрагимда етилган эди  
Ҳали дунё қўрмаган гуллар.  
У чечакни баҳолармиди,  
Англармиди бағри бутунлар?

Кунлар билан ўйнашиб юриб,  
Қилганингда йилларни эрмак,  
Билолмадинг ҳатто туш қўриб  
Дил ўйнамак – ўзни бой бермак.

Ўтди йиллар измида кун, ой,  
Кўнглим ямаб яримлар туним.  
Синиб тушди бу тун ҳатто Ой,  
Билмадинг-ку, бағри бутуним!..


## КИМДИР

Мен баҳорга энтиқдим,  
Юрагимга гул тикдим.  
Қачон келар экан деб,  
Ҳар кун бармоғим буқдим.



Ҳар бармоғим буқканда,  
Тўқилибди кунларим.  
Мен кимнидир кутганда,  
Унутибди кимларим.

Ҳаёт ўзи шу экан –  
Кимни деб умринг ўтар.  
Кимдир букиб бармоғин  
Умрбод сени кутар...



Фармон ТОШЕВ

Наср Наср  
Наср Наср Наср



## КЕЧИККАН БАЙРАМ

Хикоя

Бу сафар янги йил арафасида Акмал дўхтири нинг омади келди: байрам оқшоми навбатчилик қилишдан кутулиб қолди, бу иш бошқа врач чекига тушди. Шу боис у ҳамкаслари билан хайрлашгач, тушдан кейин бозорликни ўзгача ишиёқ ва дид билан қилди, айниқса мева-чевани эринмасдан саралаб олди, хотини Шоҳистанинг «катталарингизга Худо қандай инсоф берди» деган киноясига эса «сизнинг оҳу зорингиз дилини юмшатган-да» деб ҳазил аралаш жавоб бериб қўяқолди. Рафиқасининг хурсанд бўлиб, дастурхон тузатаётганидан завқланиб яна гап қўшди:

– Қаранг, бир ҳафталик қуруқ совуқдан кейин қор ҳам ёға бошлади. Буям сиз учун, аяси...



Фармон ТОШЕВ



1954 йилда Пахтаки туманида туғилган. Самарқанд Даёлмат университетида таҳсил олган.

Айни пайтда «Зарафшон» газетасининг бош муҳаррири.

«Қарнабчўл қўшиғи» (1994), «Онанг тирик, болам» (1995), «Мен ёмғирли кунда келаман» (1998), «Қарнабота армони» (2003), «Журналистнинг нони қаттиқ» (2004), «Отамнинг сабоқлари» (2006), «Умрнинг ўртаси» (2006), «Ўзимдек яшани истайман» (2006), «Бедаво қўнгил» (2009), «Сўз айтмоқ саодати» (2011), «Софинг» (2011), «Аёллар нима дейди?» (2012) китоблари муаллифи.

2013 йилда «Меҳнат шуҳрати» ордени, 2013 йилда «Эл-юрт ҳурмати» ордени билан мукофотланган.

Беш йилдан бери эрининг оила даврасида илк бор ўтириши мумкинлигидан дили таскин топган бўлса-да, Шоҳиста ичидаги гапни яшира олмади:

– Лекин, билиб қўйинг, бу оқшом биз билан бўласиз, қўшни ёки ўртоқларникига табриклишга бориш йўқ, хўпми?

– Хўп-хўп, хотинбой, осмон узилиб ерга тушса ҳам шу бугун уйдан чиқмайман. Сизнинг гапингизни икки қилгунча саккизта, боринг-ей, ана, саксонта шайтоннинг бўйни чирт узилиб тушсин!

Ҳаётнинг қизиги шундаки, у инсоннинг измида юрмайди. «Нонни катта тишласанг ҳам гапни катта гапирма», деб бежиз айтишмаган экан. Бу гал ҳам шундай бўлди. Аниқроғи, эр-хотин ўртасидаги ўша қизғин гап устида эшик қўнғироғи жиринглади. Хотинининг «ана, бошланди, оғир касал келди, бормасангиз бўлмайди, деб келишган» дейиши баробарида Акмал «оббо, шу шайтон курғур ҳақида бекор гапирдим-ов» деб ўзича пичирлаб қўиди.

Эрининг эшик ортида ким биландир узоқ гаплашганидан хавотир олган хотин унинг уйга жиддий қиёфада кириб келишидан ташвишланди:

– Яна ўша гапми, ҳозиргина навбатчиликдан кутилдим деган эдингиз, нима, сиздан бошқа врач йўқми касалхонада?

– Ҳовлиқманг, хотин, булар Китобдан келишибди. Шогирдим. Оғайнисининг ҳомиладор хотини



жуда оғир экан. Ичидаги йириңг бор эмиш. Операция қилмаса бўлмайди. Ўзининг кучи етмаяпти.

– Оғайнингизнинг ҳуши жойидами? Китоб қаердаю, Самарқанд қаерда, шу об-ҳавода довондан ўтиб бўларканми?

Хотинининг жаврашига қарамасдан Акмал ётоқхонага ўтиб кийина бошлади.

– Шоҳиста, мана, қаранг, соат беш бўлди. Насиб этса, 4-5 соатда қайтиб келаман. Янги «Нексия»да келишибди, йўлдан хавотир олманг. Кўрасиз, соат ўн иккита икковимиз сиз тузаган стол атрофида шампан виноси ичамиз. Хотинининг чехрасини очиш учун қўшиб кўйди:

– Гиппократ номи билан қасам ичаман...

Аслида-ку бу ҳолат янгилик эмас, боз устига эрининг характеристини яхши билгани учун жаҳли чиқиб турган Шоҳиста самимий ҳазилдан сўнг ҳовуридан тушди, ҳатто зарур нарсаларни олишда унга кўмаклашди.

Очиғи, Акмал ҳамқишлоғи, яқин шогирдининг илтимосини рад эта олмади. Йўл азобини рулда ўтирган ҳайдовчи тортган бўлса бордир, бироқ дўхтири уч соат ҳамроҳи билан касаллик тарихини муҳокама қилди, таҳлиллар натижаси юзасидан йўл-йўлакай уяли телефон орқали тажрибали ҳамкасларидан маслаҳат олиб борди. Факат бир ерда – Тахтикорача довонидан нариги томонга тушишда машина сирпаниб, йўл ёқасига чиқиб кетганида ҳамма қатори «вой» деб ёқасига тупуриб кўйди, ичидаги «фалокатдан асрасин» деб пичирлади.

Қишлоқ шифохонасига келиб бемор аҳволини кўргач, бу ерда йўл азобидан минг чандон оғир ҳолатга дуч келди. Йигирма беш ёшдаги аёл деярли ҳушсиз ётарди. Ҳомила тўқиз ойлик, лекин қорин бўшлиғида сув йиғилиб, йиринглаш бошланган. Вазият шу қадар қалтиски, ҳатто тананинг ортиқча қимирлашидан ҳам ичак ёрилиши, ҳомилани ҳам, онани ҳам нобуд қилиши мумкин. Бунинг устига Самарқанддаги каби ёнида тажрибали ҳамкаслари ҳам йўқ. Ўзи хулоса чиқариб, ўзи операция қилиши керак.

Тўғри, анализлар олинган, лекин қалтис қимирлатиб қўйса нима бўлади? Наркозни кўтара олмаса-чи? Нима қилиш керак? Хаёлида минг битта фикр курашади. Лекин шунча йўл босиб келди, тажрибали дўхтири деган номи бор. Ҳамманинг умиди унда.

Шу пайт хонага бир қария кириб келди. Шу ерлик шифокорлар худди келишиб қўйгандек биринкетин чиқиб кетишиди.

– Ука, – деди у, – барака топ, шу аёлга ёрдам бер.

– Отахон, қизингизнинг тақдири Аллоҳнинг қўлида. Операция натижасига кафолат бера олмайман.

– Берасан, кафолат бера оласан, ука. Сен ҳақда эшитганман. Шогирдингни мен юборгандим. Бу аёл эса... қизим эмас, хотиним. Биринчи марта фарзанд кўраяпман. Шу бахтдан бенасиб қолмай

қариганда, иним, сени хурсанд қилишга қудратим етади, йўқ дема.

Акмал бошини кафтлари орасига олиб жимиб қолди. Ўн беш йилдан бери кўп марта оғир жароҳлик операцияларига қўл урган. Аммо бу хилдагисига биринчи бор дуч келиши. Чолнинг илтижоси хаёлини чувалатиб юборди.

– Шавкат!

У беихтиёр баланд овозда шогирдини чақириб қолди. Аслида эшик ортида турган ҳамма шифокорлар шу чорловни интиқлиқ билан кутиб туришарди. Шавкат ичкарига кириб очиқ эшик олдида тураверди. Нафас олишга ҳам чўчийди. Ана шу бир-икки дақиқа Акмал учун қатъий қарор қилишга етарли бўлди.

– Беморни ҳам, жамоани ҳам операцияга тайёрланг, фақат тезроқ! Отахон, қани, яхши ният билан фотиха беринг...

– Раҳмат, иним, бор экансану, илоё Яратганинг ўзи мадад берсин!

Жамоадаги иштиёқ Акмалга ишонч бағишилади. Имо-ишорадаёт ҳар бир ускунани тайёр қилишиди. Нимага қўл теккизмасин, кўз олдида чолнинг илтижоли сиймоси гавдаланаверади: «Қариганда шу бахтдан бенасиб қолмай...» Энди унинг миясида битта фикр чарх уради – нима бўлса-да онани ҳам, болани ҳам асраб қолиш керак!

Қишининг чилласи бўлишига қарамасдан жиққа терга тушди. Қўл-оёғи, бутун вужуди кўзга айланди. Битта ҳамшира жарроҳ юзидаги терни артиш билан овора бўлди.

Беш соат! Жарроҳлик хонасидаги ана шу муддат ичидаги чинакам ҳаёт-мамот учун кураш кетди. Беморнинг аҳволига қараб, нафас ололмай қолган лаҳзаларни айтмайсизми! У бадиий асарларда тиббий мўъжизалар, бемор икки дунё орасида қолган ҳолатлар тўғрисида ўқиган. Лекин бугун бундай воқеага ўзи дуч келиб турарди. Ёзувчилар ҳам ҳаётдан олиб ёзар экан, дея кўнглидан ўтказди у.

Катта доя йиғлаётган чақалоқни қўлига олганида барча ҳамширалар қувончдан йиғлаб юборишиди. Акмалнинг кўзи яшнаб кетди. «Хайрият, Яратганинг ўзи қўллади».

Тақдирнинг бу муруватидан қувонишга ҳали эрта эди, чунки онанинг аҳволи ҳадеганда ўзгаравермади, ҳамон кўзини очмайди, нафас олиши оғир. Дармонсизлиги етмаганидек, кўп қон йўқотди, ахир ичидан озмунча сув ва йириңг олишдими!

Кесилган жойлар тикилгандан кейин ҳам операция хонасидан ҳеч ким чиқмади. Врачлар ҳам, ҳамширалар ҳам ўзларича нимагадир уннаб бирбиридан кўзини олиб қочишади. Наҳотки, шундай гўзал аёл... Муолажа кор қилдими, Яратган қувват бердими, ишқилиб, бир соат деганда аёл ниҳоят нурсиз кўзларини очди, унинг пешонасида тер томчилари кўринди, лаблари тамшанди, айниқса ўз ўғилчасининг овозини эшитгач, атрофга қарай бошлади.



Кўнгли бироз таскин топгач, Акмал оғиз боғи-чини олиб, жарроҳлик либосларини ечди. У йўлакка чиққанда ранг-рўйи ўчган отахон бир ҳолатда турарди. Ўтган беш соат унинг учун бутун умри билан тенг эди гўё. Шу сабабли Акмал унинг саволини кутиб ўтирумади:

– Ўғилча муборак, аёлингиз муборак. У нариги дунёдан сиз учун қайтиб келди...

Отахон қўярда қўймай Акмал билан унинг шогирдини уйига бошлаб борди. Чунки бошқалар уйларга шошилишди. Ярим соатлик йўл экан. Ҳамкаслар ҳам чолнинг қувончини баҳам кўришни истаб туришганди. Дарвоза тагида уларни тушовланган оқ қўй ёнида тик турган ўспирин кутиб турарди.

– Ният қилган эдим, меҳмон... Бу жияним. Қани, полвон, қўйни сўйиб, кабобни бошла.

Қариянинг сўзларига қишлоқнинг у ер-бу еридан отилган мушаклар овози уланиб кетди.

– Соат ўн икки бўпти!

– Ана холос, қовун туширдимку-а. Хотинга албатта етиб келаман, девдим.

– Иним, келинга ўзим тушунтираман, албатта кечиради. Бугун эса янги йилни мен билан нишонлайсизлар.

Дастурхон устида чол билан танишиб олди. Унинг самимий қувончига, мулозамати ва чаққон ҳаракатларига ҳаваси келди. Барibir врач-да, қайғу билан баҳт ораси бир қадам эканлигини эслаб қўйди. Ичидаги бу гапни тилига чиқаргиси келмади.

– Олтмиш еттига кирдим. Икки марта уйландим, фарзанд кўрмадим. Ерим, молим беҳисоб. Тоғ орасида жаннат яратдим. Хотиним ҳам етим, ҳеч кими йўқ. Дуппа-дуруст эди, мен йўғимда бирор оғир нарса кўтарганми, билмадим, икки кунда мазаси қочиб қолди. Еру кўкка ишонмасдим, асраган кўзга

чўп тушади, деганлари шу бўлса керак-да. Ҳа, майли, энди ҳаммаси ортда қолди. Худога бир қилиғим ёқди, шекилли. Аммо қўлингиз дард кўрмасин, дўхтири, насиб этса, шу ўғилчанинг тўйига айтаман, келасиз, оёғингиз остига қўй сўяман.

Қисқа тамаддидан сўнг улар чолни эргаштириб яна шифохонага келишди.

Хайрият, беморнинг аҳволи анча тузук эди. Ҳатто боласини эмизибди.

Машина Самарқандга қараб йўл олганида соат миллари тунги учни кўрсатар, ташқарида эса қор бўралаб ёғарди. Акмал йўлдаётк уйига кириб боришини тасаввур эта бошлади. Ишқилиб, хотини хафа бўлмасин-да.

Акмал йўлда ухлагани боисми, дарвоза олдида машинадан тушгач, ўзини тетик сезди. Ичкарида жим житлик, ҳамма ширин уйкуда. У оёқ учиди юриб, кийимларини алмаштириди, кейин секин ошхонага ўтди. Уйдагиларни безовта қилмаслик учун шам ёқди. Безатилган дастурхон кўзига шундай чиройли кўриндики... Кўп таомларга қўл ҳам теккизилмаган, роса кутишиби-да, дея ўйлади у. Иккита қадаҳга эса шампан виноси қўйилганича турибди. У мийигида кулиб қўйди, сўнг қадаҳни қўлига олиб ўзича қадаҳ сўзи айтди:

– Ишқилиб, онанинг ҳам, боланинг ҳам умри узун бўлсин!

– Ие, қачондан бери ўзингизга ўзингиз гапирадиган бўлиб қолдингиз, дадаси?!

– Вой, Шоҳиста, уйғоқмидингиз, узр.

– Сизсиз кўзга уйку келадими ахир?

– Янги йил муборак!

– Сизга ҳам!

У хотинини меҳр билан бағрига олди. Шоҳиста кўзига ҳар доимгидан ҳам латофатли, назокатли, сулув кўринди.





*Нази* *Нази* *Нази* *Нази*

Шаҳодатбону ИМОМНАЗАРОВА

## Ёдимни безайди шаффоф хаёллар

\* \* \*

Ўксима, кўнглим-а, хокисор кўнглим...  
Орзулар армонга кетса қоришиб.  
Кўрқинчли тушларга айланса ўнгим,  
Умидбахи тонгларим келар ёришиб.

Ўксима, кўнглим-а, хокисор кўнглим...  
Юз буриб кетганда дўстлар бирма-бир.  
Алдоқчи қисматнинг макрига кўндим,  
Армонларим узун, қўлим қисқадир.

Ўксима, кўнглим-а, хокисор кўнглим...  
Кузгундай чарх урса бошимда хатар.  
Мен сени сўнгги бор келганда кўргим,  
Паймонам тўлса ҳам, тўлмасане агар...

Ўксима...

Шаҳодатбону  
ИМОМНАЗАРОВА



1982 йилда Кўқон шаҳрида туғилган. Тошкент давлат маданият институтини тамомлаган. “Райхон нафаси” номли шеърий тўплам муаллифи. Ўзбекистон Фанлар Академияси Тил ва адабиёт институтининг илмий ходими.



\* \* \*

Кечир, сени ташлаб кетганим учун,  
Ерда қололмайман...  
Умидингни уз.  
Ярадор баҳтимнинг бағридай юпун  
Осмон келган чоғда менга юзма-юз.

Ҳавога айланиб кетаман – кетсам,  
Ёдимни безайди шаффоф хаёллар.  
Ўртанган дилимнинг додига етсам,  
Менинг фарёдимни тинглар шамоллар.

Йўлларим узундир, билмас ниҳоя,  
Шаҳризода айтган эртаклар мисол.  
Ёргу кунларимдан сўйлар ҳикоя,  
Сенинг йўлларингни ёритган ҳилол.

Осойиши ахтарма жону танамдан,  
Сувсиз соҳиллардай ёйсам қўлимни...  
Тириклик қўзига қандай қарайман,  
Соғинтиrolмасам битта ўлимни?..

Кечир...

\* \* \*

Бўғзимни аламлар қамраган,  
Сўзларинг куйдирап кўксимни.  
Худога хуш ёқсан бандаман...  
Армонга тўлдирап кўнглимни.

Сукутдан яралган фигонсан,  
Кўз ёши нигоҳни тиглайди.  
Тонггача тонгларга ишонган,  
Бўши бешик ўртада ишлайди...



# Ж. Жаҳон ҳикоялари

Василий ШУКШИН




## ИККИНЧИ СЕАНСГА ЧИПТА

Ҳикоя



Василий ШУКШИН



Атоқли рус ёзуучиси, кинорежиссёр. (1929-1971) Россияда хизмат кўрсатган санъат арбоби.

Венецияда бўлиб ўтган 16-Халқаро кинофорумда «Олтин шер» мукофотига сазовор бўлган.

Василий Шукшиннинг "Овчи ҳикоялари", "Мария учун пуллар" тўпламлари, «Любавинлар» романи кенг китобхонлар оммаси орасида машҳурдир. Адабнинг кўпгина асаллари ўзбек тилига таржима қилинган.

Кейинги пайтларда нимагадир Тимофей Худяковнинг кўнглига қил сиғмас, ҳамма нарсадан хуноби чиқиб юрарди. Тўрт оёқлаб турса-ю, боши қалтираб, итдай ирилласа, хуриб юборса. Балки йиғлаб ҳам олармиди.

– Сенга нима жин урган ўзи? – муғомбirona раҳмдиллик билан сўради Ермолай.

Тимофей унинг атай ўсмоқчилаетганини тушунди, аммо барибир нолиди:

– Тақдир – қанжиқ... – деди-ю, гапнинг давомини чигаллаштириб юборди. – Боши тош қotsин унинг... Дастурхони нон кўрмасин...

Тимофей руҳан қийналган дамларда сўкишни қотириб қўяр, гўёки ёмон кўрган одамини дарра билан ана шундай саваларди. Қаттиқ эҳтирос билан тақдирга лаънат ўқиши хоҳлаб қоларди. Тақдирни, "ўн икки ҳаворий", "оғзига терак қипиги", "чўқинтирганни онаси" – бари-барини қўшиб сўкишда қизишиб давом этарди. Ҳатто Ермолай ҳам ҳайрон тикилиб қолди.

– Ҳа, қийин бўпти сенга!

– Осонми, қанжиқ тақдир сенга бунақанги кўргилигини кўрсатиб турса.

– Агар сен тақдирдан нолисанг... билмадим. Сенга нима етишмайди? Уйингда ҳамма нарса жой-жойида бўлса...

Тимофеев қоровулга руҳий қийналаётганини тушунтиргиси келмас, айтгани билан у тушунмас, ҳатто ўзиям ҳеч нени англамаётган эди. Рост-да, уйида алағда бўладиган нарсаси йўқ, болаларини институтларда ўқитди... Бъязи пайтлари у яшашни билишидан мағуррланар, энди эса жаҳли чиқар ва негадир юраги сиқиларди.

Аҳмоқ қоровул Ермолай бўлса: “Сен иблисни, виждон еяпти; бутун умр ўмардинг... уйга ташидинг, бирон марта қўлга тушмадинг, текинхўр”, дея аламидан тутикарди.

– Ихтилоф, Еремажон... кўнглимда ғалаён. Нимаданлигини ўзим ҳам билмайман.

– Ўтиб кетади.

Ўтиб кетмади.

Шу куни шанба эди (ўзи эрталабдан ҳамма иши терсдан келаверди). Тимофеев омборни тамбалаб, қоровул билан “яримта”ни бўлишиб кунни кеч қилди... Уйига жўнаш олди яна биттасини “ер тишлатгач” ўрнидан кўзғалди. Уйига боргиси келмасди – борса хотини яна минирлаб кўнглини баттар хира қиласди.

Куз ёғири шивалаб ўтганди. Намчил шамол эсганидан ҳалқоб сувлар юзаси ажиндай тиришди. Уфқ осмони ёришиб қўёш кўринди. Ёғоч уйлар деразасида қаҳрабо ёғдулар зарҳалланиб, атрофга ёруғлик тўшарди. Кун совук, ҳам зерикарли эди. Барчасининг ёқимсизлиги-чи?

Тимофеев уйга чўмди: “Мана – яшаб қўйдим, бу ёғи оз қолди... нари борса ўн-ўн икки йилми, умримни шунчаки судралиб ўтказиш-у, бўсағада ётиб олиб кун санаш қолди. Бу ҳаёт эмас, чайнаб ташланган суюқдай ҳаёт кимга керак! Нима ҳам дердинг, ҳаёт – бу ҳаётда. Ўйлаб қоласан. Тфу! Бутун умр югурдим-елдим, олғирлик қилдим, уй курдим, ҳар хил ёлғон-яшиклар билан бирни ўнга уриб гоҳ у нарсани, гоҳ бу нарсани топиб келдим. Еремоха бўлса, ўзи учун яшади. Жонини койитмай балиқ овлади, ўз кўрпасига бурканиб тинч-осуда, ғам-алам нималигиниям билмай ўтятпи. Қуртларга эса, барибир, биргалиқда ем бўламиз... Эҳ-хе, кўримсиз ҳаётда даври даврон сурди. Сен-чи? Худди цирк артистидай дор устидан юриб ўтдинг. Ўтишга ўтдим-а, лекин энди тиззаларим дармонсизликдан қалтираяпти.

Тимофеев йўл-йўлакай ўй суриб борарди... Бирдан ўзини таниш кўчага урди. Бу кўчада Поля Тепляшина яшарди... Қачонлардир – анча олдин Тимофеев Поля билан жинояткорона “севги ўйини”ни ўйнаганди. Жанжаллар бўлган, деразалар синган, шармандаси чиқкан. Гутя – Тимофеевнинг хотини етти йил жон жаҳди билан Полядан Тимофеевни қайтариб олиш учун курашганди. Гутяни қишлоқда ҳамма мақтар, у бўлса бундан ғуурланиб, қишлоқнинг ёш хотинларини кўчакўйда учратдими, маслаҳат ошидан бечўмич узатарди. Яъни, ўзининг аҳволига тушиб қолмаслигини эслатиб, эрлари учун курашишга ўргатарди:

“У хонимчасининг уйига борганида, сен қўлингда косов билан дераза тагида тур! Ачомлашмоқчи бўлганида косов билан дераза ойналарини чил-чил қил. Лаззатдан маҳрум эт. Қаноти қирқилган қуш қайта учолмайди”.

Бунақа “ошиқ-маъшуқлик” ҳангомалари қишлоқда бўлиб турарди. Ҳозир бошқача – ажралишади, та-

мом! Илгарилари йиллаб ғазабини босолмай аламзода бўлиб юришарди. Ўшанда бу “ошиқлик” бирдан ўз-ўзидан тугаганди. Полянинг ўғли Колька улғайиб қолганди. Тимохани “Николай Петрович” онасининг ёнидан кувиб юборарди.

Тимофеев кўзлари чакчайиб Поляга ўдағайланарди:  
– Тойчоғингни тиийиб қўй!

Жувон эса бирданига оғзига уرارди. – Тошингни тер!.. Нима, сени ўғлимга алиштираманми? Бекорни ебсан!

Тимофеев шу можародан сўнг яна бир-икки марта айланиб борган эди, Кольканинг бакувват муштига дуч келгач “ўйин”ни ийғиштириб қўя қолди. Энг аҳмоқона воқеа кейин бўлди: Поля ва Гутя дўстлашиб олишди. Энди эса унинг устидан иковлашиб мазах қилиб кулишиб, мағзава ағдаришарди. Гоҳо Поля одамлар тўда жойда Гутя билан юзма-юз келиб қолса-ку, чирофи порларди. Тимоханинг битини тўкиш баҳонасида:

– Қалай, бизнинг аргумоғимиз яхши юрибдими? – дея жўрттага сўрарди.

Гутя бундан яйраб куларди-да:

– Печка устиди – канасини эзаяпти, – дерди хумордан чиқиб.

Нима бало – бу атай ундан ўч олишмиди, тушуниш қийин!

Тимоха бундай воқеа устидан чиқса, хотинига қараб от қўярди, аммо эндиликда ўз болалари томонидан қаршиликка дуч келадиган бўлди. Мана, ҳозир Тимохадан нима учун у ерга – Полянинг ёнига борганини сўрашса, тушунтиришнинг уддасидан чиқмасди. Ўзи ҳам нега бориб юрганини англамасди. Поля эса ҳайрон.

– Ановини!.. Бу меҳмонни кўринг. Нима гап?

– Нима бўпти... Нима, юкумли касалинг бормидики, айланиб ўтсам? Гаплашиб... ўтирамиз. Эски хотираларни эслаймиз, мана ичимлик... – Тимофеев ўзи билан шиша оливолганди. Шишани столга қўйди. – Ўтганларни эслаймиз.

– Эслайдигани қоптими?

Поля кексайиб, хунукашиб қолганди. Тимофеев: “Аслида у ҳуснда урвоқ эди”, – дея ўйлаб ўз аҳволига ачиниб кетди.

– Латифа айтиб беришимни хоҳлайсанми?

– Қара-я!

– Нимага, ҳадеб “қара-я, қара-я” дейсан попнинг бефаҳм хотинига ўхшаб. Ёввойилигингни айтсам... Хўш, мана келдим... Нима бўпти? Тўғриси, сиз аёллар ёввойига ўхшайсизлар, чин сўзим.

– Нимага унда эси пастрарнинг ёнига келасизлар?

– Қаердан топаман ақллисими? Ҳаммаси бир гўр бўлса, алмаштирсанг ҳам, совунни игнага алишгандай гап.

– Тафтиш босдими, ғазабноксан?

– Ҳали мени қармоққа илинтирадиган тафтишчи туғилмаган.

– Кўриниб турибди. Демак, туғилибди...

Тимофеев стакандаги ароқни бирров симирди – газакка ҳеч нарса сўрамади ҳам. Поля газакка – чўп тутмади. Тимоха ҳам Поляга ўзи билан ичишни таклиф қилмади.

– Латифани эшит. Бир рамақижон эркак шаҳарга келиби, сўнг кўчада кетаверибди. Чўнтаги тўла мул-



ла жиринг. Ўйлабди у: "Қаердан биронта шаҳарлик ойимқизни илинтирсам". Чунки у шаҳарлик аёлларни осон илинтирса бўлади, деган гапни эшитган эканда. Шу пайт, бир сувугина жувон унинг ёнига келиб жимгина қараб турибди-да, мулойимлик билан: "Меникида тунай қолинг. Ўйим бир қадам" дея хушнавозлик кўрсатибди. Худонинг ўзи етказди, деб шодланибди эркак ва аёл етагида уйига борибди. Ўйга келгандан сўнг аёл эркакка қараб: "Сиз ечинаверинг, мен ҳозир келаман", – дебди-ю, ўзи нариги хонага ўтиб кетибди.

Эркак ечиниб, уни кута бошлабди. Анча кутибди. Бир пайт аёл бир этак болаларини етаклаб чиқиб келибди ва уларга қараб: – "Мана болаларим, агар сизлар ҳам тўйиб-тўйиб овқат емасаларинг, мана шу амакига ўхшаб – қоқсуяк бўлиб қоласизлар?" – дермиш.

Поляни бу воқеа кулдиролмади, Тимофейнинг ўзига ҳам унча қизиқ туюлмади. Лекин эрталаб ҳайдовчилар билан бирга эшитганида кўпчилик кулган эди. Яна бу латифа ибратли экан деб ўйлаб ҳам қўйганди.

– Сен бу билан нима демоқчисан? – деди Поля. Тимофей тушунтириди:

– Мени ҳам, худди шундай қилиб қанжик – тақдир чиқитга чиқариб ташлади. Яшаб қол, Тимофей! – дабдурустдан куюшқондан чиқди. – Елканга боз борми? Бор! Яна ҳеч кимдан кўркма! Мана, Тимофейнинг сочлари тўклиб бўлди... энди.

– Тўғри яшаганингда, ҳеч кимдан кўркмасдинг, – деда аччиқ чақиб олди Поля.

Тимофей ҳам қандай қилиб қаттиқроқ оғритиб чақишини ўйлади.

– Билмайсанми, ким мана бу жойда, – у каравотни кўрсатди. – Бегона эркак билан ачом-ачом ўйнашган? Мабодо эшитганинг йўқми?

– Эшитганман. Сен-чи, эшитмаганмидинг ким худди мана шу жойда, тирик хотини бўла туриб, бегона аёл билан чалкашиб ётган? А... Мен ёлғиз бева эдим, сен эса оиласи эдинг. Бузуқисан, Тимоха!

Тимофей яна ичди. У энди ҳаммасини бироз тушунгандай бўлди; эссиз умри, эссиз ҳаёт. Яшагани курсин, ҳаммаси куй.

– Бизнинг ишимиз, оқ буқача ҳақидаги эртакка ўхшаб кетади, Поля.

Поля кулиб юборди.

– Нимага кулласан? – сўради Тимофей.

– Нимага кулмас эканман?

– Керакмас... Сенга ярашмайди, тишларинг сўйлоқ.

– Бир пайтлар буни пайқамас эдинг-ку...

– Пайқаганман, нимага энди пайқамас эканман, фақат... Аттанг! Биласанми, нима алам қиласди, азизам, кимгadir бу ҳаётда ҳамма нарса етарли; олий маълумотли, катта маош эгаси, хушрўй ва тишлари текис ва оппоқ ширингина ўйнаши ҳам бор. Тимохага эса сал бундайроғи ҳам ярайверади...

– Вой, илон-ей! – ажабланди Поля. – Сассиқ така. Қани, кўтар шишангни, бу ердан қорангни ў chir-чи! Ҳозир ўқлоқ оламан-да, мана шу ақлли бошингга... Кошки, ақл битса!..

Тимофей шиша оғзига яна тунука қалпоқасини кийдириди-да, пиджагининг ички чўнтагига яхшилаб жойлади ва шошмай кета бошлади. Сал енгил тортгандай сезди ўзини. Лекин яна кимнингдир жиғига те-

гишни истарди. Кимгadir мана шунаقا секин, шошилмай, – чақадиган сўзларни айтса, ниш санчса!

Уйига етиб келса, кираверишдаги хона четидаги столда тирсакларига бошини тираб... ҳазрат Николай хаёл суреб ўтиради. Ҳазратнинг қиёфасини одамлардан кўп бор эшитган. Қуйиб қўйгандай ҳазрат Николайнинг ўзи: оқ юзли, паст бўйли, кўрчоққа ўхшаган қарияча. Бошини эгиб мулойимгина тикилиб ўтириди. Ўйда бошқа ҳеч ким йўқ.

– Қани, саломатмисан, Тимофей? – мулойимлик билан сўрашди ҳазрат.

Тимофей атрофга аланг-жаланг қаради... Ва бирдан гурс этиб, қариянинг оёқлари остига йиқилди. Иложи борича майнин ва лўнда қилиб секингина:

– Салом, ҳазратим. Мен сени дарров танидим, отахон, – деди у.

Ҳазрат нимагадир силкиниб тушди, ҳайрон бўлди ва кулимсираб бармоқлари билан секин ўдағайлади.

– Қайфинг бор-ов?

– Ҳа, озроқ бор! – қандайдир қизиқонлик ва шодликдан суюниб давом этди Тимофей. – Сиқилганимдан ҳаммаси... отахон, сендан узр. Сиқилганимдан ҳаммаси. Тиним билмайман. Мана, болаларимни ўстирдим – ичсам нима қиласди деб ўйладим? Нега бунчалик қарип қолгансан-а, отахон... Нимага келгандинг ўзи?..

Ҳазрат кўзларини пирпиратди, яна кулиб юборди.

– Нимадан сиқиласан?

– Ўзим ҳам билмайман. Эй, Худо билади! Унга сиғинмаймиз – шунинг учун бўлса керак. Худога ишонмай қўйдик; мана у бўлса кўрсатиб туриби. Черковларни ёпдик, сўқинамиз, ҳар хил йўлларга кирамиз... Сиқилишимизни боиси шундан.

– Сен илгари Худога ишонармидинг?

– Отахон!.. чўқиниб айтаман; кичкина пайтимда ишонардим. Рождестволарда бутни шарафлаб юрганман. Агар большевиклар келмагандан эди, ҳозир ҳам сиғиниб юрган бўлармидим.

– Ўзинг-чи, коммунист эмасмисан ишқилиб?

– Қаёқда! Сенга ёлғон гапирмайман, балки коммунист бўлармидим! Фақат менинг қайнотам... агар ўлиб кетмаган бўлса! Ўшани ўттизинчи йилларда қулоқ қилишган...

– Ҳўш?

– Шундан бери оғзимга латта тиқилган, ҳеч кимга, ҳеч қачон ғинг деб овоз чиқармаганман.

Ҳазрат баттар ҳайрон бўлди. Унга ачиниб қаради.

– Сен нима демоқчисан, Тимофей?

– Кўнглимдагини айтаяпман, отахон! Ҳўш, сен нимага келгандинг-а! Яхши ният биланми ёки ёмон ният биланми? Қандоқ тушунай?

Ҳазрат тиришган кичкина кафтлари билан оппоқ соқолини силаб қўйди.

– Нима учун келгандман... Ҳўш, мана... тавбадасан, сизларни кўргани келдим. Менга қара, сен ўрнингдан турчи?

– Тураман! Нега турмас эканман? Ҳеч нарса қилмайди. Отахон, мана, сен дунё кезиб, кўриб юрибсан: одамлар айниб бораётиди-а?

– Ҳаммасияммас.

– Демак, сенинг фикрингча, қайнотанг йўлингни кесиб ўтдими?

– Кесиб ўтди. Тўғрисини айтганда, у қулоқ ҳам бўлган эмас, ҳеч қачон. Шу фақат колхозлар тузиш масаласида қайсаарлик қилиб туриб олганди ўшанда. Вайсақи эди қайнотам, тилини тиёлмасди. Аҳмоқнинг аҳмоғи эди. Аммо қатъиятли, ўзига тўқ одам эди, мен эса ўртаҳол эдим. Партияга қабул қилишлари мумкин эди.

– Хўш, қайнотанг-чи, нима қилди?

– Муддатини ўтаб келди. Мен уни ўшандан буён кўрганим йўқ, бир-биримиздан узоқда яшаймиз. У қари тентак ўғли билан яшайди. Ўғли бўлса, қаердадир, узоқда яшайди. Демак, одамлар айнинг дейсанми?

– Ҳа, ҳалқ яхшигина айниган, – деди жиддий боқиб ҳазрат.

– Умуман ҳеч нарсага арзимайди, бу ҳалқ! – гапни илиб, баттар алжиарди Тимофеј. – Ичкиликбозлиқ, ўғрилик... Мен ҳам омбордан ўғирлардим, сал-пал. Биламан, бу гуноҳ, аммо ҳамма ўғирлик қиласди. Атрофга қара,вой,Худо,войХудо-еї,нималарбўлмаяпти дейсан.

– Ўғирлик қилардим, дейсанми?

– Ҳа отахон, у-бу нарса ўмарид турардим. Мана, болаларимни ўқитдим. Қайси пулга-а? Отахон...

Тимофеј ҳазратнинг ёнига янада яқинроқ эмаклаб келди.

– Биласанми, сендан нима сўрамоқчи эдим?

– Хўш?..

– Сен у ерда, тепада бизнинг Худомизга, пайғамбаримиз Исога ва Биби Марямга яқин ўтирасан-а... Шу сен улар билан маслаҳат қилиб айтсанг-чи... хўш... ва ... э-э! Шундай хўрлигим келадики, юракларим эзилади, отахон! Ахир мен аҳмоқ эмасман-у, аммо саводим ҳаминқадар бўлса ҳам қарагин, олий маълумотли манаман деган азаматларни бармоғимни учида ўйнатаман...

– Тушунмаяпман!

– Оҳ, қани, яна бир карра қайта туғилсам эди! А, нима дейсан? Ҳозиргиси, яъни яшаб ўтган умрим ҳисобга олинмаса-да, бошқатдан яна мени туғдирсаларинг?..

Ҳазрат ихтиёrsиз кулиб юборди.

– Гоҳ сиқилиб кетдим деб нолийсан... Гоҳ... эҳ, сен итнинг боласи –Тимоха!

– Ҳа-да, нолийман-да, ҳаётим ҳеч ўхшамади-да!

– Тимофеј йиғлаб юборгудай эди. – Мана сен кулаյпсан. Ҳеч кулгули жойи йўқ! Отахон, фақат ғам-алам кўрдим, янгидан янги ғам. Қора ер юзида яшаш қандай яхши! Нима мен кўрмаяпманми, тушунмаяпманми... ҳаммасини тушуниб-кўриб турибман. Аламим келаяпти. Туфу – эзғилаб ташласанг!.. Менинг кўрган куним қурисин.

– Хўш, айт-чи, қайта туғилганингда қандай яшардинг, а, қизик?

– Энг аввало, мен бошқа аёлга уйланган бўлардим. Муҳаббат ҳақида ҳатто Библияда ҳам ёзилган-у, аммо мен учун муҳаббат юмшоқ жойдан чиқкан чипқондай бўлди. Бу гапларим учун ўзинг кечир, Худойим. Ёшлиқда қандай йўлиқдим, ана энди ихраб-синграб, судраби яшаб юрибман. Бўлмағур хотин учради. Аҳмоқ.

Ҳудди отасининг ўзи. Оғзи бир очилдими... фақат бер дейишни билади. Аёл эмас – кажава сандиқ. Ўшани деб кўпроқ ўғирлик қилганман. Ҳасис!.. Ўтакетган очофат. Мендаги бу ақл билан катта бошлиқ бўлишим ҳам мумкин эди. Масалан, мендан яхшигина прокурор чиқарди, деб ўйлайман.

Тимофеј пастдан ҳазратнинг илоҳий кўзларига тикилиб қараб қолди.

– Қўлимдан келганида эди қайнотамни шундай жўнатордимки, менга қолса у ҳалиям ўша ерда ўтирган бўларди. У буни тилидан топган бўларди.

– Ўчир овозингни! – ғазаб билан ўшқирди қария. – Мен сенинг ўша қайнотангман-ку, иблис! Ўғри! Кўзларингни каттароқ оч, ароққа бўкибсан-да!

Тимофеј ўрнидан турди, чалворини қоқди ва сеекин деди:

– Қара-я! Ростдан ҳам қайнотам. Қайнотагинам! Кел, ичамиз. Учрашганимиз учун. Қара, мен сени ким деб ўйлабман-а...

– Бўкибсан-да, итвачча!

– Ҳамма сирларимни айтиб берибман-а, сенга?.. Жимм! Ҳечқиси йўқ, билиб кўйдинг. Шундай ҳам адашаманими-а. Қовун туширганимни қара-я... Эй-я-а!.

Кейин иккаласи шишани бўшатгач, ҳақоратланган қайнота Тимофејнинг бурнини тагига бош бармоғини икки бармоғи орасидан чиқариб ўзи ва қизи учун жаҳл билан дерди:

– Мана сенга бошқа ҳаёт! Мана сенга иккинчи сеансга чипта!.. Ўғри...

Шолғоми чиққан Тимофеј эса фақат бир оҳангда ғўлдиради:

– Воҳ, қандай тушдима-а, воҳ. Шунчалик ҳам бўладими...

– Мен сенинг ўзингни қаматаман! Ўғри!...

– Кимсан? Ёнингда Худо борми? Сен ҳуқуқсизга ким ҳам ишонарди?

– Мана, мана сенга, иккинчи сеансга чипта! Ҳа-ҳа-хе-хе, – бошқатдан яшашни истаб қоптилар!... Ма, сенга.

Қайнотаси яна Тимофејнинг бурнини тагига бармоғини тиқаётганди, куёви унинг бошига бир стакан ароқни қуйиб юборди ва қўрқитмоқчи бўлиб чўнтагини кавлаб гугурт чиқарди.

– Ҳозир ёқиб юбораман-а.

Ҳазрат бўлмиш қайнота сочиқ билан бошини артиди ва йиғлаб юборди...

– Бу нима қилганинг-а? Тимохажон? – Мендай қарияни-я... Уятсиз... Ярамас... Ҳудди меҳрибонларим олдига яхши ниятлар билан келсам-у... Сен...

– Ҳамма гап шунда-да, нима қилишни билолмаяпман, – деди Тимоха бироз юмшоқлик билан.

– Билмайман, қайнотагинам, билолмаяпман. Тўғрисини айтсан, ўзимда нималар кечажётганлигини билолмаяпман. Бундай яшаш жонга тегди. Ўлгудай жонга тегди. Учди-кетди. Алам қиласди. Умримни ашула айтгандай ўтказиб юбордим, аммо ашулани ёмон айтдим. Лекин ашула яхши эди, эсиз. Томоша учун, мени кечир.

Кўнглингни кенг қил, кечир, отагинам.

## КУЗДА

Паромчи Филипп Тюрин радиодан сўнгги ахборотни охиригача эшитиб бўлгач, анча вақтгача дастурхон устида миқ этмади.

– Нимага тинч ўтиришмайди-а, – деди жаҳл билан.

– Яна ким ғашингга тегаяпти? – сўради дўриплаган овоз билан кўллари эркакларнидай бақувват, баланд бўйли кампири.

– Бомба ёғдирияпти! – радиокарнай томонга қош учирди Филипп.

– Кимнинг устига?

– Въетнамликлар устига-да.

Кампирга чолининг сиёсатга қизиқиши ёқмас, ғашини келтирас, баъзида шу бемаъни сиёсатни деб иккиси жигиллашиб қолган вақтлари ҳам бўлган. Аммо ҳозир кампирнинг уришишга ҳуши ҳам, вақти ҳам йўқ эди. У бозорга шошилаётганди.

Филипп паромга бориш учун иссиқроқ кийиниб олгач, дикқатини жамлаб жиддий ҳолда уйдан чиқди. У анчадан бери, урушдан қайтгандан бўён паромчи бўлиб ишлайди. Урушда бошидан яраланганд, шунинг учун ҳам энгашиб ишлайдигани – ўз касби дурадгорликка ярамаслигини билиб паромчиликни танлаганди.

Сентябрнинг охирлари эди, ёқимсиз совуқ шабада эсади, оёқ остидаги ер билчиллаб ғашга тегади. Қишлоқ дўкони ёнида ўрнатилган радиокарнайдан шамол тонгги жисмоний тарбия мусиқаси садоларини юлқиб олиб келади. Қишлоқни чўчқаларнинг чииллаши-ю хўроздларнинг қичқириги тутиб кетган.

Йўлда учраган қишлоқдошлари Филипп билан бошини қимирлатиб саломлашар, улар нон олиш учун дўконга ёки бозорга бориш учун автобус бекатига шошилашарди. Филипп уйидан паромгача бўлган бу йўлни эрталаблари ҳеч қандай ўй-хаёлларсиз босиб ўтишга ўрганиб қолган эди. Тўғри, у хаёлга бериларди, лекин ҳозиргидай паром ҳақида ёки бугун кун бўйи кимнидир тарбиялаб қўйиши ҳақида эмас. Бугун ҳаммаси тушунарли. У ҳозир қандай қилиб америкаликларни уруш қилмай тинчтишини ўйлаб бораарди. Бир нимага ҳайрон бўлса-да, аммо ҳеч кимдан сўрамайди: нима учун, уларни ракеталаримиз билан туртиб қўйиш мумкин эмас? Ахир икки кунда ҳаммасини ҳал қилса бўлади-ку. Филипп ёшлигидан жуда уддабурон эди. Янги ҳаёт тарзига осонгина кўниди, колхозлаштириш даврида ғайрат кўрсатди... Ҳеч ким билан муштлашмасди-ю, аммо кўп баҳслашар, бақирар... иккиланганларни ишонтирас, ҳаяжонланарди. Коммунист эмас эди, раҳбарлар бу хусусида негадир гап очишмаган бўлса-да, Филипп билан доим ҳисоблашар, у эса сидқидилдан ёрдам бериб юраверарди. Унингиз излари битмаслигини ўйлаб Филипп ич-ичидан ғурурланиб кўярди. Масалан, унга сайловолди компаниясида келган масъул кишилар билан қишлоқ кенгашида сайловни қандай ўтказиш тўғрисида маслаҳатлашиш ёқарди. Кимнинг уига овоз бериш қутисини олиб бориш керак, ким ўзи келади, фақат эрталаб бориб хабардор қилинса, бас... Баъзан сайловчилар орасидан қайси бири қайсарлик қилиб: “Улар менга ўтинимни олиб келишга от бериб туришадими?!?” деса, Филиппнинг бундан тепа сочи тикка

бўларди. “Хой Егор, – дерди шунда у, – ахир бу нима деганинг. Буни сайловга тенглаштириб бўларканми?! Гапингни қара-ю..! Бу ерда сиёсий масала кўндаланг турса, сен отни нимага тиқиширасан, бузоқни фунахин билан чалкаштирасан”.

Қишлоқ бўйлаб баҳс, тортишувлар елдай кезарди. Филипп билан ҳам одамлар жон деб баҳслашишар, аммо ундан гина қилишмас, аксинча, дардини тўкиб сочишар ва “Сен уларга етказиб қўй” дея тайнинлашарди. У эса вазиятнинг муҳимлигини ҳис қилас, ҳаяжонланар, ташвиш чекарди. “Эҳ одамлар! – деб ўйларди улкан ишлар оғушида куйиниб. – Уйқусираган каллаварамлар! Йиллар ўтган сайин Филиппнинг ғайрати сўна бошлади. Миясига бир фикр келди: “Бас!” Энди унинг ҳаяжонланиб, бундай ташвишлар ортидан югуришга кучи етмайди. Лекин ҳамон жамоат ишлари, жамиятнинг муҳим масалаларини юрагига яқин олар, хавотирланарди.

Дарёда ёқимли шабада эсади. Беозор урилади, туртади. Арқонлар шамолда силкиниб ғувиллади. Лекин яхшиямки, қуёш кўриниб сал кўнгли ёришиди.

Филипп паромда у ёқдан бу ёққа сузди, энг шошқалоқ йўловчиларни ўтказиб бўлгач енгил тин олди. Асабузарлик тўхтади. Филипп яна америкаликлар ҳақида хаёлга берилганда, баянни варанглатиб тўйчилар келиб қолишиди... Замона зайлини қаранг – енгил машиналар рангдор тасмалар, пуфаклар билан безатилган.

Қишлоққа ҳам шу нарса урф бўлиб кириб келаётти. Учта машинада келишиди... Тўйчилар қирғоққа тусишиди. Ширақайф, сершовқинда ўзини жиндай кўз-кўз қилиб мақтанишга мойил тўда. Янгича урф, машиналарда. Боз устига улар тасмалар билан билан безалган бўлса-да, бунақа тўйлар ҳали камчил қишлоқда, ҳамманинг ҳам енгил машина топишга курби етмайди.

Филипп тўйни қизиқиши билан кузатди. Бу одамларни танимайди – бу ерлик эмас улар, афтидан қаергадир меҳмонга кетишаётган кўринади. Шляпали бир одам ҳадеб қийшангларди. Бу машиналарни ўша топган чоғи. У тўй тўйдай бўлсин деб тинимсиз чиранарди. Баянчини куй чалишга қистаб, ўзи биринчи бўлиб ўйинга тушди. У бургутдек ўткир кўзларини ҳаммага тикиб, бақир-чақир қилиб оёқларини дўпирлатарди. Фақат унинг бу қиликларига қараш ноқулай ва уятлироқ. Келин ва куёв ҳам ўзларини ноқулай сезишар, чунки улар бошқаларга нисбатан хушёрроқ эдилар. У ҳарчанд иргишиламасин, ҳеч нарсага эришолмади, унинг бу сохта қувноқлиги ҳеч кимга юқмади ва ҷарчаб қолди...

Паром сузид ўтди, машиналар қирғоққа чиқди. Тўйчилар жўнаб кетишиди. Филипп эса ўз ҳаёти ҳақида ўйга толди. Унинг уйланиши бунақа бўлганди. Уларнинг қишлоғида Марья Ермилова деган сулув қиз бор эди. Кулча юз, ёноғи қизил, ширин сўз... Силлиқина, кўзни қувнатарди. Бундай гўзал қаллиқ ҳақида фақатгина орзу қилиш мумкин эди. Филипп уни жуда ҳам севар, Марья ҳам уни севарди. Лекин тўй бўлиши арафасида...

Филипп комсомоллар билан алоқадор эди... ўзи комсомол эмас эди-ю, лекин улар билан бирга юрар, қичқирап, суринишарди. Филиппга комсомолларнинг қишлоқ қариялари раъйига қарши чиқиши ёқарди. Мана қандай бўлганди: замонасоз ёшлар черков нikoҳига қарши кўтарилиди. Кўз кўриб кулоқ эшитмаган воқеа... Қариялар бирон нарса қилолмас, ғазабланар, кўлига хивчин олиб, гарчи хивчин билан ҳали оғзидан сути кетмаганларнинг эсини киритолмасалар-да, қайтанга баттар уларнинг қаршилигига дуч келишарди. Кувноқ дамлар эди. Филипп ҳам худди шундай, черковда никоҳдан ўтишларига қарши эди. Марья эса черковда никоҳдан ўтишга қарши эмасди. Марьянинг отонаси бир сўзли эдилар, унинг ўзи ҳам охири черковда никоҳдан ўтамиш деб қайсарлик қила бошлади. Филипп оғир аҳволга тушиб қолди. У турли гаплар билан Марьянни аврай бошлади, (гапга чечанлик қишлоқда камёб ҳол, балки Марья уни шу учун севиб қолгандир) ишонтироқчи бўлар, қишлоқча кўрсаводликни ёмонлар, ҳар хил мақола ва фельветонлардан парчалар ўқиб берар, юраклари эзилиб тишларини ғижирлатарди.

Марья эса ҳеч нарсани эшитгиси келмас, черковда никоҳдан ўтамиш, тамом, дея бир гапда туриб олган эди. Филипп ўтмишини ўйларкан, ўшанда жудаям аҳмоқона хатога йўл кўйганини тушунди. Ўшанда йўллари айро тушди, ажралишди. Филипп кейинчалик ҳам ўзгармади, қилган ишига афсусланмади, ҳозир ҳам афсусланмайди, ахир қўлидан келганча янги ҳаётни куришда қатнашди. Бироқ Марьянни кўмсарди.

Бир умр юрак-бағри қон бўлиб йиглаб, эзилиб яшади. Бирор кун йўқ эдики, у Марьянни эсламаган бўлса. Бошида шунақаям оғир эдики, ҳатто ўзини бир бало қилмоқчи ҳам бўлувди. Йиллар ўтса ҳам юрагидаги дард аримади. Энди оиласи бор – янги фуқаролик қонуни бўйича хотини билан никоҳдан ўтган. Серфарзанд. Юрак эса ҳамон ўртанар, Марьянни деб ўртанарди. Хотини Фекла Кузовникова Филиппдаги бу доимий ғамни сезиб қолгандан бўён эрини кўрарга кўзи йўқ. Ва бу тेरан нафрат аёл қалбида у билан бирга яшаб келмоқда. Филипп эса хотини Феклани ёмон кўрмасди... йўқ. Аммо-лекин, масалан уруш пайти “Сизлар ўз оналарингиз ва хотинларингизни ҳимоя қиласпизлар...” – дейишганда у Феклани эмас, ҳаёлан Марьянни кўз олдига келтиради. Агар ҳалок бўлганида ҳам Марья ҳақидаги ҳаёллар билан ҳалок бўларди. Йиллар ўтса-да, ишқ дарди уни тарқ этмади. Бироқ юрагини ёндириган олов аввалгилик-эндигина уйланган йилларидагидек ўртамас эди, албатта. Тўғри, ўшанда бир оз камгап бўлиб қолди. Барibir, тарғиботни сусайтирмасди. Аммо гапирганда, ўзининг аччиқ ўй-ҳаёллари таъсирида, ҳаёлотидай гапираради. Гоҳо ўй сурин қолар, бирдан нимадир эсига тушиб, яна одамларни янги ҳаётга ишонтироқ ниятида, уларнинг ғафлат босган кўзларини очмоқчи бўларди. Марья эса...

Марьянни ўшанда қишлоқдан олиб кетишиди. Унга қандайдир сўтак (қандайдир эмас, Филипп у билан кейинчалик кўп бора юзма-юз келди) бойвачча Краюшкин қишлоғидан совчи жўнатди... келишди, унаштиришди ва олиб кетишиди.. Албатта, черковда никоҳ ўқилди. Орадан бир йил ўтгач Филипп Марьянинг эри Павелни учратиб қолиб:

– Виждонинг қийналмадими?.. Черковга боришга... – дея уни сўроққа тутди.

Павел ўзини ажаблангандек кўрсатиб:

– Нега виждоним қийналиши керак? – деди.  
– Қарияларнинг йўриғига юриб, никоҳ ўқитдингми?  
– Уларнинг йўриғига билан эмас, – деди Павел. –

Мен ўзим шуни хоҳладим.

– Мана шунинг учун ҳам сўрайпман-да, – деди ўзини йўқотиб Филипп. – Виждон қийналмадими? Қарияларни тушуниш мумкин, аммо сизлар-чи?.. Ахир, бу ҳолда ҳеч қачон қоронгулиқдан чиқа олмаймиз-ку!

Бунга жавобан Павел сўқинди.

– Тошингни тер! – деди-да, бошқа гапиришни истамади.

Бу учрашувдан Филипп шуни сездики, Павелнинг никоҳида унга нисбатан яширип нафрат, ҳаттоқи азобланиш акс этиб туриби. Нималарнидир англашга ҳаракат қилди, ҳеч нарсани тушунмади. Кейинчалик гап чиқди: у Марья билан яхши яшамаётганиши, аёл доимо ғамгин эмиш...

Филиппга фақат шу етмай турувди; эски дарди янгиланди, ичкиликка берилиди, аммо кейинчалик ич-килиқни ташласа-да, лекин доимо ўзи билан ўша илон чақандай оғриқни олиб юрди. Илон эса чақаверар, чақаверарди, унинг эса чидашдан бошқа иложи йўқ. Машиналарда келган келин-кўёвнинг тўйи унга мана шунақангি ғамгин хотираларни эслатди. Шу хаёллар оғушида у яна ўёқдан бу ёққа бориб келди, тушликда бир стакан арок ичишим керак, деган фикр ўтди хаёлидан. Шамол суюк-суюгидан ўтиб, негадир кўнгли ғашланда бошлади.

“Яна икки марта бориб келаман-да тушликка чиқаман” – қатъий қарор қилди Филипп. Бегона қирғоққа яқинлашганда (Филипп ўз қишлоғи томондаги қирғоқни ўзиники, нариги қирғоқни бегона деб атарди) усти ёпиқ машина ҳамда унинг атрофида тумонат одам кўринди. Бу қанақа машина эканлигини, унда майитни олиб келишаётганини синчи нигоҳлари билан ўқиб билди. Одамлар майитни ҳар доим шу ҳолда олиб келишарди. Паромга келгач ҳаммалари машинадан тушишар ва қирғоққа келиб дарёга жим қараб туришарди. Буни тушунса бўларди.

“Кимни олиб келишаётган экан?” ўйлади Филипп, одамларга нигоҳ ташлаб, – дарёнинг юқорисидаги қайсиdir қишлоқдан шекилли, чунки яқинроқдаги қишлоқлардан кимнингдир қазо қилганини эшитмаган эди. Лекин нима учун бошқа ердан олиб келишави? – Ёки уйида ўлмагану, дафн қилиш учун қишлоғига олиб келишаётганимикн?”

Паром қирғоққа етгачгина Филипп тик турган одамлар ичиди Павелни – Марьянинг эрини таниди. Ва бирдан кимни олиб келишаётганини англади. Марьянни олиб келишаётганди... Ёз бошланган кунларидан Марья шаҳарда турдиган қизиникига бораётган чоғда Филипп у билан учрашгани ёдига тушди. Паромда қирғоққа сузиб ўтгунча гаплашишганди. Марья шаҳарда қизи тукқанини, у қизига ёрдам бериш учун кетаётганини айтганди. Ширин сухбат куришганди. Марья ўшанда ёмон яшашмаётганини, уч нафар фарзандиям уйли-жойли бўлиб кетганлигини, ўзи нафақа олаётганини, Павел ҳам нафақа олаётгани-ю, аммо уйда ҳалиям дурадгорлик қилаётганини айтиб ўтганди. Мол-ҳолни унча кўпайтиришмаган бўлса-да, аммо ҳамма нарса етарли эканини, курка боқаётгани, ўтган



йили уйларини қайта таъмирдан чиқаришда шаҳардан фарзандлари келиб ёрдам берганини ҳам гапирганди.

Филипп ҳам ҳамма нарса етарли эканини, нафақа олаётгани соғлиги дурустлигини, фақат об-ҳаво ўзгаришига қараб боши сал-пал оғриб туришини айтib кўнглини юмшатганди. Марья эса негадир юраги безовтга қилиб туришини айтганди. “Баъзида ярим тунлари юрагим илкис сиқувга олиб, қаттиқ оғриб қоладики, йиглагудай бўласан”, – деганди ўшанда Марья.

Мана, охири куни битиби-да, Марьяни... Филипп Павелни таниган заҳотиёқ “оҳ” деб юборди ўз-ўзига, вужудига ўт туташди. Паром қирғоқда лиққиллаб қолган ускунага бориб урилди. Қирғоқдаги занжирни олиб, илгакка илдириди. Биринчи усти ёпиқ машина олдинги ғилдираклари билан чиқа бошлади, паромдаги ғўладай ёғочлар қисирлар, гоҳо ғичирларди. Филипп худди сеҳрлангандай эшкак ёнида қотиб турар, машинадан кўз узмасди. Худойим, Худойим, Марьяни олиб келишяпти, Марьяни...

Филипп ҳайдовчига машинани паромга қандай кўйиш кераклигини тушунтириши лозим эди, чунки орқадан яна иккита машина бир-бираига тиради турарди, у эса худди қоқкан қозиқдек жойидан қимирламас, ҳамон машина юхонасига тикилиб турарди.

– Қаерга қўй? – қичқирди ҳайдовчи.

– А?..

– Қаерга қўй деяпман?

– Қўявер...

Филипп қўлини ноаниқ силтади. У ҳалиям жонсиз Марьяни олиб келишаётгандарини тасаввурига сифдира олмас эди. Фикрини йиғиб ололмай боши тошдай қотганди. Гоҳо Марья билан паромда гаплашиб кетишаётгани, турмушидан мамнунлиги, гоҳо эса унинг қизлик маъсум дамлари кўз ўнгидан ўтарди. Ё Худойим, ё Худойим... Марья... Наҳот бу сен бўлсанг?

Ниҳоят Филипп оёқларини аранг жойидан силжитиб Павелга яқинлашди. Павелни турмуш букиб кўйганди. Юзлари ҳали сўлмаган, тийрак ва маънодор бўлса-да, аммо қадди дол эди. Ақлли кўзларида мусибат ва сабот зоҳир.

– Павел...нима бўлди? – сўради Филипп.

Павел зимдан секин қаради, аммо нимани сўраётганини тушунмади, шекилли, нигоҳини яна пастга, паром тахталарига қадади. Қайта сўраш Филиппга нокулай туюлди... У яна эшкаги ёнига қайтиб келди. Қайтаётib ёпиқ машинанинг орқасидан ўтаркан қаради – тобут. Зумда юрагига оғриқ кирди, фикри равшанлашди: ҳа, бу – Марья.

Паромда сузуб кетишиди. Филипп ихтиёrsиз эшкак эшиб бошқарар, хаёл сурарди: “Марья, Марьягинам”... Дунёдаги энг азиз одами у билан охирги марта сузуб бормоқда... Ўтган ўттиз йил давомида, паромчи бўлиб ишлайтгандан буён Марьянинг неча марта у ёқдан бу ёқса сузуб ўтганини аниқ биларди. Асосан болаларининг ҳолидан хабар олгани шаҳарга тушарди: гоҳо ўқиши, гоҳо ишга жойлашиши деб, гоҳо эса набирлари туғилганда... Мана энди – Марья йўқ. Паром қирғоққа етиб келди.

Яна занжирлар шарақлаб, машиналар мотори гувилларди. Филипп эса эшкаги ёнида турганча усти ёпиқ машинага тикиларди. Ақлга сиғмайди. Марья ўлиб қолса нима бўлади деб сира хаёлига келтир-

маган. Ақалли, бир марта ҳам ўйлаб кўрмаган. Унинг ўлимига тайёр эмас эди. Усти ёпиқ машина жўнаб кета бошлаганда Филипп кўкрагида чидаб бўлмас оғриқни ҳис қилди. Ўй-хаёlinи “нима қилишим керак?” деган безовталик чулғаганди. Ахир ҳозир мархумани қабристонга олиб кетишади. Бутунлай. уни шу кўйи, нигоҳи билан кузатиб қолаверадими? Бу қандай гап? Безовталик вужудини чирмади, у эса жойидан қимирлай олмас, лаҳза сайин ўзини йўқотиб борарди.

“Ахир видолашишим керак эди-ку!” – машина йўлга чиқиб олганда ўзига келди ва буни тушуниб етди. – “Ҳеч бўлмаса, видолашай-да!.. Ҳеч бўлмаса, охирги марта бир кўрай. Тобутнинг қопқоини ҳали ёпишмаган, кўриш мумкин, ахир”. Филиппнинг назарида, унинг ёнгинасидан Марьяни олиб ўтаётган анови одамлар, бунақа иш тутмасликлари керак эди. Нима, олиб ўтишди – тамомми. Агар бу кимнингдир мусибати бўлганда ҳам... ҳаммадан кўпроқ бу унинг – Филиппнинг ғам-қайғуси-ку! Тобутда Марья ётиби, ахир.. Улар уни қаёқقا?..

Филиппнинг ёдига у яшаб ўтган оғриқли ҳаётдаги вақт йўқотолмаган, унтиш мумкин бўлмаган энг азиз нарсалар ёрилиб кела бошлади. Ўтган бутун умри, энг асосийси, энг кераклиси, нима учун яшаган бўлса, кўз олдида турарди... У йиглаётгандигини ҳам сезмайтган эди.

Тобут ортилган машина ортидан кўз узолмади. Машина юқорига кўтарилиб муюлишга етгач бурилиб кўздан ғойиб бўлди. Мана энди унинг ҳаёти қандай кечади? Ахир у ер юзида Марья борлигига ўрганиб қолганди. Кўнгли ўксиган, ғамзада бўлган дамлар – у Марьяни эслар ва ўзини сағир эмасдай ҳис этар, у билан дунё тўлиб турарди. Энди-чи, энди нима бўлади? Э Худо, усиз ҳаммаёқ хувиллаб қолади: бўм-бўш, қандай оғир-а?

Филипп паромдан отилиб тушди; баҳтига сўнгги машина нимагадир жилмай турарди. Филипп ҳайдовчининг ёнига келди-да:

– Усти ёпиқ тобут олиб кетаётган машинани қувиб ет, – деди ўтинч билан кабинага чиқиб оларкан.

– Нега? Нима учун?

– Шундай қилмасанг бўлмайди.

Ҳайдовчи елка учириб, бошқа гап қотмай машинани жилдириди. Қишлоқ оралаб кетишаётгандан эса у Филиппга бир неча бор синчков назар ташлади.

– Булар Краюшкинларданми? – деди сўради ҳайдовчи боши билан олдинда секин илдамлаётган машина тарафга имо қилиб.

Филипп секин бош иргади.


– Қариндошингми? – яна сўради ҳайдовчи. Филипп бу гал чурқ этмади.

У ҳамон усти ёпиқ машина ортидан кўзларини тикиб борарди. Кузовнинг орқа тахтаси туширилган юхона ўртасидаги тобут кўриниб турарди. Тобут атрофида ўтириб олган одамлар бирдан ўзи учун ҳам, мана бу тобут учун ҳам бегона туюлди. Қайси урфга биноан улар у ерда ўтиришибди? Ахир, тобутдаги Марья-ку.

– Қувиб ўтайми? – сўради ҳайдовчи.

– Қувиб ўт... Ва мени тушир.

Машинани қувиб ўтишди. Филипп кабинадан тушди ва қўлини кўтарди. Шунда юраги қинидан чиққудай



бўлиб ўйнаб кетди, худди назарида, ҳозир нимадир юз беради ва ҳаммага, Филиппга ҳам бир сир – аслида, Марья унинг кими бўлгани ошкор бўлади-қолади.. Машина тўхтагандан сўнг нима воқеа юз беришини ва қандай сўзларни тўкиб-сочишни билмасди. Марьяни эса жудаям кўргиси келарди. Бу унинг учун ҳамма нарсадан муҳим ва зарур эди. Марья шундай кетаверадими, ахир унинг – Филиппнинг умри ҳам ўтиб бўлди, кўнглига яқин одам ҳам қолмади.

Машина тўхтади. Филипп орқа томонга ўтди... Кўллари билан орқа тахтани ушлаб, оёғини темир нарвончага қўйиб кузовга чиқиб олди.

– Павел, – деди ўзи кутмаган ялинчоқ овозда (у бундай ялинчоқ овозда гапирмоқчи эмас, ўзи ҳам кутмаган эди) – У билан видолашишимга изн бер. Ҳеч бўлмаса, бир бор кўрай, оч.

Павел ўрнидан кескин қўзғалди ва тўғри унга қараб юрди. Филипп унинг бўздай оқарган юзини кўришга ултурди. Заҳилланган юзлар, боя ғамга тўлиб турган кўзлари туйқусдан чақчайиб кетди, бирдан ғазабга тўлди.

– Кет, бу ердан! – секингина, аммо кескин буюрди Павел ва Филиппнинг кўкрагига туртди. Филипп буни кутмаган эди, мункиб кетди, кузовни маҳкам ушлаб қолмаганди...

– Кет!! – қичқириб юборди Павел. Ва яна уни туртди, бу гал қаттиқроқ туртди. Филипп бор кучи билан тахтани маҳкам ушлаб турад, Павелга қарап ва уни таний олмаётганди. Ва ўзи ҳам ҳеч нарсани тушуниб етмасди.

– Ҳой, сизларга нима бўлди? – машинадагилар қўзғалишиди. Бир йигит, Павелнинг ўғли бўлса керак, дарров отасини елкасидан ушлаб нарироқча тортди. – Сизларга нима бўлди?

– Кетсин? – яна ғазаб билан ўкирди Павел. – Кетсин у бу ердан! Мен унга кўрсатиб қўяман кўришни. Судралиб келганини қаранг илонни! Жўна! Жўна! – Павел жойида тепинар ва аламдан шайтонлаб қолганди.

Филипп машинадан тушди. Шундагина Павелдан нима ўтганлигини тушунди. Барибир, пастда туриб ҳам унга ғазаб билан тикилди. Ўзи англамаган ҳолда нималарнидир гапира бошлади. Бу сўзларни бир умр юрагида туғиб юрган кўринарди.

– Нима, ачидими?... Бирорвонкини тортиб олиб, ... энди ачиняптиларми. Ўшанда қувонган эдинг-ку?...

– Сен-чи, қувонмаганмидинг! – деди кузовдан ту-

риб Павел, – мени билмайди дейсанми, қанчалар қувонганингни!

– Бошқаларнинг бахти эвазига қурилган ҳаёт, мана қандай бўларкан, – давом этди Филипп, унинг тепадан нима деяётганига эътибор бермай. Муҳими, юрагида борини айтиб қолмоқчи бўларди. – Ҳузур-ҳаловатда яшайман деб ўйлаганмидинг. Йў-ўқ, унақа бўлмайди. Мана энди кўриб турибман, буларнинг ҳаммаси сенга қанчалик қимматта тушганини...

– Ўзинг-чи, ашула айтиб юрдингми? Сен-чи.. Ўзинг... Ўзингни ҳам эгиб ташлабди-ку! Яхши яшаганинда эгилармидинг?

– Ўшанда қувонгандинг. Мана – қувониб бўлдинг... Тиланчи! Ҳа, тиланчисан!

– Ҳой, нима қиласизлар?! – жаҳл билан деди бояги йигит. – Эсдан оғиб қолдиларингми? Топган вақтларингни-чи!

Машина жўнаб кетди. Павел яна бир бор бақиришга ултурди:

– Мен тиланчиманми? Сен эса бир умр дарвозадан киролмаган итга ўхшаб ғингшиб ўтдинг! Мен эмас, сен тиланчисан!


Филипп секин ортига қайтди.

“Марья, – ўйларди у, – эҳ, Марья, Марья... Мана қандай қилиб ҳамманинг қанотини қирқиб ташладинг. Иккита аҳмоқ – роса ҳурдик... Аслида-ку, иккаламиз ҳам тиланчимиз, Павел, сен кўпам акиллайверма. Агар сен гадой бўлмасанг, нега бунча ғазабланасан? Нима кераги бор ғазабланишнинг? Ёшлиқда бахтнинг бир бўлганини ушатиб олгандинг, курсанд бўлиб яшайвермайсанми? Аслида сен ҳам қувонч нималигини билмай ўтдинг. Сени у севмасди-да, мана, ичингдаги ғам бўғзингдан тошиб чиқди. Ўшанда тортиб олмаслик керак эди. Келдинг, олдинг, кетдинг!.. Хурсанд бўл”.

Алам қилди Филиппга... Энди алам ёнига Марьяга бўлган гинахонлик ҳам қўшилди. Марьяга хаёлан мурожаат қилди: “Сен ҳам ўзингга ярашасан, кутиб туролмадинг, чопдинг Краюшкинга қараб, фойдаси бўлмаса ҳам. Чидамасанг чиллак ур”.

– Ҳаммаси тугади, остин-устин бўлди, – дея ўзича ўйлади Филипп. – Энди бир амаллаб судралиб умргузаронлик қилишу, унинг ортидан бу фоний дунёдан кетиш қолди.

Шамол анча пасайди, осмон очилди, қуёш нур сочса-да, илитмайди. Атроф қандайдир шип-шийдам ва совуқ. Куз бўлгандан кейин иссиқ қаёқдан ҳам бўлсин?



Ориф ҲОЖИ

# Нази Нази Нази Нази Нази



## Мени согиндингми, яйдоқ адиулар

\* \* \*

Лойсувоқ томларда оқ парда,  
Хасларга осилган ип – мезон.  
Хосилдан ариган боғларда,  
Сезиниб кезинар баргрезон.



Дараҳтлар – қариган донишманд,  
Сўрсанг ҳам сўрмасанг гап сотар.  
Ярақон бўлгандек паст-баланд,  
Сариқча чулганиб зап ётар.


Балиқча термулар сариқ тол,  
Янроги – чехраси қаҳрабо.  
Сафронинг гулуси кўп малол,  
Ё Ҳаво, ё Савдо! Марҳабо!

\* \* \*

Севардинг-ку ахир, не бўлди?  
Жавоби сукут...  
Ориятнинг қадди букилди,



Ориф ҲОЖИ



1966 йилда таеваллуд топган. Унинг “Банди руҳ”, “Озод руҳ”, “Янги оҳанглар”, “Самарқанд сайқали”, “Қирқ ҳадис ва бир ривоят”, “Оналар оёғи остида жаннат”, “Ишқ йўли” номли шеърий, “Оппоққина қушгинам”, “Оқ туллор” номли ҳикоялар тўпламлари чоп этилган.

Ор, уятнинг қадри тўқилди.  
Қиз тек қотди, йигит – эгилди,  
Силкинди-ю қомати дуто,  
Юлқинди-ку юракдан нидо:  
**БЕВАФО!**

### КЕЛТИРДИ-КУ

Ақтим санинг ҳушиёргилинг  
Бошга бало келтирди-ку.  
Ҳар нарсага тайёргилинг  
Жонга жафо келтирди-ку.


Биз икки-уч ўртоқ эдик,  
Гоҳ жуфтуту гоҳи тоқ эдик,  
Шодлик оқар ирмоқ эдик,  
Дарё бало келтирди-ку.

Дунё маним дунём деган,  
Эл ҳаққини тинмай еган,  
Ҳаргиз инсоф билмайдиган,  
Қози қазо келтирди-ку.

Кўм-кўк рўмоллар бир гўзал,  
Лаблари мисли қанд-асал,  
Ширин бўлиб шундан газал,  
Шўх-иуҳ ҳижо келтирди-ку.

Ўйноқлаган тойчоқдайин,  
Шоҳ ташлаган ўғлоқдайин,  
Ўйнаб бир лаҳза тинмайин,  
Нозу адo келтирди-ку.

Ўйнаб келар бир енгили,  
Кўкрак очиқ, очиқ бели,  
Чумчук чўқигандай тили,  
Сўзга сазо келтирди-ку.



Ўздан кетибдур ойжамол,  
Йўлдан уриши айлар хаёл,  
Бундоқ бўлурму соғ аёл,  
Кўзга зино келтирди-ку.

\* \* \*

Мени согиндингми, яйдоқ адирлар,  
Беармон пиёда кезган қирларим.  
Қадрини йўқотди қанча қадрлар,  
Шахтини бой берди қанча шеърларим.

Мен сени мақташга сўз тополмадим,  
Сен деса, лол бўлди бурро забоним.  
Нафс ити кетидан кетдим, қолмадим,  
Қайт дея айтмади урҳо замоним.

Энди сенда ҳаёт мароми ўзга,  
Гуллару гиёхлар сотилаётир.  
Кибор қараимоқда бунда ҳам сўзга,  
Дилимни кемирар хавфу хавотир.

Наҳот, адирларда кезинган шамол,  
Елим халталарга секин жойланса.  
Шарқироқ жилгалар бир кун бемалол,  
Аввал музлатилиб, кейин тойланса.

Пастликлар келибди бу кун тогларга,  
Сойларда шумликлар жўш уриб оқар.  
Соғлик согинмайди соглар согларга  
Сўзларида риё уфуриб ётар.

Одамлар панд берар бири бирига,  
"Қани элим" дедим, қаттиқ ўксидим.  
Шу тоз-ку уларни боқар авайлаб,  
Булоқдай сут бериб, куюк қўксидин.

## ТАГЛАВҲАЛАР

Оромингнинг кушандаси у,  
Ўғирлайди дилдан ҳаловат.  
Бир ишингни битирмайди-ю,  
Унумтирасро роҳат, фарогат.

Татимайди ичган, еганинг,  
Кўзларингга уйқу даримас.  
Эсда турмас нима деганинг,  
Юрагингдан доим аримас.



Аланглайсан, кўрмайсан аммо,  
Пешонангда турган баҳтингни.  
Ҳар қадамда янги муаммо,  
Баракаси қолмас вақтингни.

Бу беҳуда бекор ташвишдан,  
Одам борки юраги қийма.  
Безор қилар қолдириб ишдан,  
Бир пулга арзимас ВАҲИМА.

\* \* \*

Саратонда барги сарғайди,  
Қииш тез тушар деган дарак бу.  
Мени кўп бор огоҳлантирган,  
Адашмаган қари терак – бу.

\* \* \*

Салкам ярим аср –  
Мен сўз излайман.  
Салкам ярим аср –  
Сўз мени излар.  
Сочига оқ тушибди,  
Ёки тўқилди,  
Мен "сочи сумбул" деб  
Мақтаган қизлар.

\* \* \*

Қалбинг туб-тубига бўйладим аста,  
Не-не аждарларни кўрдим уйқуда.  
Секинроқ шивирла! Уйгониб кетса,  
На сени, на мени қўймас осуда.

\* \* \*

Саратон саврдан кўра устароқ,  
Аёлларни ечинтирмоққа.

\* \* \*

Терак япроқлари – минглаб елтигич,  
Фаришталар елтинар тинмай.

\* \* \*

Япроқлар мунча кўп шивирлар,  
Дарди адo бўлмас бўй қиздай.

\* \* \*

"Шу одамга мазза", деб ўйлар,  
Адирдаги чўпонни кўриб,  
Саёҳатга чиққан шаҳарлик.



Исломжон ЁҚУБОВ

Адабиётшунослик  
Адабиётшунослик  
Адабиётшунослик



## РОМАН ~ МУСОҲАБА

Шоир, носир, драматург ва тадқиқотчи Комил Авазнинг “Қўналға” номли илк романида ўндан ортиқ қистирма эпизодлар келтирилади. Баҳоуддин Нақшбанд ўз орифона одоби билан такаббур бойваччани тарбиялаши, тадбир ила очқўз вазирни жазолаши шулар жумласидандир. Ушбу ривоят моҳият эътибори билан эпик баёнчи “мен” дунёқараши нечоғлик кенг ва чуқурлигини кўрсатишга хизмат қиласди. Роман қаҳрамони бир пайтлар бобосидан эшитган Сулаймон алайҳиссалом ва тўти ҳақидаги иккинчи ривоятни ўзига тасалли излаш тилагида эслайди. Ушбу ривоят орқали Яратувчи иродаси-ла битилган тақдирга тадбир йўқлиги, банданинг сабр қилишдан ўзгаchorаси бўлмаслиги уқтирилади. Ривоят мазмуни мантиқий тарзда Яссавий ҳикматларига уланади. Шоир лирик қаҳрамони кечинмалари орқали баёнчи руҳиятига хос жиҳатлар очилиб, роман мазмуни кучайтирилади.

Кўринадики, адаб қўллаган тарихий ривоятлар асосида тўқима воқелик ва Нақшбанд, Сулаймон сингари тарихий шахслар ҳаёти билан боғлиқ ҳодисалар

ётади. Улар баёни образ тақдири ва фаолиятига мантиқий тарзда туташиб, ахлоқ-одоб ташвиқига хизмат қиласди.

Асарда келтирилган латифа эса эпик баён тарзи бот-бот гўзал ва нафис ифодалар, ҳазил-мутойиба оҳангига билан алмашиниб туришидан гувоҳлик беради. Ровий ҳалқимиз нозик фаҳмлилик билан айтган, танқидий мазмундаги кулгили, жонли ва таъсиран ҳикояни романга “ҳазм” қиласди олади. Бу ҳозиржавоб шахс ўрни билан қочириқ, кесатиқ, пичинг оҳангига сўзлашга уринади. Демак, ёзувчи фольклорнинг барҳаёт қаҳрамонларидан баракали фойдаланиб, замон ва макон чегараларини кенгайтиришга эришади.


Комил Аваз ҳаётий воқеаларни кўп кўрган, хўп тинглаган. Шоирона табиатига хос кузатувчанлик сабаб туйган кечинма-ҳолатларидан муайян сабоқлар чиқаришга интилади. Романда бу ҳол баён тарзининг кўнгилёзди ҳангомаю ишратангиз гурунглар билан алмашинувида намоён бўлади. Адаб ҳақ ва ҳақиқат ҳақидаги мушоҳадалардан кўнгил ёзишга майл билдиради. Бундай кезларда китобхонни кум сайри, гулхан ёлқини, чўғ ҳовурига интиқ кайфиятга чулғаб оҳиста оҳангда мароқли гурунг беради. Гулхан теграсидаги гурунг хуштаъм. Чунки, унда умр мазмуни лаҳзаларга жамланади. Ишқ кудрати ва ҳайбати Тангрининг инъоми экани эътироф қилинади. Ишқ банданинг ихлоси, эътиқоди, пок кўнгли ва порсо қалбига лойиқ меҳмон. Адаб бизни масрур кайфиятдан ноxуш итмолом сари етаклайди. Моддиятга руҳий мубтало Паризод тақдиридан ибратли хуносалар чиқаришга уринади. Табиийки, баён ҳам сухбатдош билан қизгин мусоҳаба асосига қурилиб, диалогик характер касб этади. Ширин сухбат асосидаги фикрни тасдиқлаш зарурати роман матнига янги ҳангомани олиб киради.

Мулла Тўйчи ҳофиз ва Ҳожиҳон Болтаев муносабатларида ҳиммат, кечиримлилик, санъат ва санъаткорга бўлган самимий эҳтиром кузатилади. Машариф акага хос зоҳирий тўпорилик ва ғоятда ҳозиржавоблик, дўсти Абдулла ака ишбилармону ишчанлиги, адолатсизлик ҳукмрон бўлган шўролар даври ҳақидаги тасаввурларимизни бойитади. Улар ўша даврнинг қамоқхона азобу хўрликларига қарамай, қайта ўнгланишса-да, ўз саҳв-хатоларини ҳам эътироф этишлари китобхонга ҳаётда яшаш ва кураш шакл-шамойиллари кўплигидан ибратли сабоқ беради.

Исломжон ЁҚУБОВ



1961 йилда туғилган. Нукус Давлат университетининг филология факультетини тамомлабоған. Филология фанлари номзоди, доцент. Адабиётшунослик муаммоларига бағишиланган “Ўзбек романни тадрижи”, “Бадиий-эстетик сўз сехри”, “Миллий ўйғониш даври ўзбек насрини”, “Бадиий матн ва эстетик талқин” сингари ўндан ортиқ монография, рисола ва мақолалар тўпламлари нашр этилган.



ди. Шундан сўнг келтирилган Огаҳий чистони илгари сурилаётган фикрни мантиқан тасдиқлаш, миллатни фикр одамига айлантириш лозимлигини таъкидлашга хизмат қиласи. Суҳбат мавзуси яна Паризод тақдирига уланганида Паҳлавон Махмуд, Алишер Навоий, Фузулий ижодидан келтирилган ҳикматлар мисолида фәқирлик илоҳий мартаба эканлиги ҳақидаги фикр янада қатъийлаша боради. Аҳли хос ҳолидан сўз очаётган баёнчи ҳис-туйғуларига хос нозик сезимлар ҳам китобхонни бефарқ қолдирмайди. Зотан, ҳангомаю гурунг ўзига хос шеърий мубоҳасага айланиб, бирбирини тўлдиради. Бизни ўзининг сехркор олами сари етаклади. Муҳими, улар баёнчининг айни дамдаги руҳий-психологик кечинмаларига вобаста, қай бир жиҳатлари билан ўйқашдир.

Роман қаҳрамони хаёл оғушида кезинаркан, асар замоний миқёси ҳам қадим хон замонлари сари кенгая боради. Шу тариқа, романга Давлатбика фожиали тақдирни ҳақидаги ҳалқ ҳикояти кириб келади. Давлатбика “Сабъаи сайёр” достонидаги Дилором, “Кеча ва кундуз” романидаги Зеби сингари гўзал ва айни пайтда санъаткор аёл. У етимлиқда беҳад хўрланган Карим чийчининг ҳамдарди, яқин маслаҳатчи ва итоаткор ҳамдамидир. Давлатбика ноҳақ тұхмат ва шоҳ ғазабига дучор бўлади. Аммо у адопатсизликка қарши исён кўтарган соҳир қалбига қулоқ тутиб, ўлимни тик қаршилайди. Ахир, у қочиб жон сақлаши мумкин эди. Нега шундай йўл тутмади, тутолмади? Китобхон кўз ўнгига қизини бағрига босиб эркалаётган Давлатбика меҳрибон она, орзулари уммон ҳаётга ташна аёл сифатида намоён бўлади. Айни пайтда, бизнинг кўз ўнгимизда Давлатбиканинг ўлимга тик бораётган дамдаги қаҳрли ва ғазабнок нигоҳи муҳрланиб қолади. Унда аксланимиш исён излари руҳиятимизни мувоза-натдан чиқаради.

Дарҳақиқат, барча замонларда ҳам нозик кўнгилга дахл қилиш, пок дилни топташ ва мағрур қалбни маҳв этиш имконсиз. Сирли яратиқ бўлмиш инсон тийнати ҳамиша мўъжизаларга бойлигини яхши англаған ровий ҳамиша ҳам аҳли ҳикмат фикри тасдиғи йўлидан бормайди. Зотан, ҳар бир бандани ўзига хос ҳикмат, қашф этилмаган хилқат деб билади.

Романда келтирилган Гули тақдирни билан боғлиқ “тарих” ҳикоячи-персонаж лафзи ва оҳангода берилади. Бироқ, унда бир қадар баёнчиликка берилиш ҳам кўзга ташланади. Сайд ва сайёд ҳақидаги нақлда келтирилган ҳикмату насиҳатлар соддадил ва кенг-феъл ҳалқимиз қиёфасини чизиш, хусусан Раҳим aka ҳақидаги тасаввурларимизни янада бойитишга хизмат қиласи. Нақлда оламга ақл-фаросат назари билан боқиш лозимлиги, сўнгги пушаймон бенафлиги таъкидланади. Кум сахросида адашиб, омонат

кўналғадан макон топган кимсанинг марҳумлар ёди ҳақидаги илиқ таассурот-армонлари кўнглидаги кўркув ҳиссисдан халос бўлишига қўмаклашиши, пировардида заминга эътиқод, ҳалоллик, меҳр-шафқат туйғуларига туташиши жиҳатидан характерлидир.

Шариф ака уйидаги дилтортар сұхбат асносида, бамаъни даврада айтилган Муҳаммад Муслим ва Юсуф Ҳаёт Термизий ҳақидаги нақл воситасида шиддат билан ривожланаётган замон одамлари табиатидаги шошқалоқлик ва тезоблик таҳлил этилади. Муаллиф нақлни худди тадқиқотчилар сингари шарҳлар экан, сабр – иймон камолига хизмат қиласи. Тақдир – ҳақ, таваккул – бутун, эътиқод – чин, орифлар сұхбати – муборак, мақсад – улуғ бўлмоғи лозим деган хulosага келади. Бинобарин, сұхбат моҳиятидан улуғ орифона ҳикматлар топади. Уларга амал қилиш фарз эканлигини уқтиради.

Умуман, сұхбатдошлар гурунги ҳамиша бирорта ривоят ёхуд нақлга уланиб, фикр ойдинлаштирилади ва мустаҳкамланади. Масалан, муллабачча ва имом ҳақидаги доно нақлда оломонликнинг замони ва макони бўлмаслиги уқтирилади. Туяқуш ҳақидаги нақлда мамлакат бошқариш оқиллар иши эканлигига ишора қилинади. Қоровул билан бўлган ичкин сұхбат асносида келтирилган отамерос бойликни елга со-вурган тантн бойвачча ҳақидаги нақлда эса, инсон ҳалол меҳнати, бут иймон-эътиқоди туфайли эъзоз ва эҳтиромга лойиқ эканлиги уқтирилади. Шу тарзда, роман мушоҳада кўлами мислсиз кенгайиб боради.

Роман матнига сингдирилган ҳалқ қўшиқ ва достонларидан тортиб, Саъдий, Паҳлавон Махмуд, Яссавий, Навоий, Фузулий, Насимий, Машраб, Огаҳий, Нобий, Фурқат, Аваз, Увайсий, Зебунисо, F.Гулом, И.Султон, А.Орипов, Э.Самандар, М.Икром, С.Есенин ва бошқа араб, форс-тоҷик, ўзбек ва рус шоирларининг шеърий сатрлари ровийнинг шеъру шуур, онгу орифлик, қалбу қавил, соддалигу мураккаблик, табиату инсонийлик ўртасидаги муштараклик борасидаги ўй-хаёлларига ойдин нурлар индиради. Ҳаёт таянчани топишига қўмаклашади. Шунингдек, онгу шуурга-да бўйсунмас юрак талпинишлари илоҳий асрорини англай боришига йўл очади. Шундай ўринлар “Қўналға”ни ўзига хос роман-мусоҳаба дейишга асос беради.

Шубҳасиз, романнинг айрим ўринларида ортиқча тафсилотлар, баёнчиликка берилиш, жўнроқ фикр мулоҳазаларни илтари суриш ҳоллари ҳам йўқ эмас. Бироқ, улар романнинг умумий қимматига соя солмайди. Кузатганимиздай, “Қўналға” да қўниб ўтиш, унинг файзиёб гурунглари билан тиллашиш китобхон маънавиятини янада бойитади. Шунингдек, ушбу асар турли ракурсдаги илмий кузатишларга манба бўла олади.





Жасур КЕНГБОЕВ

Наср  
Наср  
Наср  
Наср  
Наср  
Наср



## ФУРБАТХОНА

Ҳикоя

Ёз чилласида ҳўқиз ўлибди,  
Қиши чилласида арпа гуллабди.  
**Мақол.**



Жасур КЕНГБОЕВ



1985 йилда Қашқадарё вилоятининг Чироқчи туманида туғилган.

ЎзДЖТУнинг халқаро журналистика факультетини тамомлаган.

“Оила давраси” газетаси бош муҳаррир ининг ўринбосари.

Эрта тонгда телефон жиринглади. Гўшакни кўтарсам – амаким:

– Маҳмуджон, – деди хавотирли оҳангда. – Машинангизда янгангизни бир жойга олиб бориб келинг, илтимос...

Хўп, дедим. Чой-пой ичиб, кўчага чиқсан, қор учкунлаб турибди. Ердагиси эримай, боз ёғаётган бу қор ҳайдовчи зотининг кўқайнини кесиб юборади. Тонггача машинанинг мотори совиб қолади. Базур ўт олдирдим. Салонда ўйнаб турган буюқдан этим симиллайди.

Борсам, янга ва келини катта йўлга чиқиб турган экан. Йўлга тушдик. Машина ойнасидан қараб-қараб кўяман. Икковининг ҳам юз-кўзида жиндек фаромушликни сездим. Уйи нотинч одамларда ҳаловат бўладими. Муаммолар гирдобида қолган қариндошимизнинг бошига кетма-кет тушаётган ташвишларни билсан-да, жўяли тасалли беролмайман. Лекин ҳар эсга тушганда ичимда ёлвориб, кушоийиш сўрайман. Қанчалик ачинмайин, кўлимдан келгани шу эди. Ҳозир йўлда кетяпмиз-у, дурустроқ кўнгил ҳам сўролмаётганимдан хижолатда эдим. Пойинтар-соинтар ҳол сўрашларимдан сезди, шекилли, янгамизнинг ўзи гап бошлади.

– Ай, ҳеч кимга кўрсатмасин бу кунни, укам, – деди янга. – Кўз тегдими, билмайман, ҳадеб ишимиз орқага кетяпти. Акангизнинг бизнеси юришмай қолди. Биласиз, рўзгоримиз каттагина, томиб тургани ҳам қуриб қолди. Ўғилларнинг ҳам топганидан барака кетди. Мана, куни кеча ҳўқизимизни ўғри урди. Учинчи марта-я. Аввал-бошда йигирма жайдари кўйимизни ўғирлаб кетишганда дод солиб қолдик. Орадан йил ўтмай, яна беш кўчкорни ўмариб кетишиди. Ўйлайвериб, юрак ўйногини орттириб олдим... Мол аччиғи – жон аччиғи. Туёқларни деб, бормаган идорамиз қолмади. Мелисама-мелиса юриб, тинкамиз қуриди. Бу жигилдонингга ўт туштур мелиса деганиям юходан бери экан, уларга иш тушмасин экан. Ўзингиз айбдорсиз, янга, дейди. Мол сақлаган одам аввал истеҳкомни бакувват қуриши керакмиш. Ҳей ургилдим, уйимни ўғри урса, сенга ишониб борсам,



келиб-келиб мен манглайи қора жабрдийдага насиҳат ўқийсанми деб уришдим.

Мол молга етгунча, Азроил жонга етар экан, ука. Давления бўп қолаёздим. Булар-ку, майли, ҳар нарсанинг давоси вақт, қулогини ушлаб кетган молларимизни энди эсдан чиқарамиз деганимизда, кўрмайсизми, капагинангга ўт тушгурлар тишимизнинг кавагида сақлаб ўтирган хўқизимизни ўғирлаб кетишиди. Дардимизни кимга айтамиз? Акангизнинг ишлари бу, ўғилларим ҳам гандираклаб қолди. Хонавайрон бўлдик-да...

Жим эшитиб кетяпман. Кўзимнинг устидаги бу одамларни яхши биламан: ҳалол, бировнинг ҳақини емайдиган инсонлар. Лекин ғам-ташвиш ҳам дардга ўҳшаркан: бир келса, қўшалоқ келади. Мадда бойлаб, мусибатга айланиши ҳам мумкин. Шундан асрасин, деб ўйладим ва таскин берган бўлдим.

– Чўкаётган одам хасга ҳам ёпишармиш, – деди янга. – Ҳеч ишдан натижча чиқмагач, мана, охири бир фол очириб ҳам кўрайлик-чи, деб кетяпмиз-да, укам. Эскилар ҳам бир нимани билар...

Йўл узоқ, машина сирпанчиқ йўлда чайқалиб-чайқалиб олади. Секин юрибмиз. Бир ярим соатларда манзилга етдик. Одамлардан сўраб-сўраб, номи чиқкан фолбиннинг уйини топдик. Мен ўшанда фолбин деганларининг уйи ҳақида илк тасаввурга эга бўлганман: одамлар дўхтири табибга ҳам бунчалик ихлос билан нажот истаб келмаса керак. Саҳардан ҳовлида ўн-ўн беш ҷоғли одам. Дардига малҳам тошиш илинжида Худога тилмоч-воситачи қидиргандар бунча кўп бўлмас...

Биз ҳам фолбин ҳовлисида навбатда турдик. Одамлар бирин-кетин кириб-чиқяпти. Бировнинг юзида табассум, кимдир маъюс тортиб ташқарилайди.

Қанча кутдик, билмайман, навбати келиб, янгам билан келини кириб кетишиди. Мен эса одамларга қўшилмай, бир ўзим чеккарока уларни кута бошладим. Ҳаммадан айро турганимни кўриб, бир хотин «Хой ука, сиз ҳам фолга келдингизми?», деб сўраб қолди.

– Янгаларимни опкелдим, уларни кутиб турибман, – дедим.

– Вой, бу хотин манаман деган фолбинингиздан зўр, – деди аёл билагонлик қилиб.

– Аввал келганимисиз? – дедим жўртага.

– Бир келиб қойил қолганман. Мана, яна келдим.

– Бирор муаммонгиз борми?

– Йўғ-а, яхшиликка келдим, айнанай, яхшиликка. Айтдим-ку, бу хотин ҳамма нарсани билади, айтган гапнинг бари тўғри чиқади.

– Шунча зўрми?

– Ҳа, мана бундай! – дейди у бош бармоғини юкорига кўтариб. – Ўтган иили, бир қўшним мақтагани учун иккиланиб-иккиланиб бир келувдим. «Бахтингиздан очайми ё таҳтингизданми?» деб сўради. «Таҳтимдан» дедим. У қўлларимга чизиқ чизиб, «Синглим, сизга нұқта тушяпти. Сиз бир ой деганда каттагина ҳовли-жойли бўласиз. Фақат шу келаётган ойда уни олиб, баҳт қушиңгизни ушлаб қолсангиз қолдингиз – бўлмаса, сизда бундай имкон бошқа бўлмайди» деб айтди. Хурсанд бўлиб кетдим. Уйга бориб, дасасига маслаҳат солдим. Бирам йўлнимиз очилди-

ки, дадамиз дарров рози бўлдилар. Эски шаҳардаги икки хонали уйимизни сотдик. Қуриб кетсин, темир бўлса, топилади-да, деб машинамизни ҳам пулладик. Ҳовлига озроқ етмай қолди. Орадан йигирма кунча ўтиб кетди. Ноилож бўлдик. Кейин қўни-кўшни, қариндош-уругдан ҳам анчагина қарз кўтардик. Лекин, курғур хотин рост айтган экан, бир амаллаб, йигирма тўққизинчи куни шу атрофдан, данғиллама бўлмасаям, бундайроқ ҳовли-жойни сотиб олдиг-ей. Бало экан бу фолбин!

– Э, қойилман сизларга! – деди ёнимизда қунишибгина турган бир эркак.

– Ҳа, жуда топиб айтар экан ўзиям, – дея кулиб қўйди қошлари қалин бир хотин.

– Бугун нимага келдингиз унда? – дея сўради момик рўмолли хотин.

Аёл одамлар гапини жон қулоги билан эшитиб турганигами, тоза ийиб кетди:

– Бугун ўғлимнинг масаласида келувдим, айнанай, – деди.

– Ўғлингизга нима бўлти? – сўради момик рўмолли хотин.

– Вой, ҳеч нима қилмаган. Яқинда йўл-йўлакай кириб кетгандим шу опага. Ўғлим ўзгариб, инжиқ бўлиб қолди, дедим. Фол очиб қўйди. «Яхшилаб эътибор беринг, ўғлингиз севиб қолган», деди. Уйга бориб, сикувга олдим ўғлимни. Ростдан ҳам севиб қолган экан. Яна келдим опага. Ўғлим севиб қолган қизни келин қилсан, яхши бўладими – ёмон бўладими, опа, дедим. Фол очиб, бу қизга уйланса яхши бўлмайди, деди. Кейин исми «А», «З», «М», «Ш», «Ҳ» ҳарфлари билан бошланган қизлардан келин қилманг, деб айтди. Мен хўп деб чиқиб кетибман...

– Кейин-чи, кейин? – дейишдик бирваракайига. Бу аёл айтиётган гаплар росманасига ҳаммамизни қизиқтириб қўйганди.

– Кейин... келиб ўғлимга айтдим шу гапларни. Ўғлим хўп деганди...

– Хўш-хўш, кейин-чи? – тобора қизиқиб борардик унинг гапига. – Кейин нима бўлди?

– Кейин нима бўларди, – деди аёл кўзларини жавдиратиб. – Кейин... мана, келдим яна.

– Ия, яна нима бўлди? Энди нима учун келдингиз? – деб сўради момик рўмолли аёл.

Хотин бир дам сукут сақлади. Сўнг сохта файласуфлик билан қошларини чимирди:

– Ўғлим гапимга қарши борди, – деди. – У ҳозир яхши кўриб қолган қизнинг исми Маҳфузга экан. «М» билан бошланаркан...

«Хўш, шунга нима қипти?», «Фолга шунчалик ишонасизми?», «Энди нима қилмоқчисиз?» Саволларни қаторлаштириб ташладик. Бир жувон ўҳшатиб гап ташлади:

– Балиқ сувда туриб ҳам «чанқадим», деркан, – деди. – Шуям ташвиш бўптими!?

– Нимаям дердим, қадимгиларимиз фолга ишонма, лекин фолсиз ҳам юрма, деган, – деди хотин. – Мен бошқа фолбинларни билмадим-куя, лекин бу хотинга ишонаман. Бир ойда ҳовли оласизлар, деганди, ана, айтгани бўлди, дедим-ку. Энди ҳозир олдига кириб, ўғлим топган қизнинг исми «М» билан бошланасаям,



келин қиласерсам, ростдан ҳам яхши бўладими ёки ёмон бўладими, деб аниқлаштириб сўрамоқчиман. Ёмон бўлади, деса, унда ўғлимни бу қиздан совитиб, кичкина аммамнинг ўртанча қизи бор, Барно исми, «Б» ҳарфи билан бошланади, шунга иситиб беришини илтимос қилмоқчиман, айнанай...

Аёлнинг гапларига берилиб кетиб, янгаларимнинг фолбин олдидан чиқанини ҳам сезмай қолибман.

– Ука, зўр фолбин экан лекин, сиз ҳам бир кириб кўринг, – деб қистаб қолди янгамиз. – Сиздан нима кетди, шунча жойдан келиб, бир фол очирсангиз очирибсиз-да, бизнинг дардимизни бирдан топди-я...

Йўқ дейишимга қарамай, кўярда-қўймай киришга мажбурашди. Раъий қайтмасин, дедим.

Шошилмай фолбин ўтирган хона эшигини тақиллатдим. Ичкаридан «Киринг» деган ўқтам овоз эшитилди.

Хирагина ёритилган хона. Хонанинг икки бурчида иккита шам ёқилган, негадир, шифтда чироқ бўлишига қарамай, шам ёқилгани кишига андак ғалати туюлар экан. Эҳтимол, сеҳр оламига муҳит шундоқ яралар?

Сандалга ўхшаш бир тайпоқ столча устига кўрпа тўшалган, столнинг нарига томонидан бошига узун рўмолни ташлаб олиб, кўзойнак ортидан бургут кўзини қадаб қараб турган хотин «Тез-тез бўл, болам, одамлар кутиб турибди», – деди. Қаршисига ўтириб олдим.

Фолбин фавқулодда тезлик билан чап қўлимни ушлаб, кафтимага мойли қаламда чиза бошлади. Чизаётгандаги қитигим келиб, кулимсирадим. Буни пайқади, чоғи, жиддий таъна қилди: «Шайтонга қулоқ солма, болам, шайтон йўлдан уради», деди. Ҳеч нимани тушунмай анграйиб қолдим.

Чизиб бўлгач, кўзларимга тик қаради ва:

– Болам, мен йўл кўряпман, – деди. – Яқинда узоқ сафарга чиқар экансан.

– Қаерга? – дедим ҳовликиб.

– Билмадим, лекин узоқроқ йўл экан, – деди.

Фолбин қўлидаги мойқалам билан кафтимдаги нұқталарни бирлаштириб, ўйланиб қолди.

– Ўттиз ёшингда тўрт хонали уйинг бўлади, – деди.

Мен кулдим:

– Олган ойлигим бу, битимга оларканманни уйни?!

– Сан бола кулма, ман чин айтляпман, – деди фолбин хотин лаҳжасини ўзгартириб. – Ман айтдимми, бўлади. Кулсанг, тескариси келиши ҳам мумкин...

Фолбиннинг шамали таҳдидидан чўсидимми, ҳарҳолда, тилимни тийишга уриндим.

У кафтимага бошқатдан тикилиб қарай бошлади ва ҳеч кутилмаганда:

– Ҳаётингда «Д» ҳарфи билан бошланувчи жуда яқин одаминг бор экан-а? – дея сўради.

Ўйлаб ҳам ўтирмаи «йўқ» дедим. Чунки, исми бундай ҳарф билан бошланадиган яқин одамим йўқ эди-да.

– Яхшилаб ўйла, бўлиши керак, – деди фолбин ажабланиб.

– Йўқ бунақаси, – дедим қатъий.

– Шунақами? Масалан, отангни исми нима?

– Отамнинг исми «Д» билан эмас, «Ж» билан бошланади. Жаббор ака, дейди отамни.

– Э, одамни аҳмок қилма сан бала, – деди хотин росмана жаҳли чиқиб. – Ахир русчада исм бошида «Ж»дан аввал «Д» ҳарфи кўйилади-да, балам... «Джаббар» бўлади-да...

Аввалига индамадим. Бу хотин фолни русча очар экан-да, деб ўйладим. Кулгим қистаб кетди. Хо-холаб кулиб юбордим.

– Нимага тиржаясан, балам? – деди фолбин.

– Фолни ўзбекча очсангиз бўлмайди, хола? – дедим кўзларимни ўқалаб.

– Ман мактабда русча ўқиганман, – деди хотин жаҳли чиқиб. – Бор, кет, устимдан кулмай, ҳақинг ҳам керак эмас! Фолга ихлоси йўқларга фол кўрмайман!

Индамай чиқиб кетдим.

Ичкаридан фолбин хотиннинг: «Бурнига нарвон етмайди-я» деган шангиллаши эшитилди.

Чиқишим билан янгаларим саволга тутишди:

– Қалай экан? Топдими?

– Жуда аломат фолбин экан, – дедим.

Янгаларим енгил тортишди. Бу ғурбатхонадан чиқа-чиқа қарасам, мендан кейин бояги – ўғли «М» ҳарфли қизни севиб қолган, фолбиндан оғзига чўп ўлчатиб олган хотин кириб кетди.

Албатта, янгаларимга у хотин билан бўлган гурунг ҳақида ҳеч нима демадим. Қайтанга йўл-йўлакай ўзларини гапга солдим. Айтишларича, ўша фолбин ростдан ҳам балогина экан. Амакимизнинг иши ортига кетишига исми «Қ» ҳарфли (эҳтимол, русчадан келганда «К» ҳарфли) шахс сабаб бўлган экан. Қўй ва кўйкорларни ҳам, ҳўқизни ҳам ўғирлаганларнинг исми катта эҳтимол билан «Б», «М», «И» ёки «Т» ҳарфи билан бошланишини айтганиш.

– Ростдан ҳам, аломат фолбин экан, – дедим янгаларимга. – Ҳамма нарсани билгич экан.

– Энди нима қилсан экан-а, Маҳмуджон? – деди янгам.

– Нимаям қилардингиз, янга, – дедим. – Энди фолбиннинг гапига кириб, қариндош-уруғу, кўни-қўшнилар, танишу нотанишлар орасидан исми «Б», «М», «И» ёки «Т» ҳарфи билан бошланадиган «ўғри»ларни зимдан қидириб бошлайсизлар-да...

Янгаларим бош силкиб, гапимни маъқуллаб қўйишиди.





# Баринги уғрашув

## Баринги уғрашув

## Баринги уғрашув

Тоҳир РАВШАН



УМИД

Кетманг, яна бироз қолайин,  
Ёнингизда шабнамдек сингиб.  
Вақт югурадар мисли чавандоз,  
Армон дилни кетмасин енгиб.

Ўтинаман, шу лаҳза ҳаққи,  
Кўзларимда қолинг сиз мангу.  
Ахир сизсиз келмагай баҳор,  
Ахир сизсиз тириклик йўқ-ку!

### МАГРУР ТЕРАК

Мен ариқнинг бўйида ўсдим,  
Кўкка боқдим, кўкка бўй чўздим.  
Пешонамга битди ёлгизлик,  
На ҳамроҳ бор, на битта дўстим.

Енгаман деб эсди шамоллар,  
Баргим тўкиб, кезди шамоллар.  
Ёлгизлигим етмаганидек,  
Юрагимни эзди шамоллар.

Бироқ мени енгишолмади,  
Гуруримга тегишиолмади.  
Тўғри, бугун мағлуб бўлдим мен,  
Синдиришиди... эгиишолмади.

\* \* \*

Нур изладим кўзларингиздан,  
Зулматларни ҳадя этдингиз.  
Боравердим изларингиздан,  
Сиз парво ҳам қилмай кетдингиз.

Ҳијронларда куйган қалбимдан,  
Учиргайман шаън отингизни.  
Энди сизга қайтариб берай,  
Мен сиғмаган ҳаётингизни.

Сарвиноз  
САКСОНОВА



ГУЛИМ

Кўзмунчоқлар кор қилмай қолди,  
Севгимизга кўз тегди, гулум.  
Қордек оппоқ тиласимизга,  
Эвоҳ, совуқ сўз тегди, гулум.

Нега пайдо бўлдинг йўлимда,  
Орзуимда, армонларимда?  
Энди мангу қолди юк бўлиб,  
Ҳијронларинг куйган дилимда.

Кўзмунчоқлар кор қилмай қолди,  
Сендан буқун кечдим мен, гулум.  
Айрилиқнинг аччиқ шаробин,  
Энди мангу ичдим мен, гулум.

Кўзмунчоқлар кор қилмай қолди...

### ДАРД

Мен ҳам Одам боласи,  
Ғамдан чарчадим, Худо.  
Рўзгор – тешик тогора,  
Камдан чарчадим, Худо.

Дардга қоришиқ қоним,  
Йўқ ташвишиз бир оним.  
Йиқилар пайтни кутар  
Дамдан чарчадим, Худо.

Сийлаб, сизлаб, “сен”ларни,  
Енгидим қанча МЕНларни.  
Аччиқ-чуҷукни тотиб  
Таъмдан чарчадим, Худо.

Ўзингдан сўраб тўзим,  
Сен томон бурдим юзим.  
Сенсиз ўтган кун, кунмас,  
Ғамдан чарчадим, Худо.



*Кими эдигу ким и бўлди!*

*Кими эдигу ким и бўлди!*



Муродхон ЭРГАШЕВ

## САЙЁХЛАРНИНГ САМИМИЙ ЭЪТИРОФЛАРИ

Диёримизда сайёхлик мавсуми. Навбатда-  
ги меҳмонларни Тошкент халқаро аэропортидан  
Парижга кузатиб, Самарқандга қайтар эканман,  
хаёлларим мени толиблиқ йилларим томон олиб  
кетди. Собиқ Шўро даври эди. Самарқанд давлат  
университетининг роман-герман филологияси фа-  
культетида таҳсил олардик. Таржимонлик амалиё-  
ти шаҳримиздаги “Интурист” меҳмонхонаси қошида  
үтилар эди. Меҳмонхона шу номдаги Бутуниттифоқ  
ҳиссадорлик жамиятига қарашли бўлиб, у собиқ Со-  
вет Иттифоқига хорижлик сайёхларни жалб қилувчи  
ягона ташкилот эди. Демак, бизнинг юртимизга таш-  
риф буюрадиган хорижлик сайёхлар ҳам Москва-  
нинг ихтиёри билангина шу имкониятга эга бўлар  
эдилар, десак янглишмаймиз.

“Ўзбекистон Совет Социалистик Республика-  
сига хуш келибсиз!” – дедим бир француз сайёхига  
ўша пайтлар ҳаяжонланиб.

Муродхон ЭРГАШЕВ



1960 йилда Иштихон туманида туғилган.  
Самарқанд Давлат университетида таҳ-  
сил олган.

“Салом, бу – мен” шеърий тўплами муалли-  
фи. У француз тилига таржима қилган Али-  
шер Навоий ғазалларидан намуналар, ўзбек  
халқ мақол ва маталлари Парижда чоп этил-  
ган. “Дўстлик” ордени соҳиби.

Меҳмон менга ажабланиб қаради:  
“Қанақа республика дедингиз?”

Мен айтгандаримни дона-дона қилиб, тақор-  
ладим. У менга энди бир оз ачиниш, андак истеҳзо  
билан қараб турарди.

“Сиз ўзингиз шунақа республика борлигига ишо-  
насизми? Бу ерлар биз учун Россия Осиёси, яъни  
рус мустамлакаси, холос. Мен эса Самарқандни  
кўргани келганман.”

Сайёхнинг сўзларидан хафа бўлиб кетдим. У  
аҳволимни сезди шекилли, ўзича кўнглимни кўтар-  
моқчи бўлди:

“Балки, бир кун келиб, сиз айтганингиздек ўзин-  
гизнинг озод Республикангиз бўлар. Ҳар ҳолда, мен  
сизга шуни тилайман !”

Бу сухбат бундан ўттиз икки йил аввал, 1981 йил-  
нинг август ойида бўлиб ўтган эди... Бу йил эса Озод  
республикам йигирма уч ёшга тўлди!

Бугун эса аҳвол бутунлай ўзгача. Мустақилли-  
гимизнинг илк йиллариданоқ Юртбошимизнинг Ўз-  
бекистонимизни сайёхлик ўлкасига айлантиришга  
йўналтирилган Фармон ва қарорлари қабул қи-  
линди. Уларнинг ижроси эса Ватанимизнинг Буюк  
Ипак Йўлида жойлашган муҳим тарихий чорраҳа  
сифатида дунёга танилишида пойdevor вазифа-  
сини бажарди. Мамлакатимиз бой тарихи ва бе-  
тақор обидалари билан дунё сайёхларини ўзига  
тортувчи мафтункор диёрга айланиб улгурди.  
Таржимон-ҳамроҳ сифатидаги ўн етти йиллик таж-  
рибам менга шундай хулоса чиқаришимга тўлиқ  
имкон беради. Келинг, сўзимнинг исботи учун ўзим  
ҳамроҳлик қилган сайёхларнинг фикрини Сиз азиз  
ватандошларимга етказсан. 2011 йилда мен ҳам-  
роҳлик қилган франциялик сайёхларнинг ораси-  
дан Юри Поштар исмли бир жаноб менга кутилма-  
ган гапни айтиб қолди:

“Биласизми, мен аслида ёмон туристман, қай-  
си мамлакатга борсам, ўша жойда фақат салбий то-  
монларни ахтараман ва топаман ҳам. Сизларнинг  
юртингизда биронта бўлсин салбий нарсани топма-  
дим... Халқингизнинг одамийлиги, меҳмондўстлиги,  
бағрикенлиги, давлатингиз раҳбарининг олиб бо-

раётган сиёсати, нафақат пойтахту катта шаҳарлардаги, балки, қишлоқлардаги бунёдкорлик ишлари мени лол қолдирди. Мен мамлакатингизга қойил қолдим!"

Сұхбатимизга Юрининг рафиқаси, олима, Фахрий Легион ордени соҳибаси бўлмиш Кристиан хоним кўшилди. "Юрига ишонаверинг, Мурод, у фақат ҳақиқатни гапиради. Ҳатто мен ҳам ҳайронман, қанча юртларни айланиб чиққанмиз, аммо, биринчи марта уни шундай мамнун ҳолда кўришим."

Мен мана шундай дамларда ниҳоятда тўлқинланиб кетаман, Ватанимдан гурурланиш ҳисси мени юқоридаги фикрларни тезроқ ватандошларимга етказишга ундейди. Буни мен ўз шарафли бурчим, деб биламан. Чунки, ватандошларимиз орасида ҳалигача қандай давлатда яшаётганимиз-у кимлар бизга ҳавас билан қараётганигини англаб етолмаганлар, афсуски, учраб туради. Шу ўринда яна бир мисолни келтириб ўтсам: франциялик Мишлин Галлинари исмли хоним илк марта 2011 йилнинг май ойида Ўзбекистонни ўзи учун кашф қилган эди. Юртимизни бир умрга севиб қолган хоним ҳозиргacha саккиз марта заминимизда меҳмон бўлди. Ўз юртида эса Галлинари хоним барча дўсту танишларига Ўзбекистон ҳақида тўлиб-тошиб гапириб беради, атрофидаги барча инсонларни бу диёрни ҳеч бўлмаса бир марта келиб кўришга ундейди. Энг таъсирли томони, Галлинари хоним соатини Тошкент вақтига тўғрилаб кўйган, у ўзбек вақти билан яшайди. Бунисига нима дейсиз?!

Шу ўринда мамнуният билан таъкидлаб ўтсам, хорижий сайёҳларнинг эътиборини тортаётган ва ҳайратга солаётган энг бирламчи ҳол, бу – юртимиз-

нинг покизалиги, шаҳарларимиз, кўчаларимиз, боғларимиз ва бозорларимизнинг озодалигидир! Бу ҳайрат уларни Тошкент ёки Урганч ҳалқаро аэропортларидан чиқишданоқ чулғаб олиб, юртимизни кезиб, Мустақиллик майдонига қадам қўйганларида ўзининг юқори чўққисига чиқади! Ҳозиргидек эсимда, Самарқандимизнинг Сиёб бозорини кезаётиб, бир француз сайёҳи бу ердаги озодаликни кўриб "Бу бозор эмас, музей-ку!" дея хитоб қилган эди. Бу гаплар бошқа кўпгина бозорларимизга ҳам бирдек тааллуқли деб ўйлайман. Ҳа, озодалик бизнинг қонимизда бор. Ишонамизки, бу фазилатлар кела-жакда ҳам бизни асло тарк этмайди.

Ажнабий меҳмонларни ошуфта этган иккинчи жиҳат бу бетакрорликдир. Буни сайёҳлар кўп бор эътироф этишган. Албатта, улар шунчаки, номига баҳо беришдан, мақтов, ҳамду санодан холи. Бошқа мамлакатлар билан бизнинг юртни қиёслаб кўрибгина шундай хулосага келишган. Бетакрорлик, аввало, меҳмондўст ва бағри кенг ҳалқимизнинг табиатида, очиқ чехра ва самимий табассум илиа меҳмонларни кутиб олишларида намоён бўлади. Шунинг учун ҳам хорижлик сайёҳлар ватандошларимизнинг бу фазилатларини кўриб лол бўладилар ва мазкур фазилатларни ҳалқимиз ҳеч ҳачон йўқотмаслигини тилаб қоладилар.

Агар йўлингиз тушиб, Тошкент ҳалқаро аэропортига бориб қолсангиз, ватанларига қайтиб кетаётган хорижлик сайёҳларни бир кузатинг. Уларнинг чақноқ кўзларини, кўтаринки кайфиятларини, ҳатто, кўз ёшларини кўриб, ҳайратда қоласиз. Ва Ватанга бўлган меҳрингиз, муҳаббатингиз янада юксалади.





# ЎКИНЧ

## Ҳикоя

Мамзеле Аурелия басавлат, ёноқлари қип-қизил, соchlари энди-энди оқара бошлаган, кўзлари атрофга ҳаммавақт синчковлик билан боқадиган ўрта ёшлардаги эркакшода бир аёл эди. У одатда, бошига ферма эркаклари киядиган шляпа кийиб юарар, совуқ кунлари эгнига униқиб кетган мовий ёмғирпӯш билан оёқларига зил-замбил кирза этикларини илиб оларди.

Мамзеле Аурелия умри бино бўлиб турмушга чиқиш борасида сира бош қотириб кўрмаган эди. Бу аёл бутун ҳаёти мобайнида ҳатто севиб ҳам қолмаганди. Бир пайтлар, йигирма ёшлик авжи дуркун чоғларида унинг ҳам қўлини сўраб келишган, аммо Аурелия ўша заҳотиёқ бу таклифни кескин рад этган, мана ҳозир ёши элликка яқинлашиб қолган бўлса-да, сўқабош яшаб келаётганидан зифирча ҳам афсусланмас эди.

Содик ити Понто, экинзорларида меҳнат қиласидан ҳабашлари, уч-тўрт бош сигири, бир жуфт хачири, турли-туман даррандаю паррандалари ҳамда қўшотар милтиғи ҳисобга олинмаганда аёл-



нинг уйида бошқа тирик жон йўқ эди, балким шу ёлғизлиги сабабданни у Худога қаттиқ боғланиб қолганди, туну кун ибодатини ҳеч канда қилмасди.

Бир куни эрталаб бир тўп болаларнинг қора булут каби уйи томон ёпирилиб келаётганига Мамзеле Аурелиянинг кўзи тушиб қолди. Чақирилмаган меҳмонлардан шу пайтгача қўшниларининг ҳатто биронтаси билан ҳам у қадар апоқ-чапоқ бўлиб кетмаган сўқабош аёлнинг кўнгли бироз хижил тортиди. Болалар Аурелиянинг ён қўшниси Оделияга тегишли эди.

Орадан беш дақиқа ўтар-ўтмас, болалари ортидан ёш жувон Оделиянинг ўзи ҳам кўринди. У бир қўлида жажожи қизалоги Элодияни кўтариб, иккинчиси билан эса эндинга атак-чечак қила бошлаган Тиноммини етаклаб олганича қоқилиб-суқилиб одимлар, ортидан катта қизлари Марселина билан Марселетта ҳам шошилганча эргашиб келарди.

Оделиянинг юзлари йифидан қизариб, шишиб кетганди. Гап шундаки, жувоннинг олис шаҳарда яшовчи онаси оғир хасталаниб қолиб, қизини ҳузу-

## Кейт ЧОПИН



(Катерина О. Флахерти) (1850-1904) американлик машҳур ёзувчи. Бир қанча роман ва кичик ҳикоялар муаллифи.

1893 йилда “Гўдак орзуси” номли ҳикоялар тўплами нашр этилган. Айниқса, унинг “Гуноҳ”, “Уйғониш” номли романлари ёзувчи шуҳратини янада баланд чўққиларга олиб чиқди.

рига чақирирган, бахтга қарши жувоннинг эри ҳам ёнида эмас – Техасга кетган эди. Техас эса Оделияга дунёнинг бир чеккасидай жуда узоқ кўринар, устига-устак айни чоғда ёлланган ҳайдовчи Валсин ҳам станцияда аёлнинг йўлига кўз тутиб ўтиради.

“Биламан, Мамзеле Аурелия, ишингиз бир дунё, бошингиздан ошиб ётиби, бироқ бу зумрашаларни сиздан бошқа кимга ҳам ишониб топшира олардим, ўтинаман, йўқ деманг, то мен қайтиб келгунимча болаларимга кўз-кулок бўлиб турсангиз. Йўқ-йўқ, ўтирумайман, овора бўлманг; мени станцияда кутишяпти, Мамзеле Аурелия, тушунинг, бошқа чорам йўқ! Мен учун бир савоб иш қилинг, илтимос, келиб сизни албатта, рози қиласман. Худо кўрсатмасин, ишқилиб, мен уймаланиб етиб боргунимча онаизорим узилиб қолмасинлар-да, илойим!” – чинданам фавқулодда мушкул вазият Оделияниг ақлини шошириб қўйган, жувоннинг тоза боши қотиб қолган, у ҳатто нима деб, нима қилаётганини ҳам тузукроқ идрок этолмас эди.

Жувон ялина-ялина болаларини Мамзеле Аурелиянинг уйи остонасида қолдирганича шошиб жўнаб кетди; болалар ҳовли ўртасида ўзлари шумшайиб қолишиди, лекин кўп ўтмай бири тортина-тортина, бири бўлса беҳадик, зипиллаганича зина бўйлаб орқама-кетин кўтарила бошлаши. Шу дамда ҳавода мойчечакларнинг ажаб ифори бўй таратар, узоқ-узоқлардаги пахта далалари оша ишчи ҳабашларнинг қувноқ кулгулари жаранглаб эшитилмоқда эди.

Мамзеле Аурелия болакайларга ўзининг норози ва синчков кўзларини қадаган кўзи серрайиб туриб қолди. У дўмбоқ Элодияниг оғирлигидан энкайиб олганича гандираклаб қадам босаётган Марселина-га хушламайгина кўз қирини ташлаб қўиди. Шу оннинг ўзида онасини сўрайвериб хархаша қилаётган Тиноммини тинчлантиришга уринаётган Марсепеттани ҳам бу совуқ нигоҳидан бебахра қўймади. Икки-уч лаҳзалик шундай дўй-пўписаларидан кейин Мамзеле Аурелия бироз кўнглини бўшатиб опди-да, ноилож ўзини қўлга олиб, энди қилиши мажбурий бўлган ишлари режасини тузиб чиқди. Аёл дастлабки ишини тўполончиларнинг қорнини тўйғазишдан бошлади.

Башарти бу болалар Мамзеле Аурелиянинг қўл остида меҳнат қилаётган ҳабашлардан бўлганида борми, аёл ўша вақтдаёқ бу шумтакаларни ҳайдаб юборган бўларди, қолаверса, шўрлик Оделияниг оҳу зорлари унинг бу қарорини қатъий чеклаб турарди. Бироқ барибир, бола боқиш ҳазил иш эмасда, ахир болалар кичкина чўчқа болалари эмас-ку, улар ҳаммавақт эътибор талаб қилиб, одамдан астойдил меҳр кутишади. Бу мураккаб вазифа эса бу каби юмушларда буткул ношуд бўлган Мамзеле Аурелиянинг асло қўлидан келмас эди, умрида шундай қалтис вазиятга тушиб қолишини эса аёл ҳатто тушида ҳам кўрмаганди.

Шунинг учун биринчи кунлари Оделияниг попланлонларига ғамхўрлик кўрсатишда, рости, Мамзел-

ле Аурелия анчагина адабини еди. Ахир у жонсарак Марсепетта баланд ва буйруқомуз оҳангда гап эшитиши билан дарров йиғлаб юборишини қаердан ҳам билсин? Қизалоқнинг табиати шунақа экан-да! Мамзеле Аурелия кичкинотай Тиноммининг ҳам гулларга ишқи баланд эканлигини аниқлаб олди, кичкина безори то гулларни бандидан узиб, боғдаги жами сара чечакларни пайхон қилмагунича кўнгли ҳеч жойига тушмас экан.

“Унга ҳеч қайси танбеҳингиз кор қилмайди”, – дея аёлга йўл кўрсатди Марселина, – яхшиси, сиз уни стулга боғлаб қўйинг. Ойим ҳамиша Тиноммининг ақлини шу тарзда киритиб қўярдилар”.


Мамзеле Аурелия безори Тиноммини боғлаб қўйган стул кенггина ва қулайгина экан чоғи, кичкинотай унда бир зумда пинакка кетиб қолди, ниҳоят Мамзеле Аурелия тўполончилардан бирини шу йўсинда тинчтди.

Оқшом чўкиши билан аёл худди жўжаларни инига ҳайдаб кираётган каби болакайларнинг барига бирма-бир жой-жойларига ётишларини буюрди, бироқ кичкинотайлар Мамзеле Аурелияниг қаршисида каловланганча туриб қолишиди. Ахир уларнинг момиқина ёстиклари устига ҳар кеч таҳт қилиб қўйиладиган тунги кўйлаклари қаерда қолди, бунинг ўрнига улар нима учун худди ҳўқиз қамчисидай оғир қўл билан кетларига ниқталганларича ётоқларига ҳайдалишлари керак? Ҳар кеч полнинг ўртасига уларнинг толиқкан, қуёшда тобланиб чанг-чунг бўлиб кетган оёқларини ювиб олишлари учун келтириб қўйиладиган сув тўла тос-чи, у қаерда қолди? Шу тобда қизалоқлар Марселина билан Марсепеттанинг кулгусини қистатган нарса, Мамзеле Аурелиянинг шумтака Тиноммини ухлата олмай тоза хуноб бўлиб қийналгани бўлди, ахир аёл бу ёш қароқчига Крок-митан ёки бўлмасам Луп-гару тўғрисидаги эртаклар айтилмагунича ухлай ололмаслигини қаёқдан ҳам билсин, яна кенжатой Элодия ҳам алла эштиб, тебранишсиз кўз юмиши жуда қийин эканлигини аёл бечора аранг тушуниб етди.

“Яхшигина тавбамга таяниб қолдим, Руби хола”, – дея икрор бўлди Мамзеле Аурелия ўз ошпазига ёрилиб, – мен учун бу болаларга қарашдан кўра ўнлаб плантацияларни бошқариш осонроқ экан. Ахир бу даҳшат-ку! Жоним ҳиқилдоғимга келди! Энди менга ҳеч қачон бола тўғрисида оғиз оча кўрманг!”

“Оҳ, Мамзеле Аурелия-ей, бу оламда болалардан-да беғуборроқ зот топа олсангиз кошки эди. Ахир болалар билан бирга маза қилиб ўйнаш катталар билан муомала қилишдан кўра ёқимлироқ эмасми? Менимча, сизга уларнинг тилини топиб олиш мушкуллик қиляпти. Бора-бора болалар билан қандай чиқишиб кетганингизни ўзингиз ҳам сезмай қоласиз”.

Шубҳасиз, Мамзеле Аурелия Руби холанинг гапларига ўша заҳотиёқ қўшила қолмади, буни қа-



ранг-а, тўртта-бешта тўполнончи билан икки кунда тил топишиб бўлармиди – бу ахир Мамзеле Аурелиядай аёл учун бениҳоят мураккаб вазифа-ку! Атиги зарурат туфайлигина оналарнинг икки-уч найранги ни ўзлаштириб олганига ҳам Мамзеле Аурелия Худога беҳисоб шукроналар келтиради.

Лекин барibir Руби хола ҳақ бўлиб чиқди: Мамзеле Аурелия аста-секин барига кўнишиб қолди; у кичкина безори Тиноммининг ҳаммавақ шира юқи қўллари учун умрида ҳеч тутмайдиган оппоқ пешбандини тутиб оладиган бўлди, ҳаттоки тўполнончининг меҳр ва ташаккур ифодаси сифатида чопқиллаб келиб чўлп-чўлп қилиб ўпишларига-да ўрганиб қолди. Не-не замонлардан бери шкаф тепасида қўл тегмай, чанг босиб ётган игна-ип солинган саватча ҳам жойидан қўзғалди, энди Мамзеле Аурелия йиртилган кийимлару тумасиз камзулларни бутлаб қўйиш учун қўлига ҳаттоки игна олишгача мажбур бўлди. Аммо аёлнинг энг қийналган жойи бутун кун мобайнода бир нафас ҳам тинмайдиган қаттиқ бақириғу чинқириқлар, уйнинг у бурчагидан-бу бурчагигача акс-садо бериб, то қора кечгача тугамайдиган шовқин-суронлар бўлди. Лекин кечалари ҳам Мамзеле Аурелия баҳузур ухлай олмас эди, негаки кичкина Элодиянинг иссиқиқина дўмбоқ танаси аёлга маҳкам ёпишиб ётар, кенжатойнинг иссиқ нафаси Мамзеле Аурелиянинг ёноқларига гўё жажжи күшнинг қанотларидай майнин уриб турарди.

Орадан икки ҳафта ўтар-ўтмай Мамзеле Аурелия ахийри бу ғалваларнинг барига кўнишиб қолди, энди у ортиқ нолимай ҳам қўйди.

Бир оқшом айвонга қандайдир юмуш билан чиқкан Мамзеле Аурелия кўча муюлишида уйи томонга қайрилаётган Валсиннинг таниш кўк машинасини кўриб қолди. Ҳайдовчининг ёнида кўзлари соғинчдан порлаган Оделиянинг интизор чехраси акс этди. Улар уйга тобора яқинлашганлари сари Мамзеле Аурелия ёш жувоннинг қувончдан ёришиб кетган юзларидан унинг уйга қайтиб келганидан беҳад хушбахт эканлигини юрак-юрагидан ҳис этди.

Шундайку-я, бироқ бу айтилмаган ва кутилмаган ташриф Мамзеле Аурелиянинг қалбига улкан қайғу тошини-да бир оннинг ўзида бостириб қўйди. У дарҳол болаларни тўплаб бериши лозим эди. Оҳ, бу зумраша Тиномми қаёқда қолдийкин-а? Э-ҳа, бу шумтака бўлса-бўлмаса, оғилхонада пичноқ ўйнаб ўтирган бўлиши керак. Ҳўш, қизалоклар Марселина

билан Марселетта-чи, улар қаерда қолишиди? Уйнинг бирор бурчагида қўғирчоқларига қўйлак бичиб, уларни ясантириш билан машғул бўлсалар керакда. Биргина кенжатой Элодиядан ташвиш қилмаса бўларди, негаки гўдак Мамзеле Аурелиянинг қўлларида ҳеч нарса билан иши йўқ, ўзи билан ўзи ўйнаб ётарди, аммо у онасини олиб кетган ҳайдовчи Валсиннинг қадрдан машинаси чироқларини кўриб қолиши билан севинганидан бирдан қаттиқ қичқириб юборди.

Ниҳоят, ҳамма тўс-тўполнон тинчийдиган бўлди, ана энди болакайлар ўз уйларига бутунлай қайтиб кетишади. Э-воҳ, улар бунча тез кетиб қолишимаса! Ахир келгандарига унча кўп бўлгани йўқ-ку! Мамзеле Аурелия пешайвон ўртасида турганча негадир ич-ичидан ёпирилиб келаётган ўкинч тўла нидога аранг дош берганча жимгина туриб қолди. У ҳатто машинанинг қандай келиб, болаларни қандай олиб кетганини ҳам сезмай қолди. Бутун атрооф-жавонибдаги далалар узра қип-қизил шафақ шуълалари илиғира-шира шом кўланкаси чўкиб борар, гўё мана шу теварак олам ҳам бу қоронгулик ичига тамомила қоришиб кетаётгандай бўларди. Борлик узра ёйи-либ бораётган қирмизи туман ичидан аёлнинг нигоҳи ортиқ ҳеч нарсани илғамай қолди. Унинг кулоқлари ҳаттоки машина ғилдиракларининг қулоқни қоматга келтиргудай ўткир шовқинини-да эшитмади. Аёлнинг кулоқларига кичкинотай безориларнинг шодон, янгроқ овозлари қаттиқ ўрнашиб қолганди.

Мамзеле Аурелия оҳиста ҳўрсинганча уйга кириб кетди. Ичкарида уни бир дунё юмуш кутиб турарди, болакайлар бутун уйни остин-устин қилиб юборишган, ҳаммаёқ пароканда бўлиб тўзғиб ётарди, аммо хоналарни тартибга солишга аёлнинг кўли дарров бормади. У стол олдига хомуш чўқди. Ёлғиз ва афтода қиёфада ташқаридан ўрмалаб кириб келаётган тун рутубати чулғаган совуқ хонаси ичига маъюс бир нигоҳ ташлади. Сўққабош аёл бошини қўллари устига қўйди-да, ич-ичидан отилиб келаётган сўзсиз фарёдларга ортиқ бардош беролмай охири йиглаб юборди. Ҳа, Мамзеле Аурелия йиғлаётган эди! Лекин унинг йиғиси ҳамма аёлларнидай юмшоқ, майнин йиғига ўхшамасди. Мамзеле Аурелия худди эркак кишидай, бутун юрагини пора-пора қилиб юборгудай нола билан ўкириб-ўкириб йиғларди. У ҳатто ити Понто келиб, қўлларини ялаётганини ҳам сезмас эди.

**Инглиз тилидан  
Қандилат Юсупова таржимаси**





# ХАЛОСКОР МУШУК

## Ҳикоя

Отамиз овчи эди. Биз – беш нафар ўғилга унинг эски қўшотари ва “мерган” лақаби мерос қолган, холос. Оға-инилардан фақат ўртандамизга овчиларга хос сабр-тоқат, қунт-ҳафсала, ўқни бехато отиш ўтгандай, қолганларимизга ана шу хислатларнинг юқигина теккан кўринади. Ов баҳона милтиқ талашишда ва отган ўлжаларимиз қонли из қолдирганича ўтиб бўлмас чангальзорга кириб кетганлиги ҳақида мақтанишда бир-биримиздан ўтамиш. Мен отамизнинг ортидан думдек эргашиб юрадиму, аммо овчилик сирларини ўрганиш ўрнига мўлжалдаги ўлжаларини чўчтиб юбориб кўпроқ зарарим тегарди. Шу боисдан бўлса керак, отамиз овга ҳозирлик кўраётгандарини кўпинча сир тутишга ҳаракат қиласади, милтиқни қопга тиққанича ўша ўртандамизга киши билмас топшириб, бирор маълум бутанинг панасида кутиб туришни таинлаб, ўзи ҳам худди дўкунгами-сартарошхонагами кетаётгандек уйдан олислагач, орқасида биз каби думлар таъкиб қилмаётганига амин бўлганидан сўнгина йўлни тўқайзорга бурарди. Отамиз ва ўртандамиз овга кетганлигини улар кечки овқат пайтидаям кўрин-

Оллоёр БЕГАЛИЕВ



1961 йилда туғилган. Тошкент Маданият институтини битирган. Болалар учун “Сеҳрли уйқу”, “Ёлғонга ишонган дарахт”, “Рангин қорлар” адабий эртаклар тўпламлари, “Бир булоқ бор”, “Жин чалган жувон”, “Жўнатилмаган мактуб”, “Бекободлик самурай” каби шеърий ва насрый тўпламлари нашр этилган.

Ўзбекистон Ёзувчилар уюшмаси аъзоси.


маганларидан билиб қолганимизда эса ростакамига кеч бўлган, чиябўрилар увиллаб чиқадиган тўқайзорни оралаб уларни топиш учун эса тўрт оғайнин-ботирларга отнинг калласидай юрак зарур бўларди.

Бизни чув тушириб кетган овчилар эртаси куни офтоб тоғлар ортига юмалаб кетганидан сўнг бир-иккита қуёноми, бўрсиққа ўхшаган ўлжаними елкага илганча кириб келишарди. Кечки пайт отам ўз тенг-тўшларига, биродаримиз эса ўзига ўхшаган бола-бақраларга бемалол қанча пайт ўлжа пойлаганларию, қандай отганларини ҳикоя қилиб беришарди.

Бу орада йиллар сувдек оқиб ўтиб, беш оғанининг учтаси уйланиб, бола-чақали ва янги ҳовлижойли бўлиб кетгач, отамизнинг ҳам кўзлари хиралашиб қолганлиги ва шу пайтгача тўккан қонлари учун тавба-тазарру қилиш пайти келганлигидан тоат-ибодат қилишга тушиб кетди ва турган гапки, милтиқ эгасиз қолиб, бизлар онда-сонда унга тикилиб кўярдик. Овчиликка уқувли биродаримиз заводда ишлайди, отамерос касби билан фақат меҳнат таътилига чиқсан пайтларидагина шуғуланишга имкон топади, холос. Қўшотар деярли биздек мавсумий меҳнат билан банд ака-укаларга қолганди. Овчиликка ҳам азбарой уйдаги муаммолардан қочиш, бирор жилға бўйида “яримта”ни майдалаб ётиш учунгина отланганимиздан, кўпинча тўқайдан қуруқ қайтсак-да, овдаги саргузашларимизни эшитгани қўшнимизнинг дўкони олдига анча-мунча пивохўрлар йиғилиб келишарди. Менинча, бизнинг овчилигимиздан ана шу дўкончи кўпроқ фойда кўтарди.

Кунлардан бирида қишлоққа ёввойи мушук ораётгандиши ҳақида гап тарқалди. Кимнингдир тўртта товуғи, бошқасининг куркаси, осиб кўйган гўшти, қаймогу сарёғи йўқола бошлади. Балки, тулкидир деган гаплар ҳам бўлди. Аммо уни ўз кўзи билан кўрганларнинг айтишича, салкам итдай келадиган бу мушук одамдан сира кўрқмай, барайганича қараб тураверармиш-да, бирор нарсани отмоқчи бўлиб ҳаракат қиласанг, ўзингга ташлангудук бўлиб, пиҳиллай-пиҳиллай тишларини кўрсатармиш. Катта одам-ку бундай пайтда кутилиб қолар, аммо ёш болаларнинг қўлидан нимаям келарди. Шу тифайли, оналар ёш болаларини доим ёнида олиб юрадиган, сал кўринмай қолса ваҳима билан чақирадиган бўлиб қолишли.

Жанжалкашлиқда бекиёс Наима хола бир куни бизга ёпишди:



– Ҳой, овчини боллари, сизлар қаёққа қарайап-сизлар! Милтиқни күтариб юравермай, қишлоқни мушук ўлгурдан күтқарсанглар-чи! Ўлигини ўзимга кўрсатасизлар, ана шунда у кимниги эканлиги маълум бўлади!

Овчининг болалари эканлигимизни исботлаш учун кўштиғни кетмондек елкага ташлаганча қишлоқдан чиқиб, роса тўқайзорни оралаб, шимларимизни тикандар илиб, этикларимизнинг пошнаси майишиб кетдиямки, талончи мушукка дуч келмадик. Қайтага хотинларимиздан гап эшитганимиз қолди. Бу орада дайди мушук яна беш-олти товуғу куркалар бошига етди. Бундай бесамар санқишилар жонимизга тегиб, балиқ овлашни маъқул кўриб укам билан қармоқларни кўлга олганча сой тарафга жўнадик. Куз куни ҳам бир тутам. Ҳар биримиз уч-тўрттадан балиқ тутганимизча теваракка қоронгулик инди.

Муюлишда укам билан хайрлашдим-да, ўз уйимга ошиқдим. Ҳовли юзи лампа чироқ ёғдусидан хирагина ёришиб турибди. Ҳамма ёқ жим-жит. Шундагина пешин пайти хотиним қизимни эргаштириб отасиникига кетганилиги эсимга тушди. Кўнглим хижил тортди.

Кўлимдаги ҳали тирик балиқлар питиллаб кўяётган сувқоғозли халтани салқин ҳавода айнимай туришини чамалаб айвон устунидаги михга осиб қўйдим.

Чой-пой ичишга ҳам ҳафсала йўқ эди. Ўзимни кўрпачага ташлаганча донг қотиб қолибман.

Тун алламаҳал бўлганида эшикнинг гурсиллаб урилишидан уйғониб кетдим.

– Ким у? Эшик илгакланмаган! – дея қичқирап-канман, ногоҳ тун ярмида ким ҳам келиши мумкинлигини эслаб қолдим. – Хотин, сенмисан?!

Аммо эшикка нимадир қайта-қайта урилар, зарба эшикнинг пастки қисмига тўғри келганлигидан уни бирор тепаётгандек туюлиб, баттар ўтакамни ёрарди. Жойимдан иргиб турдими эшик илғагини солдим, сўнг сал нарида ётган оташкосовни қўлга олдим.

Бу орада эшикка тушаётган зарбалар давом этсада, аввалгидек кучли эмасди. Бора-бора улар тинибам қолди. Мен секин эшикни қия очиб, айвондаги ғаройиб манзарадан карахт бўлиб қолдим. Айвоннинг хира лампочкаси бошига сувқоғоз кийилиб қолганлигидан нафас ололмай, у ёқдан-бу ёққа юмалаёттан катта-кон жундор ҳайвонни ёритиб турарди. Узун думини биланглатишидан уни мушукка ўхшатдим. Чамаси, у устунга тирмасиб чиқиб, балиқли сувқоғозни ерга тушириб, балиқларни паққос тушира бошлаётганида сувқоғоз бошига ўралиб қолганидан нафас ололмай, ўзини ҳар тарафга ураверганга ўхшайди. Балки қишлоқдагиларнинг жонига тегиб юрган мушук шунинг ўзидир! Ҳозир, кўлимдаги косов билан уни бир-икки яхшилаб туширсам, эртага аканг қарагайдан яхши одам топилмайди қишлоқда. Аммо, шу заҳоти овчилик виждоним уйғониб, шундоғам ўлим чангалида ётган жониворни уриб ўлдириш ниятидан қайтдим. Мард бўлсанг – майдонга чиқмайсанми? Уй ичига қайтиб кириб, хонтахтада ётган пичоқни олганча ташқарига, жон талвасасида ётган мушук тепасига келдим. Гарчи, боши сувқоғозга ўралиб қолган бўлса-да, мушук ҳамон кўринмас душманга ҳамла қилганча, тўрттала оёғини ҳавода ўйнатар, ўтқир тирноқлари у ер-бу еримни тирнаб ташлаши, тирналган жойлар эса кеч кузакда газаклаб, тузалиши қийин ярага айланиб кешиши, қутирган бўлса яна-да ёмон кунларни бошимга

солиши эҳтимолидан унга ғоятда эҳтиёткорлик билан яқинлашиб, кўлимни чўзганча пичноқнинг учи билан сувқоғозни бир ҳамлада тилиб ташладим.

Тешилган сувқоғоздан мушукнинг боши очиқ ҳавога чиқди ва чақчайган кўзлари билан менга бир лаҳза тикилди-да, бутун қолган балиқларни ҳовли саҳнига сочганича сакрай-сакрай қоронғулик қўйнига равона бўлди...

Эртаси куни ҳеч кимга бу воқеа ҳақида оғиз очмадим. Қўлгинамга тушиб турган мушукни ўлдирмай, қочириб юборганим учун тағин балога қолишим мумкин эди.

Бу орада кунлар тобора қисқариб, айрим кечалари кўрпа тагидаям совқота бошладик. Ҳовлимизнинг кўча девори остида ҳар йили бурганлар одам бўйи ўсиб ётар, хотиним уларни атайнин юлмай, кузакда ўриб олиб, узун-узун кўchasуптирги боғлатар, баъзан унча-мунчасини бозорга элтиб сотарди.

Ўроқни кўлга олиб ўша бел баробар бурганзорга яқинлашдим. Энди бир тутам бурганни ўргандимамки, вахимали вишиллаш қулоғимга эшитилиб, тарракдай қотиб қолдим. Мендан икки қадамча наридаги бурганга ўралган илон тилини чиқарган кўйи вишиллар, унга ўралиб олган иккинчиси ҳам совуқ кўзларини менга қадаб олганди. Ўроқни ўша жойда қолдирганча сўри томон жон ҳолатда қочдим.

– Ҳа, яна нима бўлди?! – деди хотиним овсини келгани шарофати билан уннаётган ошига сабзи артишдан тўхтаб. – Бунча рангингизда ранг йўқ!

– Илон! – дедим кўлим билан девор томонга ишора қилиб, – Жуда кўп!

Ҳа, қоча-қоча, бурганзордан чиқкан беш-олтитача илоннинг қовоқ палаклари тагигага ўрмалаб кетганини кўрган эдим.

– Вой, қизларимиз қани?! – хотинимнинг шу гапидан кейингина беҳи тергани кетган қизларимиз эсимизга тушиб, жон ҳолатда уларни чақиришга тушдик.

Қўлларидағи челакни беҳига тўлдиргандан кейин ҳам гапга алаҳисиган дугоналар шоша-пиша боғчадан чиқиб келишаркан, оналарининг вахимали товушларидан жойларида таққа тўхтаб қолишиди.

– Вой, қанақа эркаксиз, боринг, қизларни олиб келлин! – деди хотиним сўридан тушишгаям мажоли келмай.

Узун калтак ва ўроқ билан қуролланган ҳолда ўн қадамлар нарида қотиб қолган қизларимизни сўрига бошлаб келдим. Ош ошлигича қолиб, хотиним қизини олганча ота-онасиникига, келинимиз бир чепак беҳини олганча ўзининг уйига кетди.

...Кимсасиз ҳовлида қолишидан ўзимам кўрқиб, отамнига жўнадим. Нимага келганлигимни айтиб ўтирумай, эрталаб кўрқа-писа ҳовлимизга қайтиб келдим. Одам ўз уйидан кўрқиб қолса ёмон бўларкан.

Ҳовли ўртасида ётган узун калтакни кўлга олганча сўрига яқинлашдиму, оёқларимда мадор қолмади. Ярми ерга осилиб ётган куроқ кўрпача устида бир илон чўзилиб ётарди. Калтак билан уни бир чеккага улоқтириб билдимки, газанда ўлиб қолган экан. Унинг бош қисми узилиб терисигагина илашиб турарди...

Шу вақт дарвозадан отам, қайнотам, хотиним орқами-кетин кириб келишиди.

– Ўнтаданам кўп эди, – деди хотиним ўлган илонни отамнига панасидан томоша қиларкан. – Билақдай келадиганлари бор. Бу уйда энди яшолмайман!

– Худо билади, – отам ўлган илонни қўлига олиб, айлантириб кўра бошлади. – Урғочиси экан. Икки яшарлар бор. Шу бургандорга бало борми ҳовлида! Неча марта айтдим, юлиб, тозалаб, супириб қўйинглар деб. Ҳовлимас, тўқай бу.

– Отажон, камида юзта супурги чиқиб туради-да, – деди хотиним бел баробар бургандорга хавфсиранча тикилиб. – Илон йилимасми бу йил?

– Сен ўлдиридингми буни? – сўради отам ўзининг гапига ўзиям ҳайрон бўлганича. – Илондан ўлардай кўрқардинг.

– Вой, аста айтасизми? – деди хотиним энди ўзининг отасининг панасига ўтиб. – Хотинга зўр холос, бу! Илонни кўрса уч кун кўрпа-ёстиқ қилиб ётади. Гапим шу, совуқ тушгунча отамнида тураман. Бузоқни сиз олиб кетинг, илон-пилон чақса ўлиб қолмасин тағин. Алоҳида уй қилиб, энди молга етган жойим-а...

– Кўп ваҳима қилма, – деди хотиним. – Эшитган қулоққаям яхшимас. Ким ишонади, илондан кўрқиб, отасини келибди деса.

– Бу энди биттаси, ота, – деди хотиним у ёқ-бу ёқларга аланглаб. – Ҳали яна қанчаси бор-у... Илонларни қасоскор деб эшитганман. Мана бунинг ўлиги учун ўч олишга тушишса-чи. Мени ўйламасангларам, невуларингни ўйланглар! Гап шу, отамнига кетаман. Совуқ тушгунча ўшақда бўламан. Мен керакли нарсаларимни тугиб чиқай. Вой-ей, уйга қандай кираман? Ота, юринг, менга ҳамроҳ бўлинг! Қандай кунларга қолдима-а...

Оtam ўйчан бир қиёфада ҳовлида кезинаркан, яна битта илон ўлигини топиб олдию, ва ҳимамиз бежиз эмаслигига амин бўлди...

... Мана бир ҳафтадирки, хотиним билан қизим – отасинида, мен билан бузогим эса ўз отамнида, итимиз занжиридан бўшатилган, ҳовлимиз эгасиз, байталмон. Гарчи ҳовлимиздан илон чиқанини бирорга айтмаган бўлсам-да, аллақачон қишлоқда гап бўлиб кетган эди.

Ҳар куни ҳовлидан хабар олгани гоҳ бир ўзим, гоҳ отам ё бирор укам, ё синфдош жўрам билан келиб кетардим. Кунда, кунора битта ё иккитадан илон ўлигини ҳовлининг турли жойларидан топиб олганимда бундан хурсанд бўлишниям, хафа бўлишниям билолмасдим. Улган илонни далилий ашё сифатида бирор халтага согланча қайnotамнига етиб борардим. Хотиним илонлар ўлиги ортгани сари қайтишни орқага сургани сурган эди. Саккизинчи илон ўлигини топганимиздан сўнг, отам фолбинга учраб, уларнинг сони қирқтачалиги, то уларнинг энг каттаси ўлмагунча ҳовлига қайтолмаслигимиз ҳақида билиб қайтди. Бирор дами ўткир муллага чилёсин қилдириб ташлашимиз керак экан. Шундай ҳам қилдик. Дуоли қофозни дам солинган сувда эзиб ҳовли ичига пуркаб чиқдик. Маросим охирида ўлардай чарчаган дами ўткир дуохонни эшагига миндириб, кўча бошигача кузатиб қўйгач, отам мени қўярда-қўймай ўз ўйимда тунаб қолишга кўндириди: “Укангни жўнатаман, иккита эркак бир-бирларингга жўра бўлиб ётасанлар!”

Ака-ука ярим килоча колбаса сотиб олиб, ҳовлига ғира-ширада кириб нақ тўртта илоннинг ўлиги устидан чиқдик. Нима бало, булар бир-бири билан уруш қилиб ўлишяптими, деб роса бошимиз қотди.

Эгалари келиб қолганидан хурсанд итимиз шундоққина сўри ёнида думини ўйнатиб ётар, биз иргитган колбаса бурдаларини ерга туширмай, ҳаводаёт илиб оларди. Тунги салқин тушганига қарамай иккаламизнинг ҳам уйга кириб ётишга юрагимиз дов бермаганлигидан, бир-бirimizга пойлоқчилик қилганча тахмондан кўрпаларни олиб чиқиб, сўрида тунай қолдик.

– Ҳожатгаям икковлашиб борамиз чоғимда, – деди укам қўлфонарни ўчириб-ёқиб ўйнаркан. – Биримиз чироқ тутиб турдимиз, биримиз ишимизни бажарамиз.

– Бир кеча бормаям қўяверамиз, – дедим-у, қорнимда санчиқ тараётганини хис қилиб, укамга ўқрайдим, – гапирмаям ў! Юр, энди...


... Тун қандай ўтганиниям билмай қолибман. Тонгги қуёшнинг ўткир нурлари кўзимга қадалганидан билдимки, серташвиш тун ортда қолибди. Сўрининг бошқа тарафида кўрпага ўраниб ёттан қоровул укамнинг ёнида ёниқлигича қолган қўлфонарга кўзим тушиб, уни ўчирдим-да, ҳовлини кўздан кечириш учун ўрнимдан турдим. Йўл-йўлакай устунга санчиглик ўроқни қўлга олдим.

Тонгги совуқ куз шамолидан баданларим жунжикади. Ҳазонларнинг намхуш ҳиди димоққа урилади.

Шу пайт қулогимга ғалати шитирлаш эшитилди. Ваҳима билан атрофга алангладим. Кўз ўнгимда намоён бўлган манзарадан тиззаларим қалтираб кетди. Йирик бир илон билан мушук аёвсиз олишарди. Сал нарида яна бир газанданинг пажмурда танаси биланглаб ётарди. Ҳа, бу ўша тунда мен қўрган мушук. Айни пайтда у аввалгидан ҳам баҳайбат қўринарди. Туклари бамисли жайраникidek диккайиб кетган. У ён-бу ён енгил сакрайди, турли ҳолатга киради, эгилувчан думи ҳар тарафга бориб келганча илонни чалғитади. Ердан тизза баравар кўтарилган илоннинг боши мушукнинг думига ҳамоҳанг тарзда тебранар, тебранибгина қолмай, ора-сира ўқдай отилиб, чақиб олишга уринар ва ҳар гал хато кетарди. Бир илонгина эмас, мен ҳам мушук думининг бориб-келишига сеҳрланиб қолгандек, унга монанд ҳаракат қиласардим.

Мушукнинг ўткир chanagli илоннинг бошини аниқ мўлжалга олганини газанданинг бир кўзидан қон томчилаб чиққанидан билса бўларди. Иссиқ қон илоннинг ялтираб турган пўстидан ерга етиб, қонли излар қолдира бошлаган пайтидагина укам келиб қолди ва бақириб юборди. Мана шу лаҳзада тахмин қилган ҳавотирим юз берди – мушук тўсатдан пайдо бўлган укамга эътиборини қаратди ва пайтдан фойдаланган илон ўқдай ташланиб, мушукнинг бўйнига тиши ботиришга улгурди. Гарчи мушук бир силтаб, уни ўзидан узиб ташлаган ва илоннинг бошини ўткир тишлари орасига олишга эришган бўлса-да, унинг қонига ўтган илон заҳри ўз ишини бошлаб юборди – илоннинг жон тарк этаётган узундан-узун аргамчиси акашак бўлаётган мушукнинг танасини сўнгги бора оғушига маҳкам тортиди...

...Бу воқеалар анча пайтгача қишлоғимизда шовшув бўлиб юрди. Ҳатто, туман газетасида “Халоскор мушук” деган кичкина хабар ҳам берилди. “Қаҳрамон” мушукнинг ҳамқишлоқларнинг ўнлаб товуғу куркаларини қиргани ҳақида лом-мим дейилмади. Марҳумлар ҳақида факат яхши гапларни гапириш керак деган қоидага амал қилган бўлишса керак, ҳойнаҳой...



Турсунбой БОЙМИРОВ

Елпугур  
Елпугур  
Елпугур  
Елпугур



# БИЛАМАН, ЯХШИ БИЛАМАН

## Ҳажвия

— Кеча туғилган кунингиз зиёфатига қарашиш билан бутун куним ўтди, — ахборот берди Исмат бошлиғига. — Сизларни жўнатганимиздан сўнг девлар кетиб, сулаймонлар кутулгандек бўлдик.

— Биламан, жуда яхши биламан, — Исматнинг сўзини бўлди бошлиқ, — яйраб ўтириб, роса ичгансизлар. Лекин, сен Исматбой, бу гапларни қўятур. Зиёфат ўз йўлида. Ёрдамчи хўжаликдаги чорванинг ойлик ҳисоботи ҳақида гапир. Тахладингми? Натижаларидан ахборот бер.

Ҳисобчи Исматбой бундай сўровларнинг устаси бўлиб кетганидан гап нима ҳақда кетаётганини дарорванглади. Бошлиқдан эгилиб кечирим сўради-да, гапини давом эттириди.

— Бешта қўчкорни ажратиб олиб, боқаётганимиздан хабарингиз бор. Шу қўчкорлардан биттаси етилиб қолди. Етмиш килолар гўшти бор. Бу юк билан қўйларга насллик қилолмайди. Кеча шуни сўйдириб, зиёфатингизга ўн килосини ажратиб, қолганини буздирмай уйингизга элтиб бердим.

Бошлиқ кўрсаткич бармоғини лабига тикка босди. — Секинроқ, томда ҳам қулоқ бор, дейдилар. Чеччанг хурсанд бўлгандир?

— Ўйга бутун бир қўчкор гўшти келгандан сўнг хурсанд бўладилар-да. Болаларингизнинг қувонганини айтмайсизим...

— Секинроқ гапир-е! Паст овозда имо-ишора билан тушунтир. Кейин-чи? Ўтиришларинг хушвақтлик билан тугадими?

— Яширмайман, кўп ичдик. Ўғлингиз косагул эдилар-да, қўлларини қайтаролмадик. Ҳалиги, меҳмонлардан бири олифталик қилиб “ичмайман!” деб тихирлик қилди. Лекин, ёмон иш бўлди-да.

— Биламан, — деди бошлиқ бепарволик билан, — нима иш қилганликларингни жуда яхши биламан. Бирбирларинг билан гап талашиб ҳам олгансизлар. Балки муштлашгандирсизлар?

— Ҳа-да! Билгандай гапирасиз-е, бошлиқ. Худди шундай бўлди, — айтмоқчи бўлган гапига имконият бўлганидан қувониб гапирди Исмат. — Ўғлингизга жуда ҳавасим келади-да. Ўзлари тенгилар бир урса, икки карра қайтим берадилар. Зарб билан уришга уста.

— Биламан, — деди бошлиқ гердайиб. — Бокс тўғрагига қатнашиб, аниқ мўлжалга уришни ўрганган-да. Жароҳат олганлар ҳам бўлгандир?

— Ҳа! Йўғ-е, — қурмалиб қолди Исмат. — Бу галги жароҳат... Нима десам экан...

— Мен биламан-да, — деди бошлиқ билагонлик қилиб, — бир мушт билан эсдан кеткизгандир. Балким сени. Меҳмонлар хафа қилмадими?

— Сиз айтгандан ҳам ёмон бўлди, — деб чайналарди Исмат. — Икки курак тишлари синиб тушди. Оғизларидан қон келиб, эсидан кетдилар. Узоқ вақт ўзларига келмадилар. Бошларида турдик.

— Ана, — деди бошлиқ завқланиб, — биламан-да мен. Ким экан у сен “сиз”лаб гапираётган шўринг кургур? Муовиннинг ўша латта ўғли эмасми? Бечорага раҳмим келади. Яна икки-уч кун гинахонлик экан-да?!

— Эсанкиратган зарб кайфга қоришма бўлиб, икки соатлардан сўнг кўзларини очиб, сув сўрадилар. Сизни безовта қилмадик.

Бошлиқ гавдасини столга ташлаб, кўзойнагини кўлига оларкан, Исматга шубҳали қаради.

— Биламан, яхши биламан... Ким ҳақида гапирајсан? Билсам бўладими?

— Ўғлингизни Фозилжон акамнинг ўғли Фани бир уришда ағдариб ташлади. Кесилган дараҳтдай қуладилар. Эзилиб кетдим. Кечирасиз, айтиб қўйганим учун.

— Ўғлим?!

Бошлиқ ўрнидан сапчиб турди. Лекин, шу заҳотиёқ шалпайиб ўрнига ўтириб қолди. Ҳушидан кетиб, энди ўзига келаётган одам қиёфасида эгилиб турганича, ғудранди.

— Э-э... Фозилжон акамнинг шундай чапдаст ўғиллари бор эканми? Ўғил бўлгандан сўнг шундай бўлсинда. Майли урсин, хижолат бўлма! Бизнинг ўғил уришни ўргансин-да. Ким билан муомала қилишини тушуниб олади.

— Хўп десангиз, ўша зўравон гапини бир уришда... — керилди Исмат бошлиғининг аҳволига ачиниб.

— Биламан, — бошлиқ еб қўйгудек Исматга тикилди, — жуда яхши биламан. Сени ҳам бир калла қилиб оғзи-бурнингни қонга бўяшини биламан. Чиқ, кўзимдан йўқол!

Исмат бошлиғидан кечирим сўраб, эгилиб-букилганича хонадан чиқди. Чуқур нафас олиб, ўзича ғўлдиради:

— Бошлиқнинг шундай дейишини мен ҳам яхши биламан. Ахир, зўравон Фани бошлиқнинг бошлиғининг ўғли-да. Буни эса ҳамма яхши билади.